

Okushwekuurwa

kw'Obusingye Mushanju bw'Ekanisa

Eshuura ya Kataano

Obusingye Bw'Ekanisa Ya Perugamo

Okushuuruurwa 2:12-17

Handiikira maraika w'ekanisa ey'omuri Perugamo oti: Ebi nibyo bigambo by'Ogwo Oine rurara y'amoogi abiri arikugamba,

Naagira ati: Nimmanya (emirimo yaawe), ahu otuura ku niho ekitebe ky'obukama bwa Sitaane kiba; ku ogumiza kimwe Eiziina Ryangye, kandi ku otarehakaine (okwikiriza kwangye), nangwa n'omu biro bya Antipa, kareebi Wangye omwesigwa, owaitiirwe owaanyu, ahu Sitaane atuura.

Kwonka Nyine ebigambo bikye ebi ndikufa naiwe; okwo oineyo abarikwikiriza enyengyesa ya Balamu, owaayegyeise Balaki kuta enkongi omu maisho g'Abaisraeli, ngu barye ebitambiirwe ebishushani ebirikurambwa, kandi bashambane.

Kandi hoono oine n'abandi abarikwikiriza enyegyesa ey'Abanikolaiti.

N'ahabw'ekyo oyeteise; ku oraabe oteeteise, Niinyija kwija juba ahariwe, mbarwanise na rurara ey'omu kanwa Kangye.

Oine amatu ahurire eki Omwayo arikugambira amakanisa. Orikusingura Ndyamuha omugabo aha maanu esherekirwe, kandi Ndyamuha eibaare eririkwera, erihandiikirweho eiziina risya, eritarikumanywa muntu weena kureka ogwo owaariheebwa.

PERUGAMO

Perugamo (eiziina erya ira) rukaba ruri omuri Mysia, omuri disiturikiti eyaabaire neitirirwa amaizi g'emigyera eshatu, gumwe omuriyo ogwabaire niguruteerana n'enyanja empango. Rukaba nirugambwaho nk'orurembo orurikuriraye kurigirwa omuri Asia. Rukaba ruri orurembo oruri omu maisho omu by'emitwarize y'abantu rwine eibiikiro ry'ebitabo eryabaire riri erya kabiri ahari eryo ery'omuri Alexandria. Beitu kandi rukaba ruri orurembo rw'obukozi bw'ebibi munonga, rwehairwe omu mikoro y'emitwarize y'obushambani y'okuramya kw'emandwa Aesculapius, ei baabaire baramya omu muringo gw'enjoka ehuriire eyaabaire ehairwe obutuuro kandi erikugaburirwa omuri hekalu. Omuri oru rurembo rurungi orw'obushaka bw'emiti erikwitirirwa amaizi, otuhanda tw'ab'ebigyere kandi n'emanyanya y'abantu y'okuzaaniramu n'okuruhuukiramu hakaba hatwiremu akabiina kakye k'abaikiriza abehaireyo abaabaire batabeihabeihirwe n'oburungi obw'aharuguru kandi abaabaire nibanga endamya ya Sitaane eyaabaire eijwire omu mwanya ogwo.

OBUSINGYE

Obusingye bwa Perugamo bukamara nk'emanyanya magana ashatu, okuruga omu mwaka gwa 312 okuhitsya omu gwa 606 A.D.

ENTUMWA

Nitukoresa engyenderwaho yaitu ei tuhairwe Ruhanga ahabw'okutoorana entumwa ahari buri busingye, nimmanya, nitutoorana ogwo ou obuheereza bwe burikuriraye kuba nk'obwo obw'entumwa y'okubanza, Paulo, tutarikweziringa niturangirira ngu entumwa aha busingye bwa Perugamo akaba ari Martin. Martin akazaarwa omu mwaka gwa 315 omuri Hungary. N'obu kiraabe kiri kityo, omurimo gwe nka bishopu akagukorera omuri Bufaransa omu kicweka ekirikwetwa Tours n'okukyehinguririza. Akafa omu mwaka gwa 399. Orikwera mukuru ogu akaba ari ishento w'ondiiyo Mukristaayo murungi munonga, Orikwera Patrick owa Ireland.

Martin akahindikira Kristo obu yaabaire naakora nk'omuserukare otendekirwe. Kikabaho obu yaabaire naakikora omurimo ogu obu eky'amahano ekirikuriraye kurangaanwa kyabaho. Kihandiikirwe ngu omusheegi akaba arwaire abyami omu ruguuto rw'omuri tauni ei Martin yaabaire atumirwe kurinda. Akaba ataraije kubaasa embeho y'obutiti ahakuba akaba ari nk'ojwaire busha. Tihariho n'omwe owaabaire ayetaire aha byetengo bye okuhitsya obu Martin yaahikireho. Ku yaareebire oburemezi bw'omusheegi ogu, kwonka ataine kindi kijwaro, akajuura omunagirowe gwe, yaagusharamu ebicweka bibiri na rurara ye, atyo omwenda ogu yaagushweka ogwo mushaija owaabaire naatitira. Yaamureeberera kurungi nk'oku yaabaire naabaasa bwanyima yaagumizamu omu muhanda gwe. Ekiri ekyo Mukama Yesu akamubonekyera omu kworekwa. Yesu akeemerera aho, nk'omusheegi, ayefubikire omu kicweka ky'ekijwaro kya Martin. Yaagamba nawe, yaagira ati, "Martin, n'obu araabe ari omwegi wa katekisimu kwonka anjwekire ekijwaro eki." Kuruga obwire obwo Martin akasherura kuheereza Mukama n'omutima gwe gwona. Amagara ge gakaba okukuratana kw'eby'amahano ebirikworeka amaani ga Ruhanga.

Ahanyima y'okureka obuserukare kandi yaaherize kuba omwebembezi omu kanisa, akeemerera n'obumanzi bwingi kurwanisa okuramya ebishushani. Akatema otushaka tukye tw'emiti omu baabaire baramiza ebishushani,

yaayatagura ebishushani ebibumbirwe ebiramibwa kandi yaashenyagura amatambiro. Ku yaahakanisiibwe abapagaani ahabw'ebikorwa bye akahiga omu muringo ogurikushushana n'ogu Eliya yaahigire baanabi ba Baali. Akeehayo kukomerwa aha muti aha rubaju rwagwo orwa ifo kugira ngu ku guraatemwe gukagwa ahansi gumuhendagure Ruhanga ku araabe atabitaahiremu akahindura ogwo muti gwaba nigugwa. Abatamanya Ruhanga ab'enaama mbi baamukomera aha muti ogwabaire guri aha rubaju rw'akabungo, nibahamya ngu amaani g'ensi agakurura ebintu nigabigarura ahansi gakaba nigaza kureetera ogwo muti kugwa gutyo gukamuhendagura. Ogwo muti ku gwatandikire kugwa, Ruhanga akaguhindura gwagwa eruguru y'akabungo, ekihindikire aha biragiyo by'obuhangwa byona. Abatarikumanya Ruhanga aba ogwo muti gukabagwera gwahendagura baingi omuribo ku baabaire nibahunga.

Ab'ebiyafaayo baikiriza ngu akazooru abafu nk'emirundi etari ahansi y'eshatu omu Iziina rya Yesu. Rimwe akashabira omwereere ofiire. Nka Elisa, akegororera aha mwereere ogwo yaashaba. Omwereere yaagaruka yaagira amagara atyo yaakira. Aha gundi murundi akeetwa kuhwera okurekura ow'eishe-emwe owaabaire naatwarwa kwitwa omu bwire bw'okuhiiganisibwa kw'amaani. Obwire obu yaahikiireyo omushaija ogwo akaba yaaherize kufa. Bakaba baamuhanikire aha muti. Omubiri gwe gukaba gutarimu magara n'amaisho ge garugire omu binonko byago. Kwonka Martin akamuhanura, kandi ku yaaherize kushaba omushaija ogwo yaagarurirwa amagara atyo yaagarurirwa ab'eka ye baashemererwa.

Martin akaba atakatiinaga omuzigu k'abe yaabaire ari oha. N'ahabw'ekyo akeegyendera we wenka kureebana n'omugabe mubi owaabaire naajunaanwa okufa kw'abarikwera baingi abaijwire Omwoyo. Omugabe ogwo taraikiriize kugamba nawe, n'ahabw'ekyo Martin akaza kureeba munywani w'ogwo mugabe, orikwetwa Damasus, bishopu mubi wa Rooma. Kwonka bishopu ogu, ahabw'okushangwa ari Omukristaayo omu iziina kwonka ow'omuzaabibu gw'ebishuba taramweshengyerereize. Martin akagarukayo omu kikaari, kwonka obwa hati amarembo gakaba gaakingirwe kandi tibaramwikiriize kutaahamu. Akajuumara omu maisho ga Mukama atyo yaashaba ngu abaase kutaaha omu kikaari. Akahurira eiraka nirimugambira kwimuka. Ku yaimukire, yaareeba amarembo nigaigura gonka. Yaataaha omu kikaari. Kwonka omutegeyeki omunyamaryo ogu tarahindwire omutwe gwe ngu agambe nawe. Martin akagaruka yaashaba. Ahonaaho omuriro gwaruga omu ntebe y'obukama reero omugabe ogwirwe kubi yaagirugamu n'obwira. Buzima Mukama agarura ahansi abanyamaryo kandi aimutsya abacureezi.

Okwo nikwo obweziriki bwe bwabaire buri omu kuheereza Mukama okuhitsya obu sitaane yaimukire n'amaani maingi. Abazigu abaabaire nibarwanisa amazima bakapangisa abaitsi kwita Martin. Bakaija omu bwesherekye omu ka ye kandi ku baabaire bari haihi kumwita, akeemerera bwemi ebitsya bye yaabyorekyereza rurara egyo. Ku baabaire nibamugurukira, amaani ga Ruhanga ahonaaho gaabajuguta enyima omu kishengye ekyo. Okwo nikwo baasingwirwe omuri egyo mbeera erikwera kandi erikutiinisa batyo baayekuruza ahansi aha mikono yaabo n'amaju baayeshengyerereza ngu basaasirwe ahabw'okwenda kumwita.

Emirundi erikukira obwingi abashaija ku bakoresibwa Mukama bakarangaanwa beeta ahaiguru n'okwehimbisa. Kwonka Martin we tikwo yaabaire ari. Akaguma ari omuheereza omucureezi wa Ruhanga. Ekiro kimwe ku yaabaire naayetebeekanisa kuza aha kituuti, omusheegi akamushanga omu yaabaire ashomera ebitabo yaamushaba eky'okujwara. Martin akoohereza omusheegi ogwo aha mudiikoni we omukuru. Omudiikoni omunyamaryo ogu akamuragiira kurugaho. Kuruga aho omusheegi yaagaruka kureeba Martin. Martin akaimuka yaaha omusheegi ogwo ekanzu ye enungi, reero Martin yaagambira omudiikoni ogwo kumureetera endiijo kanzu eyaabaire etari y'omuhendo nk'ei yaabaire ajwaire. Ekiro ekyo Martin ku yaabaire naabuurira Ekigambo, obusyo bw'entaama za Ruhanga bukareeba omushana ogurikwera nigwaka mpora gumwetooroire.

Buzima ogu akaba ari omushaija w'amaani, entumwa y'amazima aha busingye obwo. Atarikwetenga kintu kyona kureka okushemeza Ruhanga akatuura amagara agarikukirayo kuba ageeziibwe. Akaba atabaasa kwikiriza kubuurira atabandize yaashaba kandi akaza omu mbeera y'omwoyo kumanya kandi n'okureeta okuhabura kwa Ruhanga okwijwire ahabw'Omwoyo Orikwera otumirwe kuruga omu iguru. Kaingi akaba areetera abantu kuguma bategyereize obwo ariyo naashaba kwenda ngu atungye obuhame obwijwire.

Okumanya ebirikukwata ahari Martin kandi n'obuheereza bwe obw'amaani maingi nikibaasa kutuma omuntu yaateekateeka ngu okuhiiganisa abarikwera kukaba kukyendeire. Tikwo kyabaire kiri. Bakaba nibakihwerekyerezibwa sitaane okurabira omu bantu babi. Bakaba babakomera aha nkondo babootsya. Bakaba bateerwa emisomaari aha mpimbi obusyo niburanzya ahansi babarekurira embwa ezirikuzengyerera, kugira ngu ezo mbwa zitaagataagure emibiri n'eby'omunda, batsigarire kufeera omu busaasi bwingi. Abeereere bakaba bakururwa baihua omu nda z'abakazi abaine enda baabarekyerera empunu. Amabeere g'abakazi gakaba gasharwaho, kandi bagyemwa kwemerera bwemi obwo buri kuteera kw'omutima nikushohoza eshagama okuhitsya obu baabaire beeteera ahansi bakafa. Kandi akagwe aka kakaba kari ak'amaani munonga waateekateeka kandi waayetegyereza ngu ogu gukaba gutari murimo gw'abatatiina Ruhanga bonka, kureka kaingi munonga akagwe aka kakaba kareetwa abarikwetwa Abakristaayo abaabaire baateekateeka ngu nibashemeza Ruhanga omu kumaraho abarwani abeesigwa aba ab'omusharaba abaayemerereire ahabw'Ekigambo kandi n'okworobera Omwoyo Orikwera. Yohaana 16:2, "Baryababinga omuri sinagogi; kandi obunaku buryahika, omuntu weena oribaita aryateekateeka ngu naakorera Ruhanga." Matayo 24:9, "Obwo baryabahayo okubonabonesibwa n'okwitwa; muryayangwa amahanga goona ahabw'Eiziina Ryangye."

Omu bumanyiso n'eby'okutangaaza, omu maani g'Omwoyo, Martin akahamibwa buzima nk'entumwa aha busingye obwo. Kwonka akaba atahairwe obuheereza bukuru bwonka, nawe wenka akaba ari ow'amazima obutwire bwona aha Kigambo kya Ruhanga. Akarwanisa ekibiina ky'ediini. Yaarwanisa ekibi omu myanya mikuru. Yaarwanirira amazima omu bigambo n'omu bikorwa kandi yaatuura amagara agajwire g'obusinguzi bw'Omukristaayo.

Omuhandiiki w'ebyafaayo by'amagara ge akamuhandiikaho omu muringo ogu. “Tihariho n'omwe oraamureebire aine ekiniga, nari ateganisiibwe, nari agwibwe kubi, nari naasheka. Akaba atuura omu mbeera emwe, kandi areebeka nk'ekintu ekirengire omuntu ofa, aine aha maisho ge ekiri nk'okushemererwa kw'eiguru. Hakaba hatakabahoga ekintu ekirikuruga omu kanwa ke kureka Kristo, hakaba hatakabahoga ekintu kyona omu mutima gwe kureka kwehayo ahari Ruhanga, obusingye n'embabazi. Kaingi akaba arizibwa ebibi nangwa n'eby'abo abaabaire bamumaramu amaani, ku yaabaire aba ahunami nari atariho abaabaire bamurwanisa n'eminwa yaabo y'empiri kandi n'endimi zaabo z'obushegu. Abaingi bakaba bamwangira emicwe ye mirungi ei bo baabaire bataine kandi batarikubaasa kutooreza; kandi ai bambe! abazigu be abaabaire nibakira abandi obubi bakaba bari baabishopu.”

OKURAMUTSYA

Okushuuruurwa 2:12 b “Ebi nibyo bigambo by'Ogwo Oine rurara y'amoogi abiri arikugamba.”

Obutumwa aha kanisa y'obusingye bwa kashatu buri haihi kurugayo. Ekicweka kya kashatu eki ekirikworeka ebirikukorwa ekya “Kristo ahagati y'ekalisa Ye,” kiri haihi kushuuruurwa. N'eiraka nk'ery'enzamba, Omwoyo naayanjura Ogwo Otakainganwa, “Ogwo Oine rurara y'amoogi abiri!” Enyanjura egi k'eine omutaano muhango munonga waagyeranisa n'obwire obu Pilaato yaayanjura Omwana gw'Entaama wa Ruhanga, ajwekirwe ebijwaro by'okushungisibwa bya bujwa, atwirwe kandi ajwekirwe ekirunga ky'amahwa, naagira ati, “Mureebe omugabe waanyu!” Hati, Mukama ozookire ayemereire ajwekirwe ebijwaro by'obugabe n'ekirunga ky'ekitiinisa, “Kristo, amaani ga Ruhanga.”

Omu bigambo ebi, “Ogwo Oine rurara y'amoogi abiri” harimu okundi kushuuruurirwa kw'Obwaruhanga. Omu Busingye bwa Efeso, noiya kwijuka, Ayorekirwe nka Ruhanga Otahinduka. Omu Busingye bwa Sumuruna Tukamureeba nka Ruhanga OMWE W'AMAZIMA kandi tihariho ondiijo kureka We. Hati omu Busingye bwa Perugamo obu harimu okushuuruurirwa okundi okurikweyongeraho kw'Obwaruhanga Bwe, nikworekwa kwine akakwate na rurara Ye y'amoogi abiri, nikyo Kigambo kya Ruhanga. Abaheburaayo 4:12 “Ahakuba Ekigambo kya Ruhanga kiine amagara n'amaani, kiine obwogi bwingi okukira rurara yoona ey'amoogi abiri, nikicumita kihika ahu kitaanisiza amagara n'omwoyo, engingo n'omushokooro, kandi kirahuka kucaaka ebi omuntu arikuteekateeka n'ebi amaririire omu mutima gwe kukora.” Abaefeso 6:17 “Kandi rurara y'Omwoyo, nikyo Kigambo kya Ruhanga.” Okushuuruurwa 19:13 na 15a, “Ajwaire ekijwaro ekimiisiirwe eshagama, kandi eziina Rye ni Kigambo kya Ruhanga. Omu kanwa Ke harugamu rurara y'obwogi.” Yohaana 1:1-3 “Bwa mbere na mbere hakaba hariho Kigambo; Kigambo ogwo akaba atuura na Ruhanga; kandi Kigambo ogwo akaba ari Ruhanga. Ogwo (Kigambo) omu kutandika akaba ariho na Ruhanga; ebintu byona niwe yaabihangire, kandi omu byahangirwe byona tihariho kintu na kimwe eki atarahangire.” 1 Yohaana 5:7, “Hariho bishatu ebirikuhama omu Iguru; Tataitwe, Ekigambo, n'Omwoyo Orikwera, kandi ebyo bishatu n'OMWE.”

Hati nitubaasa kureeba okukwatanisa Kwe n'Ekigambo. KRISTO NIWE KIGAMBO. Ekyo nikyo Ari. EKIGAMBO OMU IZIINA RYE.

Omuri Yohaana 1:1 ahu kirikugira kiti, “Bwa mbere na mbere hakaba hariho Kigambo,” obukomooko obu turikutungamu envunuura yaitu “ahabw'Ekigambo” ni “Logos” ekirikumanyisa “ekiteekateeko nari shi enyetegereza.” Kiine amakuru abiri “ag'ekiteekateeko” kandi “n'okugamba.” Hati “ekiteekateeko ekyagambwa” “n'ekigambo,” nari “ebigambo.” Ekyo t'eky'okutangaaza kandi kirungi? Yohaana naagira ngu ekiteekateeko kya Ruhanga kikoorekyerwa omuri Yesu. Kandi na Paulo naagamba ekintu nikyo kimwe omu Baheburaayo 1:1-3, “Ira Ruhanga akatuma baanabi ahari baatatenkuriitwe kubagambira omu miringo mingi etari emwe; kwonka omu biro ebi ebya bwanyima itwe akatutumaho Omwana We, (Logos) kuba niwe yaatugambira, Ou Yaataireho kuba omuhunguzi w'ebintu byona, kandi Ou Yaahangiise ensi. Ogwo niwe kumurinkana kw'ekitiinisa kya Ruhanga kandi ekishushani Kye buzima, kandi niwe ahigika byona n'Ekigambo Kye eky'obushoboorozi. Ku Yaaherize kuhikiiriza eky'okwozyaho ebibi, yaashutama aha rubaju rwa buryo orw'Ow'ekitiinisa omu iguru.” Ruhanga akeyoreka omu muntu orikwetwa Yesu kristo. Yesu akaba ari Ekishushani Ekyorekirwe kya Ruhanga. Kandi omuri Yohaana 1:14 nihagira hati, “Kigambo ogwo yaaba omuntu, yaatuura naitwe.” Ruhanga eki yaabaire ari kyonyini kikaba omuntu atyo yaatuura naitwe. Ruhanga-Omwoyo omukuru otakaabaasa kuhikwaho muntu weena, Owaabaire atakareebwaga muntu weena kandi otabaasa kureebwa hati akaba atwire omu muntu atyo yaatuura n'abantu, naayoreka abantu obwijwire bwa Ruhanga. Yohaana 1:18 nihagira hati, “Okuruga iranaira tihariho orareebire Ruhanga; Omwana We omwe nyamunegyere, Ori omu kifuba kya Ishe, Niwe Yaamumanyiise.” Ruhanga, Owaabaire obumwe n'obumwe ayoreka okubaho Kwe n'ekicu nari enyomyo y'omuriro ebyabaire bireeta obwoba omu mitima y'abantu; Ruhanga ogu, Ou emitwarize y'omutima Gwe yaamanyisiibwe ahabw'okushuuruurirwa kw'ebigambo kwonka kurabira omuri baanabi, hati akahinduka Emmanueli (Ruhanga ari hamwe naitwe) Naayerangirira. Ekigambo “okurangirira,” nikiihwa omu kigambo ky'Orugriika eki kaingi tushoboorora nka 'exegesis,' ekirikumanyisa okushoboororera kimwe kandi n'okworekyera kimwe. Ekyo nikyo Yesu, KIGAMBO

Ohuriire, yaakozire. Akatureetera Ruhanga, ahakuba akaba Ari Ruhanga. Akatushuuruurira Ruhanga n'okushobooroka okuhikire kutyo kuhitsya obu Yohaana yaabaasize Kumugambaho omuri 1 Yohaana 1:1-3 ati, “Ekyabaire kiriho iranaira, Eki twahuriire,” (Logos nikimanyisa okugamba), “Eki twareebire n'amaisho gaitu, Eki twayetegyereze kandi tukakwataho n'engaro zaitu, ekya Kigambo ow'amagara (kandi Amagara ago gakoorekwa, twagareeba, twagahamya, kandi nitubagambira Amagara ago Agatahwaho Agaabaire gari na Isheboona gakatworekwa;) Eki twareebire kandi Eki twahuriire, nikyo turikubagambira ngu naimwe mukwatanise naitwe; kandi naitwe tukwatanise na Isheboona n'Omwana We Yesu Kristo.” Obwire obu Ruhanga yaayeshuuruurira kimwe, Akeyorekyera omu mubiri. “Ondeebire biri areebire Isheboona.”

Hati okwo omu Baheburaayo 1:1-3 twareebire ngu Yesu akaba Ari ekishushani ekyorekirwe kya Ruhanga. Akaba Ari Ruhanga Naayeyorekyera omu muntu aha muntu. Kwonka hariho ekindi kintu ky'okwetegyereza omuri egi mishororongo, na munonga omu mushororongo gw'okubanza n'ogwa kabiri. “Ira Ruhanga akatuma baanabi ahari baatatenkuriitwe kubagambira omu miringo mingi etari emwe; kwonka omu biro ebi ebya bwanyima itwe akatutumaho Omwana We.” Niinyenda ngu oyetegyereze omuri Baiburi yaawe hanu aha rubaju rw'ebyahandiikirwe noiya kureebaho ekirikugorora. Ekigambo, “ahari” ti nshoboorora ehikire. Kishemereire kuba “OMURI.” Kitari “ahari.” Obwo nikishomwa okuhikire kiti, “Omu bwire obwahingwire Ruhanga akagambira baatatenkuritwe kurabira OMURI baanabi omu buryo bw'Ekigambo.” 1 Samueli 3:21b, “Ahakuba MUKAMA Akeyorekyera Samueli Shiilo omu Kigambo Kye.” Ekyo nikyoreka gye 1 Yohaana 5:7, “Omwoyo n'Ekigambo ni KIMWE.” Yesu akashuuruura Ishe. Ekigambo kishuuruura Ishe. Yesu akaba Ari Ekigambo Ekihuriire. Ruhanga ahimbisibwe, ebiro ebi Akiri Ekigambo ekyo Ekihuriire.

Yesu obu yaabaire Ari omu nsi Akagira ati, “Torikwikiriza ku Ndi omuri Tata, kandi na Tata ku ari Omuriinye? Ebigambo ebi Mbagambira Timbyetuma, kureka Tata ori Omuriinye Niwe akora emirimo Ye.” Yohaana 14:10. Aha kyorekirwe gye butunu ku okweyoreka okuhikire kwa Ruhanga omu Mwana kwabaire kuri ahabw'Omwoyo omurimu naayeyorekyera omu Kigambo n'omu mirimo. Ekyo nikyo buzima tutwire nitwegyesa okwiha omu kutandika. Omugore ku arigaruka kuba omugore Kigambo, aryakora emirimo egyo yonyini ei Yesu yaakozire. Ekigambo ni Ruhanga. Omwoyo ni Ruhanga. Ebyo byona n'OMWE. Kimwe tikikaakora hatariho ekindi. Buzima omuntu ku aba aine Omwoyo wa Ruhanga, naija kuba aine Ekigambo kya Ruhanga. Okwo nikwo kyabaire kiri na baanabi. Bakaba baine Omwoyo wa Ruhanga obaturamu reero Ekigambo kyabaizira. Okwo nikwo kyabaire kiri na Yesu. Omuriwe hakaba harimu Omwoyo otaine kipimo kandi Ekigambo Kikamwizira. (“Yesu akatandika kukora n'OKWEGYESA.” “Enyegyesa Yangye teri Yangye ahabwangye kureka n'eya Taata Owantumire.” Ebyakozirwe 1:1; Yohaana 7:16).

Hati oijukye, Yohaana Omubatizi akaba ari nabi kandi entumwa ow'omu biro bye. Akaba aijwire Omwoyo Orikwera kuruga omunda ya nyina. Ku yaabaire naabatiza omuri Yorudani Ekigambo kya Ruhanga (Yesu) kyamwizira. Obutoosha Ekigambo kiziira ogwo oijwire Omwoyo buzima. Ako niko kamanyiso akarikworeka ku omuntu aijwire Omwoyo Orikwera. Ekyo nikyo Yesu yaagambire ngu kiryaba akamanyiso. Akagira ati; “Naanye ndyashaba Tata, Nawe aryabaha Omuhwezi ondiyo, agume naimwe obutwire bwona. Omuhwezi ogwo n'Omwoyo ow'amazima, Ou ensi etarikubaasa kwakiira.” Hati nitumanya eki Amazima gari. “Ekigambo Kyawe nigo Mazima.” Yohaana 17:17 b. Kandi n'omuri Yohaana 8:43, “N'enki ekirikubazibira kushoborokyerwa eki Ndikubagambira? N'ahabw'okuba timurikubaasa kworohera Kigambo Kyangye.” Waayetegyereza ku Yesu yaagizire ngu ensi terikubaasa kwakiira Omwoyo Orikwera? Mpaho, omu mushororongo ogu ogu naashoma, tibarikubaasa n'okwakiira Ekigambo. Ahabw'enki? Ahabw'okuba Omwoyo n'Ekigambo ni kimwe, kandi ku oraabe oine Omwoyo Orikwera nka baanabi, Ekigambo kikaakwiziire. Okaakyakiire. Omuri Yohaana 14:26 nihagira hati, “Kwonka Omuhwezi, Omwoyo Orikwera, ou Isheboona aryohereza omu Iziina Ryangye, Niwe ARIBEEGYESA byona, akabajutsya byona ebi Naabagambiire.” Aha nitugaruka tushanga Ekigambo nikijja ahabw'Omwoyo wa Ruhanga. Kandi omuri Yohaana 16:13 nihagira hati, “Kureka Omwoyo ow'amazima (Ekigambo) ku Arija, Aryabeebembera omu mazima goona.” (“Ekigambo Kyawe nigo mazima.”), “Ahakuba taryetuma; kwonka byona ebi Arihurira (Ekigambo kya Ruhanga), nibyo Arigamba (Ekigambo): kandi Aryabamanyisa ebiriija kubaho.” (Omwoyo naareeta Ekigambo ky'Obunabi.) Niinyenda ngu mwetegyereze n'okwegyendesereza ku Yesu ataragizire ngu akamanyiso k'okubatizibwa n'Omwoyo Orikwera kakaba kari okugamba omu ndimi, okuzishoboorora, okuragura, nari okuteera akaari n'okuzina. Akagira ngu akamanyiso kakaba nikaza kuba ngu noiya kuba ori omu MAZIMA; noiya kuba omu Kigambo kya Ruhanga ky'obusingye bwawe. Akamanyiso kaine akakwate n'okwakiira ekyo Kigambo.

Omu kitabo kya 1 Abakorinso 14:37, “Omuntu weena orikweteekateekaho ngu ni nabi, nari ow'omwoyo, amanye ngu eki mbahandiikiire n'ekiragiyo kya Mukama.” Hati reeba ekyo. Obuhamwe bw'okutuurwamu Omwoyo bukaba buri okwemera n'OKUKURATIRA eki nabi wa Ruhanga yaahaire obusingye bwe obwo naata ekanisa omu buteeka. Paulo akaba naateekwa kugambira abo abaabaire nibagira ngu bakaba baine okundi kushuuruurirwa ati, (omushororongo gwa 36) “Mbwenu, nimugira ngu niimwe Ekigambo kya Ruhanga kyakomookiremu? Nari niimwe mwenka abu kyaiziire?” Akamanyiso k'Omukristaayo omwikiriza oijwire Omwoyo ti kurugwamu amazima (Ekigambo), kureka okwakiira amazima (Ekigambo), kandi n'okugaikiriza akagoorobera.

Oyetegyereze omu Kishuuruurwa 22:17 ku nihagira ngu, “Omwoyo n'Omugore nibagira bati: Ija. Orikuhurira agire ati: Ija?” Reeba, omugore n'Omwoyo nibagamba Ekigambo kimwe. N'omugore Kigambo ekirikuhamya ku aine Omwoyo. Omuri buri busingye bw'ekanisa nituhurira ebigambo ebi, “Oine amatu ahurire

eki Omwoyo arikugambira amakanisa.” Omwoyo naaha Ekigambo. Waaba oine Omwoyo noiya kuhurira Ekigambo ky'obusingye bwawe, nk'oku Abakristaayo abo ab'amazima baatawira Ekigambo ky'obwire bwabo.

Waayetegyereza ekyo kiteekateeko ekirikuhereeruka? Ninkigarukamu, buri busingye bw'ekanisa nibuhereeruka n'okuhabura okurikushushana. “Oine amatu (omuntu okwe wenka) ahurire eki Omwoyo arikugambira amakanisa.” Omwoyo naaha Ekigambo. Aine amazima ahabwa buri busingye. Buri busingye bugizire entoore zaabwo, kandi ab'omuri ekyo kibiina ky'abaatoorainwe buriiyo “bakahurira Ekigambo,” kandi bakyakiira, nikihamya ku baabaire baine Embibo omuribo. Yohaana 8:47, “Owa Ruhanga ahurira Ebigambo bya Ruhanga; imwe eki mutabihuririra n'ahabw'okuba timuri ba Ruhanga.” Bakanga Ekigambo (Yesu) n'Ebigambo Bye by'obwire bwabo, kwonka embibo z'amazima zikaakiira Ekigambo ahabw'okuba bakaba bari aba Ruhanga. “(Abaana) baawe BOONA baryayegyesibwa MUKAMA (Omwoyo Orikwera),” Isaaya 54:13. Yesu akagamba ekintu ekyo omuri Yohaana 6:45. Kuba OMWE N'EKIGAMBO nikihamya yaaba ori owa Ruhanga kandi oijwire Omwoyo. Tihariho ndiyo ngyenderwaho.

Kwonka “endimi” n'okuzishoboorora n'ebindi biconco niki? N'ebirikworeka. Ekyo nikyo Ekigambo kyegyesa. Kishome omuri 1 Abakorinso 12:7, “(Kwonka OKWEYOREKA kw'Omwoyo kuheebwa) buri muntu kugasira boona.” Bwanyima Paulo ashoboorora okweyoreka okwo.

Hati nihaija ekibuuzo eki kirungi munonga eki ndikumanya ngu mwena mwine ekihika kubuuzo. Ahabw'enki okweyoreka kw'ebiconco by'Omwoyo katari kamanyiso k'okubatzibwa n'Omwoyo Orikwera, ahabw'okuba buzima tokaabaasa kworeka Omwoyo Orikwera kureka waaba buzima oijwire Omwoyo? Hati nkaayenzire kugira ngu ekyo kihikire, ahabw'okuba tindikwenda kushaasha abantu nari kuribatiirira enyegyesa zaabo; kwonka tinkaaba omuheereza wa Ruhanga w'amazima naaba ntabagambiire naama yona ya Ruhanga. Ekyo kihikire, tikwo kiri? Ka tureebe kakye ahari Balamu. Balamu akaba ari omunyadiini, akaba aramyu Ruhanga. Akaba naayetegyereza entwaza ehikire y'okutamba n'okuhika ahari Ruhanga, kwonka akaba atari nabi Embibo y'Amazima ahakuba akaakiira ebihembo by'okutahikiirira, kandi ekirikukirayo obubi kya byona akeebembera abantu ba Ruhanga yaabataasya omu bibi by'obushambani n'okuramyu ebishushani. Beitu n'oha owaakwehanga kuhakanisa ngu Omwoyo wa Ruhanga tareyorekye omuriwe omu bicwega bimwe ebirikukirayo oburungi by'obunabi obuhikiire kimwe obu ensi erareebire? Kwonka akaba atakagirahoga Mwoyo Orikwera. Hati mbwenu, nooteekateeka ki ahari Kayaafa, omunyamurwa omukuru? Baiburi neegira ngu akaragura omuringo ogu Mukama arifamu. Twena nitumanya ku hatariho ekimuhandiikirweho nk'omushaija oijwire Omwoyo kandi owaayebembeirwe Omwoyo nk'omukundwa omugurusi Simeoni nari nyamurungi ogwo orikwera orikwetwa Anna. Beitu akaba aine okweyoreka kw'amazima kw'Omwoyo Orikwera. Ekyo titukaakihakanisa. Mbwenu okweyoreka kw'ebiconco by'Omwoyo nk'akamanyiso kurahi? Tikuriho. Omu mazima ku oraabe oijwire Omwoyo wa Ruhanga noiya kugira kamanyiso k'EKIGAMBO omu magara gaawe.

Ka mboorekye oku amazima aga ndikugeehuriramu munonga kandi nkageetegyereza ahabw'okushuuruurirwa oku Ruhanga yampaire. Hati ntakagagambire, niinyenda kugamba eki. Baingi omuriimwe nimwikiriza ngu ndi nabi. Tindikugira ngu ndiwe. Niimwe murikukigamba. Kwonka twena nitumanya ngu okworekwa oku Ruhanga ampa TIKUREMWA. N'OBU GWAKUBA OMURUNDI GUMWE. Omuntu weena ku yaakubaasa kuhamya ngu okworekwa kuraremire niinyenda nkimanye. Hati nk'oku munkuratiire kuhika hare muti, eki n'ekyambaireho.

Emyaka mingi ehingwire obu mbanza kubugana Abapentekoote, nkaba ndi omuri rumwe omu nteerane zaabo ahaabaire harimu okweyoreka kwingi kw'Omwoyo Orikwera omu “ndimi” okushoboorora “endimi,” kandi n'okuragura. Ababuurizi babiri munomuno nibo baabaire beemariire omu kugamba kw'omuringo ogu okukira abandi b'eishe-emwe. Nkashemererwa saaviisi ezo munonga kandi omu mazima nkaba ntaireho omutima munonga aha kweyoreka kw'Omwoyo Orikwera okw'emiringo etari emwe, ahakuba bakaba baine ekirikyo. Nkaba maririire omu kwetenga kwangye okwega byona ebi naabaire nimbaasa aha biconco ebi, n'ahabw'ekyo nkaawamu kugaaniira n'abashaija babiri aba ebikwatsire aha biconco ebyo. Okurabira omu kiconco kya Ruhanga ekiri omuriinye, nkasherura ngu manye omwoyo ogwabaire guri omu mushaija ow'okubanza, yaaba buzima kwo yaabaire ari owa Ruhanga nari atariwe. Byanyaima y'okuganiira akaanya kakye n'ow'eishe-emwe ogwo omukundwa, kandi omucureezi, nkamanya ngu akaba ari Omukristaayo w'amazima, ohamire. Akaba ari Omukristaayo kashushu. Omutsigazi ondiiyo akaba atari nk'ow'okubanza na kakye. Akaba naayehimbisa kandi aine amaryo, kandi ku naabaire ningamba nawe okworekwa kwaija omu maisho gangye kandi naareeba ku yaabaire ashweire omukazi oine eishokye eririkushushana obunyaatsi bwomire kwonka akaba naatuura n'omukazi oine eishokye eririkwiragura kandi akaba amuzaireho abaana babiri. Ku haraabe haarabaireho endyadya, akaba ari ogu.

Hati ka mbagambire, nkeekanga. Nkaabaasize nta kuteekanga? Aha hakaba hariho abashaija babiri, omwe aharibo ari omwikiriza w'amazima kwonka ondiiyo akaba ari omusiisi orikutooreza. BEITU BOMBI BAKABA NIBOOREKA EBICONCO BY'OMWOYO. Nkateganisibwa okuburabuzibwa oku. Nkatsigaho oruteerane naaza kusherura Ruhanga kugira ngu manye eki kirikumanyisa. Nkagyenda nyenka omu mwanya ogwehereire kandi okwo nyine Baiburi yangye nkashaba kandi naategyereza Ruhanga kungarukamu. Ntarikumanya ekicwega ky'Ebyahandiikirwe ky'okushoma nkafa kushuuruura Baiburi naahikira aha mwanya gumwe omuri Matayo. Nkashoma kumara akaanya kakye reero naata Baiburi ahansi. Omu kaire kakye omuyaga gukahuuha omu kishengye kandi gwahindura empapura za Baiburi omu kitabo ky'Abaheburaayo, eshuura ya 6. Nkagishoma

yoona kandi naakwatwaho munonga emishororongo egyo etari ya buriijo, Abaheburaayo 6:4-9, “Mumanye ngu abaabaire bajwereirwe omushana, bakaroza aha kiconco eky'omu iguru, bakahinduka abakwataniise omu Mwoyo Orikwera, kandi bakaroza aha burungi bw'Ekigambo kya Ruhanga n'aha maani ag'obusingye oburiija, abo, ku bagwa baabirugamu, kiba kitakibaasika kubagarura bwa kabiri omu kweteisa, ahabw'okuba baba bagarukire kwebambira Omwana wa Ruhanga aha musharaba, n'okumukwatsa enshoni butunu. Eitaka ku rihaaga enjura erigwireho kaingi, ryamera emboga ezishemereire abu rihingiirwe, Ruhanga ariha omugisha; kwonka ku rimeru amahwa n'amatojo, riba ritakiine mugasho, riri haihi n'okukyeenwa; n'omuheru gwaryo kuri okwokibwa. Kwonka, abarikukundwa, n'obu turaabe twagamba tutyo, nituteekateeka tutarikubanganisa ngu ebyanyu biri gye okukira ebyabo, kandi birimu okujunwa.”

Nkateerana Baiburi, naagita ahansi, naateekateeka akaire kakye kandi naayeyongyera kushaba. Nabwo nkaguma ntagarukirwemu. Nkagaruka naashuuruura Baiburi ntafiireyo kwonka tinaashoma. Ahonaaho omuyaga gwagaruka gwahuuha omu kishengye, kandi ogundi murundi empapura zaayeshuuruura omu Baheburaayo eshuura ya 6 zaaguma aho omuyaga ku gwarekire kuhuuha. Nkashoma ebighambo ebyo ogundi murundi, reero ku naabishomire, bwanyima haija Omwoyo wa Ruhanga omu kishengye ntyo naareeba okworekwa. Naareeba omu kworekwa omushaija ajwaire ebirikwerera kimwe owaagiire omu musiri ogwabaire gwaheza kuhingwa yaagubibamu embibo. Eizooba rikaba niryaka, kandi okubiba kukakorwa omu kasheeshe. Kwonka nyekiro omu itumbi, ahanyima y'omubibi owaabaire ajwaire ebirikwera kugyenda, omushaija ojwaire ebirikwiragura yaija bwesherekye yaabiba embibo ezindi omuri ezo ezi omushaija owaabaire ajwaire ebirikwera yaabaire abyaire. Ebiro byarabaho - eizooba n'enjura byaheereza omugisha itaka; kandi ekiro kimwe embibo zaamera. Ka zaabaire ziboneire. K

onka ahanyima y'ekiro kimwe enkyenzi zaamera.

Engano n'enkyenzi byakura hamwe. Byatunga ebiriisa bimwe kuruga omu itaka rimwe. Byatunga ebiriisa kuruga aha izooba n'omu njura emwe.

Bwanyima ekiro kimwe eiguru ryahinduka omuringa, reero ebimera byona byatandika kuhotoka n'okufa. Naahurira engano zaimutsya emitwe yaazo kandi zaatakira Ruhanga ngu azihe enjura. Enkyenzi nazo zaimutsya amaraka gaazo ahaiguru zaashaba enjura. Bwanyima eiguru ryairirimba reero enjura yaagwa, kandi ogundi murundi engano, hati ziiwire amaani zaimutsya amaraka gaazo ahaiguru zaagamba munonga niziramya ziti, “Mukama ahimbisibwe.” Kandi ekyantangaize nkahurira enkyenzi ezigarwirwemu amaani nazo zaareeba ahaiguru zaagira ziti, “Haleluya!”

Reero naamanya amazima g'oruteerane orwo kandi n'okworekwa. Enfumu y'Omubibi n'Embibo, eshuura ya 6 y'Abaheburaayo, n'okweyoreka butunu kw'ebiconco by'Omwoyo Orikwera omu bantu b'orujwangye - byona bikashoboroka kurungi okurikutangaaza. Omubibi owaabaire ajwaire ebirikwera akaba ari Mukama. Omubibi owaabaire ajwaire ebirikwiragura akaba ari sitaane. Ensi ekaba eri omusiri. Embibo zikaba ziri abantu, entoore n'abatarikusiimwa. Zoonza zikatunga aha kiriisa kimwe, amaizi n'omushana. Zoonza zikashaba. Zoonza zikatunga obuhwezi kuruga ahari Ruhanga, ahabw'okuba eizooba Rye arijiwisiza ababi n'abarungi, kandi agwisiza enjura abahikiriire n'abatahikiriire. Kandi n'obu zoonza zaabaire ziine omugisha gumwe ogurikutangaaza, kandi zoonza zaabaire ziine okweyoreka kw'ebiconco by'Omwoyo Orikwera okurikutangaaza, NABWO HAKABA

HAKIRIHO OGWO MUTAANO MUHANGO, ZIKABA ZIRI EMBIBO EZITARIKUSHUSHANA.

Hanu naho hakaba hariho eky'okugarukamu Mat 7:21-23, “Omuntu weena orikungira ati: Mukama wangye, Mukama wangye, tiwe aritaaha mu bukama bw'omu iguru, kureka orikukora ebi Tata ow'omu iguru akunda. Baingi baryayetonganira aha kiro ekyo bati: Mukama waitu, Mukama waitu, torikumanya ku twabuiriire omu Iziina Ryawe, ku twabingire baadaimoni omu Iziina Ryawe, kandi ku twakozire eby'okutangaaza bingi omu Iziina Ryawe? Haza Naanye ndyabagarukamu nti: Tinkabamanyaga; mundugye omumaisho, imwe abakora eby'obugomi!” Yesu tarikuhakana ngu tibarakozire emirimo mikuru ei Omwoyo Orikwera wenka arikubaasa kukora kurabira omu bantu. Kureka Akeehakana ku atakabamanyaga. Aba bakaba batari abaagarukire enyima. Aba bakaba bari ababi, abataragarwirwe busya omu mwoyo, abatarikusiimwa. Aba bakaba bari embibo ya Sitaane.

Nkikyo aho. TORIKUBAASA kugira ngu okweyoreka kw'ebiconco by'Omwoyo Orikwera niko kamanyiso k'okuzaarwa Omwoyo, kwijura Omwoyo. Ngaaha sebo. Ninza kwemera ku okweyoreka kw'Omwoyo Orikwera kw'amazima niko kamanyiso k'Omwoyo Orikwera arikukora ebikorwa by'amaani, kwonka TIKARI kamanyiso akarikworeka ngu omuntu aijwire Omwoyo, n'obu kiraabe kiri ngu omuntu ogwo aine okweyoreka kwingi kw'ebiconco by'Omwoyo Orikwera.

Akamanyiso k'okutunga Omwoyo Orikwera ebiro ebi nikashushana nk'oku kaabaire kari omu biro bya Mukama waitu. N'okwakiira Ekigambo ky'amazima eky'obwire obu otwiremu. Yesu tarahamisiriize obukuru bw'Emirimo nk'oku Yaahamisiriize Ekigambo. Akamanya ngu abantu ku baakutunga Ekigambo emirimo ekaba naija kukurataho. Ekyo ni Baiburi.

Hati Yesu akamanya ngu hakaba nihaza kubaho okuteishuka aha Kigambo okurikutiinisa omu Busingye bwa Perugamo obwabaire bukiri emyaka magana abiri okwo omu maisho kuruga omu bwire bw'okworekwa kwa

Patumo. Akamanya ngu okuteishuka okwo kukaba nikwija kubareetera kuza omu Busingye bw'Omwirima. Akamanya ngu omuringo ogu omuntu omu kutandika yaarugire ahari Ruhanga gukaba guri okubanza yaatsigaho Ekigambo. Ku oraatsigyehe Ekigambo ekyo, nooba waatsigaho Ruhanga. N'ahabw'ekyo Naayeyanjurira ekanisa ya Perugamo, kandi buzima n'amakanisa goona ag'obusingye bwona ati, "Niinye Kigambo. Ku muraabe nimwenda Ruhanga ahagati yaanyu, kyo nimutangirire kandi mwakiire Ekigambo.

Mutariikiriza omuntu weena nari ekintu kyona okuza ahagati yaanyu n'ekyo Kigambo. Eki eki Ndikubaha (Ekigambo) n'okushuuruurwa Kwangye. NIINYE KIGAMBO. Ekyo mukijjuyekye!"

Niinyebuuza yaaba tukwatsirweho ekirikugasha aha Kigambo ekiri ahagati yaitu. Ka mbahe ekiteekateeko hanu. Tushaba tuta? Tushaba omu Iziina rya Yesu, tikwo? Buri shaara eba omu Iziina Rye kitari kityo tihabaho kugarukwamu kwona. Kwonka omuri 1 Yohaana 5:14, nitugambirwa tuti, "Kandi obu nibwo bumanzi obu twine Omuriwe, ngu ku tushaba ekintu kyona nk'oku Akunda, Atuhurira. Kandi ku turaabe nitumanya ngu Atuhurira omuri byona ebi tushaba, nitumanya ngu tutungire ebi Twamushabire." Hati nitubuuza tuti, "Okukunda kwa Ruhanga niki?" Hariho OBURYO BUMWE bwonka bw'okumanyiramu okukunda Kwe kandi obwo n'okuraba omu KIGAMBO KYA RUHANGA. Okutonzya 3: 37 nihagira hati, "N'oha oraragiire kikabaho, MUKAMA atakiragiire?" Nkikyo aho. Ku kiraabe kitari omu Kigambo torikukitunga. N'ahabw'ekyo titubaasa kushaba kyaba kitari omu Kigambo, kandi titubaasa kweshengyereza nari kushaba kyaba kitari omu Iziina Rye. Nkikyo aho ogundi murundi. YESU (Eziina) niwe KIGAMBO (okukunda Kwe). Tobaasa kutaanisa Ruhanga n'Ekigambo. Byombi ni KIMWE.

Hati mbwenu, Ekigambo eki eki Atsigire kihandiikirwe aha mpapura n'ekicweka Kye ku oraakyakiire n'okwikiriza omu magara agaijwire Omwoyo. Akagira ngu Ekigambo Kye n'amagara. Yohaana 6: 63 b. Kwonka ekyo buzima nikyo Ari: Yohaana 14: 6, "Niinye Muhanda, n'Amazima, n'Amagara." Abarooma 8:9 b, "Omuntu weena otaine Mwoyo wa Kristo, ti muntu We na kakye." Nkikyo aho, Niwe Mwoyo kandi Niwe Magara. Ekyo buzima nikyo Ekigambo kiri; ekyo buzima nikyo Yesu ari. Niwe Kigambo. N'ahabw'ekyo omuntu ozairwe Omwoyo, oijwire Omwoyo omu kwikiriza ku atwara Ekigambo ekyo omu mutima gwe haza akakigamba, naaba ari nka Ruhanga orikugamba. Buri rushozi rwine kurugaho. Sitaane tabaasa kwemerera omumaisho g'ogwo muntu.

Kuri Ekanisa, obwire obwo omuri obwo busigye bwa kashatu yaaramatiire kyarimwe aha kushuuruurirwa okw'Ekigambo ekihuriire ekyabaire kiri ahagati yaabo, amaani ga Ruhanga tigaakubaire nigahwerera nk'oku gaahwereire omu Busingye bw'Omwirima. Kandi na hati, ekanisa ku eraagarukye aha Kigambo omu kwikiriza, nitubaasa kugamba tutarikubanganisa ngu ekitiinisa kya Ruhanga kandi n'ebikorwa ebirikutangaaza bya Ruhanga nibiza kugaruka bibe ahagati yaayo.

Ekiro kimwe ku naabaire ninsherura Mukama, Omwoyo Orikwera akangambira ngu nkwate ekaraamu yangye mpandiikye. Ku naabakwire ekaraamu kuhandiika, Omwoyo We yampa obutumwa bw'ekanisa. Niinyenda kububareetera . . . Bwine akakwate n'Ekigambo kandi n'omugore.

"Hanu hariho eki ndikugyezaho kubagambira. Ekiragiro ky'okwezaara kiri ngu buri kika kizaare omu muringo gwakyo, nk'oku kiri kurugiirira omu kitabo ky'Okut 1:11, "Ruhanga yaagira ati: Ensi emere ebirikumera, ebirikwera enjuma, kandi n'ebiti ebirikwana ebijuma, ebirimu embibo, buri kimwe omu muringo gwakyo. Kyaba nikwo kyaba." Omuringo gw'amagara ogwabaire guri omu mbibo gukarugamu gwaza omu kimera kandi kuruga omwo gwaba ekijuma. Ekiragiro ekyo kimwe nikikora aha kanisa eriizooba. Embibo yoona eyaataandikire ekanisa neija kukura kandi eshushane nk'embibo eyaabandize ahabw'okuba n'embibo egyo emwe. Omu biro ebi eby'aha muheru Omugore Ekanisa ey'amazima (embibo ya Kristo) neija kuhika aha ibaare ry'aha Mutwe, kandi neija kuba ekanisa erikukirayo oburungi, oruganda orurikukirayo oburungi, yaaba neemwirira haihi. Abo abari omu mugore nibaija kushushanira kimwe Nkawe okuhitsya obu baraije kuba omu kishushani Kye kyonyini. Eki n'ekigyendererwa ky'okugira ngu beegaite Nawe. Nibaija kuba omwe. Nibaija kuba okweyoreka

okwo kwonyini okw'Ekigambo kya Ruhanga ohuriire. Ebigombe by'amadiini tibibaasa kurugwamu eki (embibo mbi). Nibaija kurugwamu enyikiriza z'amadiini gaabo hamwe n'ebigunjano byabo, bijwangire n'Ekigambo. Okujwangana oku nikuzaara ekintu haiburiidi.

Omwana w'okubanza (Adamu) akaba ari embibo-Kigambo ekyagambirwe Ruhanga. Akaheebwa omugore kwezaara. Nikyo omugore yaamuheereirwe, okwezaara; kuzaara ondiijo mwana w'omwoyo wa Ruhanga. Kwonka ogwo mugore akagwa. Akagwa ahabw'okujwanzya embibo. Akareetera omushaija we kufa.

Omwana wa kabiri (Yesu), nawe Embibo-Kigambo ekyagambirwe Ruhanga akaheebwa omugore nk'oku Adamu yaamuhairwe. Kwonka atakamushweire, nawe kandi akaba yaagwire. Omugore ogu, nk'omukazi wa Adamu, akateebwa aha kigyezo yaaba yaabaire naija kwikiriza Ekigambo kya Ruhanga akaba ohuriire, nari okubanganisa Ekigambo akafa. Akabanganisa. Akatsigaho Ekigambo. Yaafa.

Okuruga omu kibiina kikyeyo y'amazima y'Ekigambo, Ruhanga naija kuha Kristo omugore omukundwa. N'omugore oshugaine aha Kigambo Kye. N'oshugaine ahabw'okuba tarikumanya enyikiriza z'ediini ezikozirwe abantu nari ebigunjano. Ahabwa kandi n'okurabira omu ngingo z'omugore nihaija kuhikiirizibwa byona ebyaraganisiibwe Ruhanga okworekyerwa omuri abo abashugaine.

Ekigambo ky'okuraganisa kikaizira Mariamu oshugaine. Kwonka Ekigambo ky'okuraganisa ekyo kikaba kiri

We, We wenka, okweyoreka. Ruhanga akeeyoreka. We, We wenka, akakora omu bwire obwo kandi yaahikiiriza Ekigambo Kye ky'okuraganisa omuri ogwo oshugaine. Ni maraika owaabaire areeteire Mariamu obutumwa. Kwonka obutumwa bwa maraika bukaba buri Ekigambo kya Ruhanga. Isaaya 9:6. Kristo akahikiiriza omu bwire obwo byona ebyabaire Bimuhandiikirweho ahabw'okuba Mariamu akaikiiriza Ekigambo Kye.

Abari omu mugore oshugaine nibaija kukunda Kristo, kandi baryagira Ebimukozire (Kristo), ahakuba Niwe mutwe gwabo, kandi amaani goona n'Age. Nibamworobera nk'oku engingo z'emibiri yaitu zoorobera emitwe yaitu.

Yetegyereze obumwe bw'Ishe n'Omwana. Yesu akaba atakora kintu kyona okuhitsya obu Ishe yaabaire abanza Kukimworeka. Yohaana 5:19. Obumwe obu hati n'obw'okubaho ahagati ya Kishwera n'omugore We. Kishwera amworeka Ekigambo Kye ky'amagara. Omugore akyakiira. Takibanganisaho. N'ahabw'ekyo, tihaine ekirikubaasa kumukora kubi, n'obu yaakuba rufu. Ahakuba embibo ku erikuba ebyairwe, amaizi nigaija kugaruka gagizoore. Enaama y'eki n'egi. Ekigambo kiri omu mugore (nk'oku kyabaire kiri omuri Mariamu). Omugore aine ekiteekateeko kya Kristo ahakuba naamanya eki Kristo arikwenda ngu kikorwe n'Ekigambo. Omugore naakora okuragiira kw'Ekigambo omu Iziina Rye ahakuba aine “oku nikwo Mukama arikugira.” Bwanyima Ekigambo Omwoyo akihindura ekihuriire reero kihikiirira. Nk'embibo ebyairwe kandi ekaitirirwa amaizi, ehika aha kushaarurwa okwijwire, ehikiiriza ekigyendererwa kyayo.

Abo abari omu mugore bakora okukunda Kwe kwonka. Tihariho n'omwe owaakutuma baakora okundi. Baine “oku nikwo Mukama arikugira” kitari kityo nibaceceka. Nibamanya ngu ashemereire kuba ari Ruhanga omuribo orikukora emirimo, naahikiiriza Ekigambo Kye. Taraherize omurimo Gwe gwona obu Yaabaire ari omu buheereza Bwe bw'omu nsi mbwenu hati Naakorera omu mugore kandi okurabira omu mugore. Ekyo omugore naakimanya, ahakuba obwire bukaba butakahikire Kristo kukora ebintu bimwe ebi Arikuteekwa kukora hati. Kwonka hati Naija kuhikiiriza kurabira omu mugore ogwo omurimo ogu Yaatsigiire obwire obu obwaragiriirwe.

Hati ka twemerere nka Yoshua na Kaleb. Ensi yaitu eyaaraganisiibwe yaatandikire kureebeka nk'oku eyaabo yaabaire yaatandikire kureebeka. Hati Yoshua nirimanyisa “Yehova-Omujuni,” kandi naashushanisa omwebembezi w'obwire bw'aha muheru ogwo oriija aha kanisa nk'oku na Paulo yaizire nk'omwebembezi owaabandize. Kaleb naashushanisa abo abaagumire bari abeesigwa ahari Yoshua. Ijuka, Ruhanga akaba yaatandikire Israeli nk'eshugaine n'Ekigambo Kye. Kwonka bakenda ekintu ky'omutaano. Nikwo n'ekanisa y'ebiro by'aha muheru yaakozire. Yetegyereze oku Ruhanga ataratsimbwire Israeli, nari kugireka ekaza omu nsi eyaaraganisiibwe okuhitsya obu bwabaire obwire Bwe obutairweho. Hati abantu nibabaasa kuba baagyemesereize Yoshua, omwebembezi, bakagira bati, “Ensi n'eyaitu, ka tugyende tugikubuure. Yoshua, oremirwe, nooteekwa kuba onagire okwetwa kwawe, tokiine maani agu waabaire ogira. Okaba ohurira kuruga ahari Ruhanga kandi omanyanya okukunda kwa Ruhanga, kandi okora n'obwira. Haine ekikushobireho.” Kwonka Yoshua akaba ari nabi otumirwe Ruhanga kandi akaba naamanya ebi Ruhanga yaaraganiise, n'ahabw'ekyo akabitegyereza. Akategyereza okucwamu okushorongire kuruga ahari Ruhanga kandi obwire ku bwahikire bw'okugyenda, Ruhanga akata obwebembezi obwijwire omu mikono ya Yoshua ahabw'okuba akaba agumire n'Ekigambo. Ruhanga akaba naabaasa kwesiga Yoshua kwonka atari abandi.

N'ahabw'ekyo nikiija kugaruka kibeho omuri ebi biro by'aha muheru. Emirabanamu niyo emwe, ebirikunyigisiriza ni bimwe.

Twara eky'okureeberaho ekiturikureeba omuri Musa. Nabi w'amaani oshukirweho ogu wa Ruhanga akazaarwa okutari kwa buriijo, yaazaarwa omu bwire buhikire ahabw'okujuna oruzaaro rwa Abrahamu kuruga Misri. Taragumire omuri Misri kuhakana aha Byahandiikirwe n'abo, n'obu kwakuba okuteera empaka n'abanyamurwa. Akaza omu ihamba okuhitsya obu abantu baayetegwire kumwakiira. Ruhanga akeeta Musa kuza omu ihamba. Okutegyereza kukaba kutari aha rubaju rwa Musa kureka ahabw'abantu abaabaire batakeetegwire kumwakiira. Musa akateekateeka ngu abantu nibaija kwetegyereza kwonka tibareetegyereize.

Reero hariho Eliya ou Ekigambo kya Mukama kyaiziire. Ku yaaherize kubuurira amazima kandi ekibiina ekyo obwire obwo okwo ekiri eky'okubandiza ekibiina kya Yezebeeli Omunyamerika tikiraakiriire Ekigambo, Ruhanga akamweta kuruga aha buheereza atyo Yaabonabonesa obusingye obwo ahabw'okwanga nabi ogwo hamwe n'obutumwa obu Ruhanga yaabaire ahairwe. Ruhanga akamweta yaamutwara omu ihamba kandi akaba atarikubaasa kurirugamu n'obu yaakwetsirwe omugabe. Abo abaagyerizeho kumweshengyereza kurirugamu, bakafa. Kwonka Ruhanga akagamba na nabi We omwesigwa omu kworekwa. Akaruga omu bweshereko atyo yaagarurira Israeli Ekigambo.

Bwanyima haija Yohaana Omubatizi, omwesigwa ow'okubandiza Kristo, nabi ow'amaani omu biro bye. Taragiire omu ishomeru rya ishe, n'obu ryakuba ishomeru ry'Abafarisaayo - taragiire omu kigombe ky'ediini kyona, kureka okwo omu ihamba ei Ruhanga yaamwetsire kuza. Akaguma okwo kuhitsya obu Mukama yaamwohereize n'obutumwa, naagambira ahaiguru ati, “Mesia ari haihi.”

Hati ka tutware okuhabura kw'Ebyahandiikirwe hanu. Kikaba kitari omu biro bya Musa ou Ruhanga yaabaire ahamize obu Koora yaimuka akahakanisa nabi ogwo ow'amaani? Akahakana na Musa, yaagira ngu nawe akatunga okuruga ahari Ruhanga okubaasa kwebembera abantu kandi ngu n'abandi baine omugabo omu kushuuruurirwa kwa Ruhanga nka Musa. Akanga obushoborozi bwa Musa. Hati abantu ebiro ebyo, ahanyima y'okuhurira

Ekigambo ky'amazima kandi baabaire nibamanya gye ngu nabi w'amazima ahamibwa Ruhanga, ningamba nti abantu abo bakaza aha rubaju rwa Kooro n'obugomi bwe. Kooro akaba atari nabi w'omu Byahandiikirwe beitu abantu omu bwingi n'abeebembezi baabo bakamukurata. Reebe oku kirikushushana n'ababuurizi ebiro ebi n'enkora zaabo z'enyana y'ezaabu nk'eya Kooro. Nibareebeka bari barungi omu maisho g'abantu nk'oku Kooro yaareebekire ari murungi obwire obwo. Baine eshagama aha buso bwabo, amajuta omu ngaro zaabo kandi n'emiriro erikwaka aha kituuti. Nibaikiriza abakazi ababuurizi, baikiriza abakazi kushara amashokye gaabo, kujwara empare ndaingwa n'engufu, kandi beehuza Ekigambo kya Ruhanga ahabw'enyikiriza z'amadiini gaabo n'ebigunjano. Ekya nikyoreka ni mbibo ki eri omuribo. Kwonka ti bantu boona abaayehinduriire Musa bakatsigaho Ekigambo kya Ruhanga. Ngaaha. Entoore zikaguma nawe. Ekintu nikyo kimwe ekirikubaho ebiro ebi ogundi murundi. Baingi nibatsigaho Ekigambo kwonka bamwe nibaguma nakyo. Kwonka oijukye orufumu rw'oburo n'enkyenzi. Enkyenzi zishemereire kubohwa ekiba zookibwe. Amakanisa aga ag'obuhabe gariyo nigabohwa kuhikaana hamwe, geeteekateekyere omuriro gw'okucwerwa orubanja kwa Ruhanga. Kwonka oburo bwo nibuza kushoroozibwa ahari Mukama.

Hati niinyenda ngu oyegyendesereze munonga hanu orebe eki. Ruhanga araganiise ngu omu bwire bw'aha muheru Malaki 4 neza kuhikiirizibwa. Neeteekwa kuhikiirizibwa ahakuba n'Ekigambo kya Ruhanga eki Omwoyo arikuhindura ekihuriire ekyagambirwe nabi Malaki. Yesu akakigambaho. Nikibaho Kristo atakaizire omurundi gwa kabiri. Obwire obu Yesu arazire Ebyahandiikirwe byona nibiteekwa kuhikiirira. Ebiro by'Abanyamahanga nibiija kuba biri omu busingye bw'ekanisa obw'aha muheru obu egyo ntumwa ya Malaki eraije. Naija kuba naikirizana n'Ekigambo. Naija kutwara Baiburi yoona okuruga omu Kutandika okuhika omu Kushuuruurwa. Naija kutandikira aha ruzaaro rw'enjoka agumizemu ahikye aha ntumwa omu njura ya katumba. Kwonka naija kwangwa ebigombe by'amadiini.

Naateekwa kwangwa ahakuba ekya n'ebyaafaayo birikugaruka kubaho kuruga omu bwire bwa Ahabu. Ebyafaayo bya Israeli omu butegyeki bwa Ahabu biriyo nibibaho hanu hanu omuri Amerika aha nabi ow'omuri Malaki arikureebekyera. Nk'oku Abaisraeli baarugire Misri bakaza kuramiza omu busingye, bakabinga abatuuzi b'egyo nsi, bakaimutsya eihanga n'abeebembezi rugambwa nka Daudi n'abandi, reero bwanyima bakata Ahabu aha kitebe ky'obukama Yezebeeli amuri enyima kumuragiira eky'okukora, nikwo naitwe tukozire ekintu ekya kyonyini omuri Amerika. Baatatenkuriitwe bakaija omuri egi nsi kuramya n'okutuura omu busingye. Bakabinga abatuuzi baamwo baatwara ensi. Abashaija b'amaani nka Washington na Lincoln bakatunguurwa kwonka ahanyima y'akaanya kakye abashaija abandi abatashemereire bakahungurira abashaija aba abashemereire okuhitsya obu juba Ahabu yaateirwe omu ntebe y'obwa purezidenti Yezebeeli amuri enyima kumuragiira eky'okukora. N'omu bwire nk'obu obu entumwa y'omuri Malaki ashemereire kwiziramu. Bwanyima omu njura ya katumba haryabaho akahayano k'aha Rushozi Karumeeli. Hati yetegyereze eki n'obwegyendesereza kugira ngu okireebe omu Kigambo. Yohaana akaba ari ow'okubandiza kwija kwa Malaki 3. Akabyara enjura y'eibiba bwanyima yaayangwa ebibiina by'amadiini eby'omu biro bye. Yesu akaija kandi yaagiraho akahayano aha Rushozi rw'Okuhindirirwaho. Orikubandiza Kristo kwija wa kabiri naija kubibira enjura ya katumba. Yesu naija kuba akahayano ahagati y'ebigombe by'amadiini n'enyikiriza z'amadiini, ahakuba Aryaija kuhamya Ekigambo Kye kandi atware Omugore We omu kutwarwa. Akahayano k'okubanza kakaba kari Orushozi Karumeeli; aka kabiri kakaba kari Orushozi rw'Okuhindirirwaho, kandi aka kashatu karyaba Orushozi Saayuuni.

Enyetwara etari ya buriiyo ya Musa, Eliya, na Yohaana okuruga omu bantu bakatuura bonka ekatsiga baingi bashobeirwe. Abantu tibareetegyereze ngu n'ahabw'okuba obutumwa bwabo bukaba bwangirwe. Kwonka embibo ekaba yaabibirwe, okubyara kukaba kuhweire. Okucwerwa orubanja nikwo kwabaire nikuza kukurataho. Bakaba bamazire omurimo gwabo nk'akamanyiso aha bantu, n'ahabw'ekyo okucwerwa orubanja nikwo kwabaire nikukurataho.

Niinyikiriza okurugiirira aha Kushuuruurwa 13:16 ngu omugore naija kureka kubuurira ahakuba enyamaishwa neiya kuba neeshaba akamanyiso aha mukono nari aha buso okwikirizibwa kubuurira kwaba kuri okw'okuheebwa. Ebigombe by'amadiini biryatwara akamanyiso aka, kitari ekya bigyemwe okurekyera aho kubuurira. Bwanyima Omwana gw'Entaama aryaija atware omugore We kandi acwere orubanja maraaya omukuru.

Hati ijuka ku Musa yaazairwe ahabw'omurimo gw'omutaano, kwonka akaba atarikubaasa kukora omurimo ogwo kuhitsya obu yaatungire ebiconco by'okumubaasiisa kukora omurimo ogwo. Akaba naateekwa kuza omu ihamba kandi akategyerereza okwo; Ruhanga akaba aine obwire obwateirweho. Hakaba hashemereire kubaho Faraho nanka aha kitebe ky'obukama, kandi n'abantu bakaba nibateekwa kuba nibatakira omugaati gw'amagara, Ruhanga atakagarukire kumutumayo. Eki nikwo kiri omu biro byaitu.

Kwonka eki twine omu biro byaitu niki? Omutwe muhango gw'abantu nibakora obumanyiso okuhitsya obu twine obusingye obw'abarikusherura obumanyiso abarikumanya kakye nari busha aha Kigambo, nari enkora/ y'amazima y'Omwoyo wa Ruhanga. Ku bareeba eshagama, amajuta n'omuriro nibashemererwa; tibarikufayo ekiri omu Kigambo. Nibaija kushagika akamanyiso koono, n'obu bwakuba obumanyiso obutari omu Byahandiikirwe. Kwonka ekya Ruhanga akakituhaburaho. Akagamba omuri Matayo 24 ngu omu biro by'aha mperu emyoyo ebiri egi neiya kuba ehikaine munonga okuhitsya obu entoore zonka nizo ziribaasa kugitanisamu, ahakuba bo bonka nibo bataribehwabeihwa.

Noobaasa ota kutaanisamu emyoyo egi? Gigeze orikukozesa Ekigambo kyonka. Ku eraabe etagambire ekyo Kigambo neeba eri ey'omubi. Nk'oku omubi ogwo yaabeihaebihire abagore babiri ab'okubanza, naija kugyezaho kubihaebihire omugore ow'ebiro ebi eby'aha muheru, naagezaho kumureetera kwejwanzya omu nyikiriza z'amadiini, nari kuruga aha Kigambo bwerure kuza aha kamanyiso koonaka akarikumushemeza. Kwonka Ruhanga takataga obumanyiso omu maisho g'Ekigambo. Obumanyiso bukurata Ekigambo, nk'obu Eliya yaagambire omukazi okubanza yaamutekyera akagaati, nk'oku Ekigambo kya Mukama kyabaire kiri. Omukazi ku yaakozire nk'oku Ekigambo kyagambire, akamanyiso akahikire kaija. Banza ogarukye aha Kigambo reero oreebe eky'amahano. Embibo Kigambo Omwoyo niwe arikugihaha amaani.

Entumwa yoona etumirwe kuruga ahari Ruhanga neebaasa eta kwikiriza ekicweka ky'Ekigambo kandi ekahakanisa ekindi kicweka? Nabi wa Ruhanga ow'amazima omu biro ebi eby'aha muheru naija kurangirira Ekigambo kyona. Ebigombe by'amadiini nibiija kumwanga. Ebigambo bye nibibaasa kushaarira nk'ebya Yohaana Omubatizi owaabeetsire enjoka z'empiri. Kwonka abo abaamanyirwe ira nibaija kuhurira kandi beeteguure okubakurwa. Oruzaaro rw'Obukama rwa Abrahamu, rwine okwikiriza okuri nk'okwa Abrahamu nirwija kuramatira aha Kigambo hamwe nawe, ahakuba bakamanywa ira hamwe nawe.

Entumwa y'ebiro by'aha muheru eryareebeka omu bwire obwatairweho Ruhanga. N'obwire bw'aha muheru hati nk'oku boona barikumanya, ahakuba Israeli eri omu nsi yaayo. Obwire bwona kwiha hati naija kwija kurugirira ahari Malaki. Ku turimureeba, naija kuba ayehaireyo aha Kigambo. Naija kworekwa (naija kworekwa butunu omu Kigambo. Kushuuruurwa 10:7.) kandi Ruhanga naija kuhamya obuheereza bwe. Naija kubuurira amazima nk'oku Eliya yaakozire kandi ayetegeurire akahayano k'aha Rushozi Saayuni.

Baingi tibarimwetegereza ahabw'okuba beegyesiibwe Ebyahandiikirwe omu muringo ogu barikuteekateeka ngu n'amazima. Ku ariguhakanisa, tibarikwija kwikiriza. Nangwa n'abaheereza b'amazima bamwe nibaija kuteetegereza entumwa egi ahabw'okuba ebintu bingi munonga byetsirwe amazima ga Ruhanga n'ababeihi.

Kwonka nabi ogu aryaija, kandi nk'oku owaabandiize okwija kw'okubanza yaagambiire ahaiguru ati, “Reeba, Omwana gw'Entaama wa Ruhanga, orikwihaho ekibi ky'ensi!” nikwo nawe hatariho kubanganisa arigambira ahaiguru ati, “Reeba Omwana gw'Entaama wa Ruhanga, arikwizira omu kitiinisa.” Naija kukora eki, ahakuba nk'oku Yohaana yaabaire ari entumwa y'amazima aha ntoore, nikwo n'ogu ari entumwa y'aha muheru aha ntoore kandi omugore ozairwe Ekigambo.“

KRISTO NAASIIMA EKANISA

Kushuuruurwa 2: 13 “Nimmanya (emirimo yaawe), hamwe n'ahu otuura ku niho ekitebe ky'obukama bwa Sitaane kiba; ku ogumiza kimwe Eiziina Ryangye, kandi ku otarehakaine (okwikiriza kwangye), nangwa n'omu biro bya Antipa, kareebi wangye omwesigwa, owaitiirwe owaanyu, ahu Sitaane atuura.”

“Nimmanya emirimo yaawe.” Ebi nibyo bigambo ebirikushushana ebirikugambirwa buri ntumwa omuri ezo mushanju bikwatsire aha bantu ba Ruhanga omuri buri busingye. Nk'oku birikugambirwa emizaabibu ebiri (ogw'amazima n'ogw'ebishuba) nibiija kureeta okwesiima n'amashemererwa omu mitima y'ekibiina kimwe, kwonka bishemereire kuta obwoba bwingi omu mitima y'ekindi kibiina. Ahakuba n'obu tujunwa ahabw'embabazi, etari mirimo, okujunwa okw'amazima nikwija kureetaho emirimo, nari ebikorwa ebirikwija kushemeza Ruhanga. 1 Yohaana 3:7, “Imwe abaana bato, hatagira omuntu weena owaabahabya. OKORA (okora emirimo) eby'okuhikiirira niwe ahikiriire, nka We oku ahikiriire.” Omushororongo ogu ku guraabe nigumanyisa ekintu kyona, nigumanyisa ngu eki omuntu AKORA nikyo ARI. Yakobo 3:11, “Enshuro neebaasa kurugwamu amaizi amarungi n'agarikushaarira?” Abarooma 6:2, “Itwe abaaherize kufa aha kibi, nitubaasa tuta kukigarukamu, tukakigumamu?” Mataayo 12:33-35, “Omuti ku muraagwete murungi, n'ebyana byagwo mubyete birungi; nari shi omuti ku muraagwete mubi, n'ebyana byagwo mubyete bibi; ahakuba omuti gumanyirwa aha byana byagwo. Imwe baana b'enjoka 'mwe, nimubaasa muta kugamba ebigambo birungi, haza muri babi? Ebijwire omutima, akanwa nibyo kagamba. Omuntu murungi aha ebirungi omu ibikiro rye erirungi; n'omubi aha ebibi omu ibikiro rye eribi.” Hati omuntu ku araabe azairwe Ekigambo (“ahakuba mukaheza kuzaarwa obwa kabiri, mutazairwe mbibo erikujunda, kureka etarikujunda, nikyo Kigambo kya Ruhanga ekihuriire kandi ekigumaho,” 1 Pet 1:23), naija kworeka Ekigambo. Ebyana nari emirimo y'amagara ge neiya kuba ebirugire omu muringo gw'embibo nari amagara agamurimu. N'ahabw'ekyo, emirimo ye neiya kuba ey'Ebyahandiikirwe. Oo, amazima aga ka nigaza kusingisa orubanja Obusingye bwa Perugamo. Ngugwo ayemereire Ogwo Otakainganwa, kandi omu mukono Gwe harimu rurara y'amoogi abiri, Ekigambo kya Ruhanga. Kandi Ekigambo ekyo nikijja kutucwera orubanja omu biro by'aha muheru. Omu mazima Ekigambo kiriyo nikicwa orubanja na hati, ahakuba kicaaka ebi omuntu arikuteekateeka n'ebi amaririire omu mutima gwe kukora. Nikishara kitaanisa eby'omubiri n'eby'omwoyo. Nikituhindura ebaruha ezihuriire ezishomwa kandi zikamanywa abantu boona kuhaisa Ruhanga ekitiinisa.

“Nimmanya emirimo yaawe.” Omuntu ku yaakutiina ngu naabaasa kutashemeza Ruhanga, reero k'ahikiirize Ekigambo. Omuntu ku yaakwebuza yaaba arihurira ebigambo ebyo, “Yebare, omwambari omurungi kandi omwesigwa,” k'ahikiirize Ekigambo kya Ruhanga omu magara ge, kandi buzimazima naija kuhurira ebigambo ebyo eby'okusiima. Ekigambo ky'amazima nikyo kyabaire kiri engyenderwaho obwo; nikyo ngyenderwaho na hati. Tihariho rundi rugyero; tihariho endiijo kariisho (birigi). Nk'oku ensi erikuza kucwerwa orubanja n'omwe Kristo Yesu, nikwo erikwija kucwerwa orubanja Ekigambo. Omuntu ku araabe naayenda kumanya oku

arikugyenda omu maisho, akore nk'oku Yakobo yaagambire: “Reeba omu ndeeberwamu y'Ekigambo kya Ruhanga.”

“Nimmanya emirimo yaawe.” Ayemereire okwo n'Ekigambo, naashwijuma amagara gaabo omu mushana gw'eky'okureeberaho eki Yaabaire abateereireho, Naateekwa kuba yaashemereirwemu munonga, ahakuba bo, okushushana nk'abandi abaabaire bababandiize, bakaba nibagumisiririza okuhiigwa kw'abatahikiriire kandi nabwo bakiramatiriire ahari Mukama n'okwesiima. N'obu kyabaire kigumire bumwe okuheereza Mukama, beitu bakamuheereza kandi bamuramiza omu Mwoyo n'omu mazima. Kwonka aha muzaabibu gw'ebishuba tikwo kyabaire kiri. Ai bambe, bakaba bangire kwikiriza amagara agombekirwe aha Kigambo mbwenu hati bakaba nibagumizamu kuza hare kuruga aha mazima. Ebikorwa byabo bikaba nibihama ku baabaire bagwire hare omu kiina.

OGUMIZA KIMWE EIZIINA RYANGYE

“Nituza ahari oha? Ka niiwe wenka oine ebigambo by'amagara agatahwaho!” Bakagumiza kimwe obwire obwo; bakaba bagumiize kimwe hati, kwonka bataine bwoba bw'okwehwa amatsiko nk'abantu abatwire amagara agatarikwana byana. Bakaba nibagumiza kimwe omu maani Ge, omu bwesigwa bw'Omwoyo ngu bakaba bari bamwe Omuriwe. Ekyabo kukaba kuri okumanyira kimwe ku ebibi bisaasiirwe kandi bakaba baine eiziina “ry'Omukristaayo” nk'obujurizi. Bakaba nibamanya kandi nibakunda Eiziina eryo eryabaire nirikira iziina ryona. Bakaba baatsimbiire amaju Eiziina eryo. Endimi zaabo zikaba zaaryatwire. Kyona eki baabaire bakora, bakaba bakikorera omu Iziina rya Mukama Yesu. Bakaba baatwire Eiziina eryo kandi baarugire omu kibi, kandi ku baaherize kworeka orubaju rwabo bakaba hati beetegwire kufeera Eiziina eryo, bahamiibwe okuzooka okurikukira oburungi.

Twara Eiziina rya Yesu,

Mwana w'obusaasi n'enaku;

Niriza kukuha okwesiima rikuhumurize,

Ritware ahu oraaze hoon.

Eiziina ry'omuhendo, Oo ka nirirungi!

Matsiko g'ensi n'okwesiima kw'eiguru.

Omu bwire obu omu kyasha kya kabiri ebigambo ebyo “Isheboona, Omwana kandi n'Omwoyo Orikwera” baingi bakaba baaherize kwihamu amakuru ngu nibimanyisa “Tiriniiti,” kandi n'enteekateeka y'okuramya baaruhanga baingi eya Baaruhanga bashatu ekaba yaahindikire enyegyesa omu kanisa y'ebishuba. Kikaba kitarikwija kutwara obwire buraingwa Eiziina eryo ritakahirweho, nk'oku buzima kyabaire omu busingye obu, kandi omu mwanya gwaryo ebyeterero by'ogwo RUHANGA OMWE MUKURU bakaba nibaza kubihangaanisa n'EIZIINA, Mukama Yesu Kristo. N'obu baingi baarugiire kimwe aha mazima bakaakiira tiriniiti kandi bakabatiza nibeejunisa ebyeterero by'Obwaruhanga, Obusyo Bukye bukaguma nibubatiza omu Iziina rya Yesu Kristo butyo bwaramatira aha mazima.

Ahabw'abantu baingi munonga okugaya Ruhanga, Nibamuhinduramu baaruhanga bashatu, n'okuhindura Eiziina Rye ry'embabazi omu ebyeterero, omuntu akaayebuuza yaaba obumanyiso n'eb'okutangaaza ebikurata Eiziina rikuru eryo byabaire nabwo nibikikorwa omu bantu. Buzima obumanyiso obwo bukaba nibworekwa omu maani maingi n'omu muringo ogurikutangaaza, n'obu buzima bwabaire butarikweyorekyera omu muzaabibu ogw'ebishuba. Abashaija nka Martin bakakoresibwa munonga kandi Ruhanga yaabahama n'obumanyiso n'eb'okutangaaza n'ebiconco by'Omwoyo Orikwera. Eiziina eryo rikaba rikiine amaani omu kukora nk'oku burijjo ritwire rigaine kandi nikwo ririguma ahu abarikwera Barikumuha ekitiinisa omu Kigambo n'okwikiriza.

TOREEHAKAINE OKWIKIRIZA KWANGYE

Omu Byakozirwe 3:16 Petero ku yaabuuziibwe oku eky'amahano kyabaire yakorerwa ekirema aha Irempo Erirungi, akakishoboorora omu muringo ogu, “Kandi omushaija ogu, ou murikureeba, ahabw'okwikiriza Eiziina rya (Yesu), Eiziina eryo (Yesu) niryo ryamuha amaani (owaaba ari ekirema); kandi okwikiriza oku (Yesu) aha (okuruga Ahariwe) nikwo kwamukiriza kimwe (omushaija ogu) omu maisho gaanyu mwena.” Mwareeba, nikyo ekyo. Eiziina rya Yesu, n'Okwikiriza kwa Yesu bikakora eky'amahano. Petero taragizire ngu kukaba kuri okwikiriza kwe kw'obuntu n'obu kwakuba kugamba ngu rikaba riri eiziina rye. Akagira ngu Eiziina rya Yesu rikoresiibwe omu kwikiriza okurikuruga ahari Yesu nikwo kwakozire ogwo murimo gw'amaani. Okwikiriza oku nikwo Mukama yaabaire naagambaho omu Kushuuruurwa 2:13. Kukaba kuri okwikiriza KWE. Kukaba kutari kwikiriza OMURI We. Kureka kukaba kuri okwikiriza KWE WENKA oku Yaabaire ahaire abarikwikiriza. Abarooma 12:3, “Nk'oku Ruhanga yaagyereire omuntu weena okwikiriza” (kurugiirira aha mushororongo gw'okubanza abantu nikimanyisa AB'EISHE-EMWE). Abaefeso 2:8, “Embabazi nizo zaabajunire ahabw'okwikiriza; kandi oku (Kwikiriza) ti habw'okukora kwanyu, kureka n'ekiconco kya Ruhanga.” Kandi nabwo omuri Yakobo 2:1 nihagira hati, “B'eishe-emwe, (yetegereze ku, nawe, arikugambira AB'EISHE-EMWE) mutagira okwikiriza KWA (t'omuri) Mukama waitu, Yesu Kristo, kandi mukashoroora omu bantu.”

Omu Busingye bwa Perugamo obu omu abantu baabaire niboorobya okujunwa kwenda ngu bashemeze abantu, baherize kuruga aha mazima agarikugira ngu “Okujuna n'okwa Mukama,” - baherize kuta aha rubaju enyegyesa y'okutooranwa batyo bakarangaaza orwigi rw'ekanisa kandi n'okukwatanisa kwabo aha muntu weena na boona abaikiriize enyegyesa zaabo (n'obu baakuba batafiire aha Kigambo), omu busingye obu obwarahukire kusiisikara, hakaba hakiriho bakye abaabaire baineho orugyero rw'okwikiriza kwa Mukama waitu Yesu Kristo, kandi tibarakoreise okwikiriza okwo omu bikorwa by'amaani kwonka kureka bakangira abo abaayehangire kugira ngu bakaba bajunirwe ahabw'enshonga y'okwegaita aha kanisa kwonka. Bakaba nibamanya ngu tihariho muntu buzima owaakubaasa kwikiriza amagara agatahwaho n'okuhikiirira kwa Ruhanga hatariho orugyero rw'okwikiriza kwa Mukama Yesu, Wenka. Nk'oku ekanisa y'ebiro ebi eijwire abaikiriza b'obwengye bw'obuntu abashagika okuzaarwa okushugaine, eshagama eyaaseesirwe, okuza aha kanisa n'okushembera, kwonka batazairwe obwa kabiri na kakye, nikwo n'omu busingye bwa kashatu obwo haabaire harimu emirabanamu egi. Okwikiriza kw'obuntu kukaba kutarikumara obwire obwo kandi tikurikumara na hati. Nikyetaagisa okwikiriza kw'Omwana wa Ruhanga We Wenka kutaaha omu mutima gw'omuntu kugira ngu abaase kwakiira Mukama w'ekitiinisa omuri hekalu etombekirwe n'emikono.

Oku kukaba kuri okwikiriza okuhuriire. “Mba ohuriire ahabw'okwikiriza kw'Omwana wa Ruhanga.” Paulo taragizire ngu akaba ari ohuriire ahabw'okugira okwikiriza OMU Mwana wa Ruhanga. Kukaba kuri okwikiriza kw'Omwana wa Ruhanga okwabaire

kumuhaire amagara kandi kukamugumya ari ohuriire omu businguzi bw'Omukristaayo.

Ngaaha, bakaba batehakaine ngu okujunwa kukaba kurengire eby'obuhangwa kuruga aha kutandika kuhika aha muheru. Bakarinda amazima gari agahuriire ag'Eiziina Rye n'Okwikiriza Kwe kandi Mukama yaabaha omugisha batyo baabarwa nk'Abamushemereire.

ANTIPA WANGYE OMWESIGWA OWAAFEEREIRE OKWIKIRIZA

Tihariho kindi ekihandiikirwe omu Kigambo nari omu byafaayo by'ensi ekirikukwata aha w'eishe-emwe ogu. Kwonka buzima tikirikwetengwa kubaho. Nikigasha munonga kuba yaamanyirwe ira kandi akamanywa Mukama. Nikigasira kimwe okureeba obwesigwa bwe ahari Mukama buhandiikirwe omu Kigambo ekihuriire. Akaba ari Omukristaayo. Akaba aine Eiziina rya Yesu. Akaba aine okwikiriza kwa Mukama waitu Yesu Kristo kandi akaba ari omuri abo abaabaire bari abahuriire ahabwaryo. Akaba ayorobeire ebigambo bya Yakobo ebirikugira biti, “Mutagira okwikiriza kwa Mukama waitu Yesu Kristo kandi mukashoroora omu bantu.” Aijwire Omwoyo Orikwera n'okwikiriza nka Stefano, tarashoroire omu bantu, taratiinire muntu weena; kandi ku baarangiire kwita boona abaabaire baine Eiziina eryo kandi bakagyendera omu kwikiriza kwa Yesu Kristo akooreka orubaju rwe n'abo abaabaire batarikubaasa kugaruka enyima. Eego, akafa, kwonka nka Abeeli, akatunga obujurizi kuruga ahari Ruhanga (eiziina rye rihandiikirwe omu Kigambo), kandi n'obu araabe yaafiire, eiraka rye na hati nirikigamba omu mpapura z'Ebihandiiko Ebirikwera bya Ruhanga. Ondiijo mwesigwa owaafeereire okwikiriza akatwarwa omu buruhuukiro bwe. Kwonka Sitaane tarasingwire obwire obwo, nk'oku atarasingwire obu yaita Mukama w'Obusingye, ahakuba nk'oku Sitaane yanyagirwe aha musharaba, nikwo na hati eshagama ya Antipa erikwija kutakira amagana n'amagana g'abantu abandi abarikwija kwekorera emisharaba yaabo Bakamukuratira.

AHU EKITEBE KY'OBUKAMA BWA SITAANE KIBA

Enshonga erikutuma eki kyaba ekicweka ky'okusiima kw'Omwoyo n'ahabw'okuba abaserukare emanzi z'omusharaba aba baabaire nibasingurira Sitaane ahagati y'ekishengye ky'ekitebe ky'obukama bwe. Bakaba nibasingura orugamba okurabira omu Iziina n'Okwikiriza kwa Yesu ahagati omu rusiisira rw'abeebembezi b'omwirima. Ka n'okusiimwa kw'amaani. Nk'abashaija b'amaani ba Daudi abaatahiriire orusiisira rw'abazigu kuza kureetera Daudi amaizi agarikumara eiriho, nikwo n'ebikaaka by'okwikiriza ebi byataahiriire omwanya mukuru gwa Sitaane ogu yaabaire ahamiireho omu nsi, kandi kurabira omu kubuurira n'okwehanangiriza bikareeta amaizi g'okujunwa ahari abo abaabaire batwire ahansi y'ekibunda ky'okufa.

Hati nk'oku ebigambo ebi ebikwatiraine n'ekitebe ky'obukama kandi n'omwanya gwa Sitaane biri ekicweka ekirikusiimwa Ruhanga ahabw'entoore Ze, buzima nibitaho omwanya gw'okujumiirira ababi abeetungiire obukuru omu kanisa.

PERUGAMO: Ekitebe ky'Obukama bwa Sitaane n'Omwanya ogu Atuuramu. Ahari baingi, ebigambo ebi bitwire biri ekishushani kwonka bitari eby'ebyafaayo buzima. Kwonka buzima bihikire kandi ebyafaayo nibikihanya. Perugamo ekaba buzima eri ekitebe ky'obukama kandi obutaaho bwa Sitaane. Kikabaho omu muringo ogu:

Perugamo okubanza gukaba gutari mwanya ahu Sitaane (aha kikwatiraine n'eby'abantu) yaabaire atura. Babulooni buriijo etuura eri omwanya mukuru gwa Sitaane oguriho kandi mukuru n'omu kurengyeza. Omu rurembo rwa Babulooni nimwo okuramya Sitaane kwabandiize. Okutandika 10:8-10, “Na Kuushi yaazaara Nimuroodi; yaatandika kuba emanzi omu nsi. Akaba ari omuhiigi rugambwa omu maisho ga MUKAMA; nk'oku bagira ngu, N'omuhiigi rugambwa omu maisho ga MUKAMA nka Nimuroodi.” Ensi ei yaabandiizemu kuba omugabe ni Shinaari, eyaabaire erimu Babeeli, Ereki, Akadi na Kalune. Okutandika 11:1-9, “Ensi yoona ekaba eine orurimi rumwe n'engambo emwe. Ku baafurukiire oburugwa-izooba, baareeba oruhita omu nsi ya Shinaari;

baarutuuramu. Baagambirana bati: Mwije tubumbe amatafaari, tugootsye gye. N'ahabw'ekyo baagira amatafaari omu mwanya gw'amabaare, na koroto omu mwanya gw'obudongo. Baagira bati: Mwije tweyombekyere orurembo n'omunaara, guhikye ahaiguru, tubone kurangaanwa, turekye kutaataanira hoona omu nsi yona. MUKAMA yaashuuma kureeba orurembo n'omunaara, ebi abantu baabaire nibombeka. Mukama yaagira ati: Reeba, abantu aba n'eihanga rimwe, kandi (boona nibagamba) orurimi rumwe; ku baraabe baatandika kukora ebi, omu bi barikuteeketeeka kukora, tihariho kiribarema. Ka tushuume tuhindahindure orurimi rwabo, barekye kuhurirana. Atyo MUKAMA yaabataatanisa, baarugayo, baabuga ensi yona; baarekyera aho kwombeka orurembo. Nikyo rwayeteirwe Babeeli; ahakuba niho MUKAMA yaahindahindwire orurimi rw'ensi yona; kandi okuruga obwo MUKAMA yaabataatanisa, baabuga ensi yona.“

Babeeli niryo eiziina ry'okubanza rya Babulooni. Babeeli nikimanyisa akajagararo. Buzima ekatandikwa Kuushi, mutabani wa Haamu, kwonka yaakuzibwa kuba obugabe bw'amaani kandi obw'ekitiinisa omu butegyeki bwa mutabani we, Nimuroodi, omuhiigi rugambwa. Nimuroodi, kurugiirira aha birikugambwa omu kitabo ky'Okutandika eshuura ya ikumi n'emwe kandi n'okurugiirira omu byafaayo by'ensi, akamariirira kuhikiiriza ebintu bishatu. Akaba naayenda kwombeka eihanga ry'amaani, eki yaakozire. Akaba naayenda kujanjaaza ediini ye, eki yaakozire. Akaba naayenda kwekorera eiziina, kandi nakyo eki yaahikiriize. Ebi yaakozire bikaba bikuru munonga okuhitsya obu obugabe bwa Babulooni bwayetsirwe omutwe gw'ezaabu omuri zaagavumenti zoonza ez'ensi. Kugira ngu ediini ye ekaba nkuru nikihamibwa n'ekirikugira ngu Ebyahandiikirwe nibigyorekyera kimwe eine akakwate na Sitaane omuri Isaaya Eshuura ya 14 kandi n'omu Kushuuruurwa Eshuura ya 17-18. Kandi turikukoresa ebyafaayo nitubaasa kuhanya ku yaataahiriire ensi yona kandi ku niyo musingye gwa buri ntwaaza y'okuramya ebishushani, kandi n'eishomo ry'eby'emigane egunzirwe, n'obu amaziina ga baaruhanga baayo gatarikushushana omu bicweka bitari bimwe by'ensi kurugiirira aha rurimi rw'abantu. Eky'okugira ngu akeekorera eiziina hamwe n'abakuratsi be nikyeyoreka ahakuba obusingye obu turimu obu ku buraagumizemu (okuhitsya obu Yesu araayeshuuruurire Beene-ishe) naija kuramibwa kandi aheebwe ekitiinisa, n'obu arikwija kuba aine eiziina rihindikire aha rya Nimuroodi, kandi ari omuri hekalu ehindikireho kakye ahari egyo ei omu kubanza yaabaire naaramibwamu.

Obu Baiburi etashoboorora ebyafaayo by'agandi mahanga munonga, nikiza kwetaagisa kusherura omu bihandiiko by'ensi ebya ira kuzooro eky'okutumanyisa nk'oku Perugamo yaahindikire ekitebe ky'ediini ya Sitaane ya Babulooni. Oburugo bukuru bw'okutumanyisa nibwija kuba omu bihandiiko by'emitwarize y'Abanyamisri n'Abagriika. Enshonga y'eki eri ngu Misri ekatunga sayansa na kubara kuruga aha Bakaludaaya kandi bwanyima Bugriika yo yaabitunga kuruga Misri. Hati obu abanyamurwa baabaire bakuriire eby'okwegyesa zaasayansa ezi, kandi obu zaasayansa ezi zaabaire nizikoresibwa nk'ekicweka ky'ediini, obwo nitumanya ekishumuruzo nk'oku ediini ya Babulooni yaatungire amaani gaayo omuri aga mahanga abiri. Nabwo n'eky'amazima ngu eihanga eryabaire riba niribaasa kusingura erindi ihanga, omu bwire obuhikire ediini y'eihanga eryasingura ekaba eba ediini y'eihanga eryasingurwa. Nikimanywa gye ku Abagriika baabaire baine obumanyiso oburikushushana obwa Zodiac nk'Abanyababulooni; kandi kizoirwe omu bihandiiko by'Abanyamisri ebya ira ku Abanyamisri baahaire Abagriika obwengye bwabo bw'okuramya baaruhanga baingi. N'ahabw'ekyo emibonano ya Babulooni ekajanjaara kuruga omu ihanga kuza omu rindi kuhitsya obu yaareebekire omuri Rooma, omuri China, India kandi nangwa n'omuri Bukiizi-bwa-bumoshu n'obwa Buryo bwa Amerika nitushangayo ebikuru by'emibonano y'okuramya okwo ebirikushushana.

Ebyafaayo ebya ira nibikiirizana na Baiburi ngu ediini ya Babulooni egi ekaba buzima etari diini y'okubanza y'abantu b'ensi aba ira. Ekaba ey'okubanza kuteishuka aha kwikiriza okwabandize; kwonka yo yonka tiyo yaabandize. Ab'ebyafaayo nka Wilkinson na Mallett bakakihanya bamaririire okuruga omu bihandiiko ebya ira ku omurundi gumwe abantu boona b'omu nsi baabaire nibakiririza omuri RUHANGA OMWE, omukuru munonga, otahwaho, otareebwa, ahabw'Ekigambo ky'omu kanwa Ke Owaagambire ebintu byona bikabaho, kandi ngu omu mitwarize Ye Akaba naakunda ari murungi kandi omuringaaniza. Kwonka nk'oku Sitaane ariguma naashiisha eki arikubaasa kyona, nitumushanga naashiisha ebiteekateeko n'emitima y'abantu kugira ngu bangye amazima. Nk'oku atura naagyezaho kutunga okuramibwa orikushusha oti ni Ruhanga kwonka atari muhuuku kandi ekihangirwe kya Ruhanga, akaiha okuramya ahari Ruhanga kugira ngu abaase kukwegarurira nikwo atyo atungurwe. Buzima akahikiiriza ekyetengo kye ky'okujanjaaza ediini ye akagibuzya ensi yona. Eki Ruhanga naakihanya omu Kitabo ky'Abarooma. “N'obu baraabe baamanyire Ruhanga, kwonka Tibaramuhimbiise nka Ruhanga, okuhitsya obu baahabisiibwe ebiteekateeko byabo, kandi n'emitima eshwekirwe omwirima bakaakira ediini esiisikaire okuhitsya obu baaramize ebihangirwe kwonka atari Omuhangi.” Ijuka, Sitaane akaba ari ekihangirwe kya Ruhanga (Omwana w'Obusheeshe). N'ahabw'ekyo nitushanga ngu ahu amazima gaabaire gajanjaire omu bantu, kandi boona baabaire baramatiire ahari ago mazima gamwe, bwanyima ekiro kikahika obu ekibiina kihango munonga kyarugire ahari Ruhanga kikajanjaaza omuringo gw'okuramya gwa Sitaane okwehinguririza ensi. Ebyafaayo nibihanya ku abo ab'oruganda rwa Sheemu abaagumire n'amazima agatarikuhinduka bakaba nibahakanisibwa n'amaani abo aba Haamu abaarugire aha mazima bakaza aha kishuba kya sitaane. Tihariho bwire bw'okugaaniira ahari eki; nikyanjurwa kwonka ngu okaabaasa kureeba ku haabaire hariho ediini ibiri kandi ibiri zonka, kandi embi egyo ekabuga ensi yona.

Okuramya Ruhanga omwe kukahinduka okuramya baaruhanga baingi omuri Babulooni. Ekishuba kya sitaane n'enaama za sitaane bikaimuka byarwanisa amazima ga Ruhanga n'enaama za Ruhanga omu rurembo orwo. Sitaane buzima akahinduka ruhanga w'ensi egi kandi yaagyema abo abu yaabaire abeihabeihire, yaabakiririza

ngu buzima akaba ari Mukama.

Ediini y'okuramya baaruhanga baingi y'omuzigu ekatandika n'enyegeya ya tiriniiti. Kikabaho omu bwire obwo okwo omu biro bya ira obu ekiteekateeko kya “Ruhanga omwe omu baperesona bashatu” kyatandika. Ka nikitangaaza ngu abashomire eby'ediini baitu ab'omurembe eki tibakakyetegereze; nikireebeka gye nk'oku baishenkurubo baabehabehirwe Sitaane, nabo nibakikiririza omu baperesona bashatu omu Bwaruhanga. Ka tworekwe omwanya gumwe gwonka omu Byahandiikirwe ogurikwikiriza enyegeya egyo. T'eky'okutangaaza ngu obu abakomookire ahari Haamu baatoire omu muhanda gwabo gw'okuramya Sitaane okwabaire kurimu enteekateeka nkuru ya baaruhanga bashatu ngu tihariho n'omwe omuri abo abaakomookire ahari Sheemu orikwikiriza ekintu ekyo nari oine omugyenzo gw'okuramya ogurimu n'obu kyakuba ekishushani kyakwo? T'eky'okutangaaza ku Abaheburaayo baabaire baikiriza ngu, “Hurira, Israeli! Mukama Ruhanga waawe n'OMWE wenka,” ku haraabe haabaire hariho abaperesona bashatu omu Bwaruhanga? Abrahamu, omwijukuru wa Sheemu, omu Kutandika 18 akareeba Ruhanga OMWE wenka na baamaraika babiri.

Hati tiriniiti egi ekaba neeyorekwa eta? Ekaba neeyorekwa omu kiine enshonda ishatu ezirikwingana nk'oku erikworekwa omuri Rooma ebiro ebi. N'eky'okutangaaza, Abaheburaayo bakaba bataine kiteekateeko nk'ekyo. Hati ohikire n'oha? N'Abaheburaayo nari Abanyababulooni? Omuri Asia ekiteekateeko ky'okuramya baaruhanga baingi ekyo baaruhanga bashatu omuri omwe kikoorekwa omu kishushani ekibumbirwe kiine emitwe eshatu aha mubiri gumwe. Naayorekwa nk'abantu bashatu. Omuri India, bakakishanga omu mitima yaabo okumworeka nka ruhanga omwe omu miringo eshatu. Hati ebyo n'eb'ediini by'omurembe ebirungi. Omuri Japan hariyo Budha mukuru oine emitwe eshatu eri nk'ogu twaheza kushoboorora. Kwonka ekirikukirayo kushuuruura omuri byona n'ekyo ekirikworeka ekiteekateeko ky'obushatu bwa Ruhanga omu miringo eshatu: 1. Omutwe gw'omugurusi ogurikushushaniriza Ruhanga Isheboona. 2. Okwebumburika oku omuri ezo naama kwabaire nikumanyisa “Oruzaaro” kandi narwo orwabaire nirumanyisa Omwana ogwo. 3. Amapapa n'omukira gw'enyonyi (enkombe). Egi niyo yaabaire eri enyegeya ya Isheboona, Omwana n'Omwoyo Orikwera, abaperesona bashatu omu Bwaruhanga, tiriniiti yonyini. Noobaasa kureeba ekintu ekyo kimwe omuri Rooma. Hati ka ngarukye mbuuzo ogundi murundi, t'eky'okutangaaza ngu Sitaane n'abe abarikumuramya buzima bakaba baine amazima maingi agashuurwirwe okukira ishe w'okwikiriza, (Abrahamu) hamwe n'abajukuru be? T'eky'okutangaaza ngu abo abaramya Sitaane, bakaba nibamanya bingi ebirikukwata ahari Ruhanga okukira abaana ba Ruhanga? Hati ekyo nikyo abatendekirwe omu by'ediini ab'omurembe bagyezaho kutugambira obu batugambira ahari tiriniiti. Oijukye ekintu kimwe eki kyonka kwiha hati n'okugumizamu: ebihandiiko ebi bihikire kandi n'eki nakyo kihikire - Sitaane n'omunyahabusha kandi ishe w'ebishuba, kandi obwire bwona obu aija aine omushana oku guri kwona guba guri ekishuba. N'omwitsi. Kandi enyegeya ye ya tiriniiti ecwekyereze emitwe y'abantu baingi kandi neiya kucwekyereza kuhitsya obu Yesu ariija.

Nk'oku ebyafaayo birikugira tikiratwaire bwire buraingwa empinduka kuteebwaho omu kiteekateeko eki kya Isheboona n'Omwana n'Omwoyo Orikwera. Sitaane akabatwara entambo aha ntambo kubaiha aha mazima. Ekiteekateeko ky'Obwaruhanga ekyazaarukiremu hati kikaba kiri: 1. Isheboona otahwaho, 2. Omwoyo wa Ruhanga ojwaire omubiri omu MUNTU omukazi omuzaire. (Ekyo nikikureetera okuteekateeka?) 3. Omwana w'Obwaruhanga, ekijuma ky'okwo kujwara omubiri. (Oruzaaro rw'omukazi).

Kwonka Sitaane tamazirwe. We wenka takatungire okuramibwa, kureka akwine omu muhanda ogutateire. N'ahabw'ekyo naakyeyongyera kwiha abantu aha mazima naabatwara hare. Kurabira omu mibonano ye naashuururira abantu ngu obu Ruhanga isheboona mukuru otareebwa ateeta omu nshonga z'abantu, kureka akaguma abeetsirize, mbwenu omu mazima Ruhanga naabaasa kuramibwa omu kaceceko. Buzima nikimanyisa okumwehuza nk'oku kirikubaasika, kwaba kutari okumurugiraho kimwe. Enyegeya egi nabwo ekabuga ensi yoona, kandi na hati omuri India noobaasa kureeba ngu zaahekalu z'omuhangi mukuru, ruhanga oceceki, ni nkye munonga omu miringo ogurikutangaaza.

Obu kyabaire kitarikwetaagisa kuramya tata omuhangi, kikaba kiri eky'obuhangwa ngu okuramya kuhindikire “Omwana na Nyina” nk'ebintu by'okuramya. Omuri Misri hakaba hariyo okwegaita nk'okwo okw'omwana na nyina nikwetwa Isis na Osiris. Omuri India kukaba nikwetwa Isi na Iswara. (Yetegereze okwo kushushana kw'amaziina nakwo). Omuri Asia kukaba kuri Cybele na Deoius. Omuri Rooma na Bugriika nikwo kyabaire kiri. Kandi n'omuri China. Mbwenu, teekateeka aha kutangaara kwa bamwe aha bamiishani b'Abakatoriki Abaarooma ku baagiire omuri China haza bakashangayo Madonna n'Omwana n'amaranzi g'eizooba nigaruga aha mutwe gw'omwereere. Ekishushani ekyo kikaabaire nikibaasa gye kuhingaanisibwa n'ekyo ekiri omuri Vatikani okwihaho ahabw'entaaniso y'ebintu bimwe by'enshusha y'ahamaisho.

Hati kitushemereire kujumbura nyina owaabandize kandi n'omwana. Ruhangakazi nyina wa Babulooni owaabandize akaba ari Semiramisi owaabaire naayetwa Rhea omu mahanga ga burugwa-izooba. Akaba akiikiire omwana w'omwoyo omu mikono ye, n'obu araabe yaabaire ari omwereere, akaba naagambwaho kuba muraingwa, w'amaani, murungi kandi kukira munonga naarigirwa abakazi. Omuri Ezekiel 8:14 akaba naayetwa Tamuzi. Omu bahandiiki abashongokire akaba naayetwa Bacchus. Aha bantu ba Babulooni akaba naayetwa Ninus. Enshonga erikutuma yaayorekwa nk'omwereere ori omu mikono kandi akashuba akashoboororwa nk'omuntu mukuru kandi w'amaani maingi n'okugira ngu naamanywa nka “Iba - Omwana.” Kimwe aha byeterero bye kikaba kiri “Iba wa Nyina,” kandi omuri India ei ababiri abo barikumanywa nka Iswara na Isi, we (iba) naayorekwa nk'omwereere aha ibeere ry'omukazi we.

Okugira ngu Ninus ogu niwe Nimuroodi wa Baiburi nitubaasa kukihamya ahabw'okugyerageranisa ebyafaayo n'ebiri omu Kitabo ky'Okutandika. Pompeius akagira ati; “Ninus, omugabe wa Asiria, akahindura emitwarize y'okubaho eya ira eringaniire ahabw'ekyetengo ky'okukubuura ensi. NIWE YAABAIRE OW'OKUBANZA KUTENGA ORUGAMBA AHARI BATAAHI BE. Akasingura amahanga goona okuruga Asiria okuhika Libia ahakuba abantu aba bakaba batarikumanya oku barwana engamba.” Diodorus naagira ati, “Ninus akaba naakirayo kuba owa ira omu bagabe ba Asiria abagambirweho omu byafaayo. Nk'oku yaabaire omu buhangwa bwe naakunda engamba akatendeka abatsigazi baingi n'omujinya oku barwana engamba. Akegarurira Babulooni n'obu haabaire hatariho orurembo rwna rwa Babulooni.” N'ahabw'ekyo nitureeba ngu Ninus ogu akatandika kuba mukuru omuri Babulooni, yaayombeka Babeeli kandi yaakubuura Asiria, yaaba omugabe waayo, atyo yaagumizamu kushonshomera agandi matware mahango ei abantu baabaire batatendekirwe omu by'engamba kandi baabaire batwire omu muringo gw'obutoosha nk'oku Pompeius yaagambire. Hati omu Kutandika 10, nihagamba aha bugabe bwa Nimuroodi nihagira hati, “Ensi ei yaabandiizemu kuba omugabe ni Shinaari, eyaabaire erimu Babeeli, Ereki, Akadi na Kalune. Okuruga okwo yaagumizamu yaaza Ashuri, yaayombeka Nineeve, na . . . Kaala,” n'ezindi. Kwonka abahinduzi bakakora enshobi ahabw'okuhindura Ashuri nk'eiziina ahakuba n'ekikorwa, kandi omu Rukaludaaya nikimanyisa “kuhinduka ow'amaani.”

N'ahabw'ekyo ni Nimuroodi, bwanyima y'okuhindurwa ow'amaani (akatandikaho obugabe bwe n'okutendeka eihe ry'okubanza omu nsi eri yaatendekire omu myoga y'orugamba n'omu kutendeka okugumire omu by'okuhiiga) akagyenda yaarenga Shinaari n'eihe rye ry'amaani atyo yaasingura amahanga kandi yaayombeka endembo ezo nka Nineeve, eyaamwetereirwe, ahakuba n'eriizooba ekicweka kihango ky'amatongo g'orurembo orwo nikyetwa Nimuroodi!

Obu twaheza kujumbura Ninus eki yaabaire ari, hati kitushemereire kujumbura ishe eki yaabaire ari. Okurugiirira omu byafaayo akaba ari Bel owaatandikire Babulooni. (Hati n'eky'okwetegyerezebwa hantu ngu Bel akarutandika omu muringo gw'okugira ngu akatandikaho egi nkora yoona, kwonka n'omutabani, Ninus, owaatandikire kandi niwe yaabaire omugabe w'okubanza n'ebindi). Kwonka okurugiirira omu Byahandiikirwe, ishe wa Nimuroodi akaba ari Kuushi, “Na Kuushi yaazaara Nimuroodi.” Eki tikwo kiri kwonka kureka nitushanga ngu Haamu akazaara Kuushi. Hati, omu mitwarize y'Abanyamisri Bel akaba naayetwa Hermes, kandi Hermes nirimanyisa, “MUTABANI WA HAAMU.” Kurugiirira omu byafaayo Hermes akaba ari nabi mukuru w'ebishushani ebirikuramibwa. Akaba ari omuvunuuzi wa baaruhanga. Erindi Iziina eri yaabaire naayetwa rikaba riri Mercury. (Shoma Ebyakozirwe 14:11-12).

Hyginus naagamba eki ahari ruhanga ogwo owaabaire naamanywa omu maziina agatarikushushana nka Bel, Hermes, Mercury n'agandi ati, “Okumara obwire bwingi abantu bakatuura ahansi y'obutegeyeki bwa Yove (ti Yove w'Abarooma, kureka Yehova w'Abahaburaayo owaabaire ariho ebyafaayo by'Abarooma bitakabaireho) hatariho ndembo kandi hatariho n'ebiragiro, kandi boona nibagamba orurimi rumwe. Kwonka ahanyima ya Mercury ogwo (Bel, Kuushi) kuvunuura engambo z'abantu (kurugiirira aho omuvunuuzi naayetwa Hermeneutes) omuntu ogwo akabaganisa amahanga. Bwanyima okutaikirizana kwatandika.” Nikireebeka okuruga omuri eki ku Bel nari Kuushi, Ishe wa Nimuroodi omu kutandika yaabaire ari omwebembezi w'abagomi owaayebembeire abantu kubaiha ahari Ruhanga w'amazima atyo akeezirikisa abantu “kuvunuurira baaruhanga” okutwara ediini y'omuringo ogundi. Akabeezirikisa okugyenda omu maisho n'omunaara ogu omutabani we yaayombekire buzima. Okwezirikisa oku nikwo kwareetsireho okuburabuzibwa n'okubaganisamu abantu, ekyarugiremu yaaba “omuvunuuzi kandi n'orikuburabuza.”

N'ahabw'ekyo, Kuushi, akaba ari ishe w'entwaza y'okuramya baaruhanga abarengire ahari omwe kandi abantu ku baakozirwe baaruhanga abantu, we omu mazima, akahinduka ishe wa baaruhanga. Hati Kuushi akaba naayetwa Bel. Kandi Bel omu migane y'Abarooma akaba ari Janus. Ateirwe ekishushani aine obuso bubiri kandi akaba agyenda aine enkoni ei yaakoreise kusingura kandi “n'okutaataanisa” abantu. Ovid naahandiika ngu Janus akeegambaho ngu, “aba ira bakaanyeta Akajagararo.” N'ahabw'ekyo nitushanga ngu Kuushi ogwo owa Baiburi, omugomi owaabandize kurwanisa enyikiriza ya Ruhanga omwe akaba naayetwa Bel, Belus, Hermes, Janus, n'agandi maziina omu bantu b'emiringo mingi aba ira. Akaba ayegambaho nk'orikureetera okushuuruurirwa n'okushoboorora aha bantu okuruga ahari baaruhanga. Omu kukora ekyo akatuma ekiniga kya Ruhanga kyataataanisa abantu, ekyareetsire okwebaganisamu n'akatabanguko.

Hati ahu twahika aha twaherize kureeba ahu enyikiriza ya baaruhanga baingi yaarugire. Kwonka waayetegyereza ku nabwo twaboine ahu kigambirwe aha mushaija orikwetwa Kuushi owaahairwe ekyeterero kya “Ishe wa baaruhanga”? Waayetegyereza hantu eishomo rya ira ry'emigane ya ira, ngu baaruhanga beeyoreka n'abantu? Aho niho okuramya emizimu ya baishenkuru kuruga. N'ahabw'ekyo nitubaasa kushwijuma ebyafaayo kuzooro ebikwatiraine n'okuramya emizimu ya baishenkuru. Buzima, kyayorekirwe ku Kuushi yaatandikireho okuramya kwa baaruhanga bashatu okwa Ishe, omwana n'omwoyo. Baaruhanga bashatu abaabaire nibaingana boona. Kwonka akaba naamanya ebikwatiraine n'oruzaaro rw'omukazi orwabaire nirwija, n'ahabw'ekyo hakaba nihateekwa kubaho omukazi n'oruzaaro rwe kureebeka omu kishushani. Eki kikahikiirira obu Nimuroodi yaafa. Omukazi we, Semiramis akamuhindura ruhanga, atyo yaayehinduramu nyina w'omwana na nyina wa baaruhanga, (nk'oku buzima ekanisa enkatorika ya Rooma ehindwire Mariya ruhanga. Nibagira ngu akaba ataine kibi kandi ngu akaba ari

Nyina wa Ruhanga). We (Semiramis) akeeta Nimuroodi “zeroashta” ekirikumanyisa, “oruzaaro rw'omukazi

orwaraganisiibwe.”

Kwonka tikiratwaire bwire buraingwa kuhitsya obu omukazi yaatandikire kuteekateekwaho okukira omwana, kandi tikiratwaire bwire buraingwa omukazi ogwo niwe owaayorekirwe aribatsire enjoka ahansi y'ebigyere bye. Bakamweta “omugabekazi w'eiguru” batyo baamuhindura ruhanga. Ka nikishushana n'ebiro ebi obu Mariya, nyina wa Yesu, ateirwe ahaiguru kuhika aha kutafa kandi hati okutandika n'okwezi Okwamwenda 1964 orukiiko rwa Vatikani nirugyezaho kuha Mariya ekitiinisa eki ataine, ahakuba nibenda kumweta, “Mariya Omuteerani,” “Mariya Nyina w'Abaikiriza Boona,” nari “Nyina w'Ekeleziya.” Ku haraabe harabaireho okuramya kw'emizimu ya baishenkuru y'Ekibabulooni omu diini, n'ediini y'Ekelezia eya Rooma.

Okuramya emizimu ya baishenkuru tikwo kwatandikiire omuri Babulooni kwonka beitu nabwo okuramya eby'obuhangwa nimwo kwabaire kuri. N'omuri Babulooni omu baaruhanga baayorekirwe baine akakwate n'eizooba kandi n'okwezi, n'ebindi. Ekintu kikuru omu by'obuhangwa kikaba kiri eizooba eriine enkora zaaryo z'okuha omushana n'ekibiga kandi rikareebekyera abantu nk'omuriro ogurikwaka gw'ebumburikire ahaiguru omu mwanya. N'ahabw'ekyo ruhanga mukuru akaba ari kazooba nyamuhanga ou baayetsire Baali. Kaingi eizooba rikaba ryorekwa nk'enziga y'ekirimi ky'omuriro kandi omu bwire bukwe okwehinguririza ekirimi ky'omuriro hakareebekaho enjoka. Tikiratwaire bwire buraingwa kuhitsya obu enjoka yaabaire ekirikushushanisa eizooba kandi aha muheru ekaramibwa. N'ahabw'ekyo ekyetengo ky'omutima gwa Sitaane kihakikiirira omu bwijwire. Akaramibwa nka Ruhanga. Ekitebe kye ky'obukama kyahamibwa. Abahuuku be baamwinamira. Okwo omuri Perugamo akaramibwa omu muringo gw'enjoka ehuriire. Omuti gw'Okumanya Oburungi n'Obubi, hati ogurikushushanisibwa omu muringo gw'enjoka ehuriire gukaba gutabeihabeihire Haawa wenka kureka n'abantu abarikukira obwingi.

Kwonka shi Perugamo ekaba eta entebe ya Sitaane Babulooni ku eraabe niyo yaabaire eri entebe? Eky'okugarukamu kandi nikigaruka kiba omu byafaayo. Babulooni ku yaanyagirwe Abameedi n'Abaperesi, omunyamurwa-omugabe, Attalus akahunga orurembo atyo yaaza Perugamo n'abanyamurwa be kandi n'eb'y'omubonano bya baaruhanga. Okwo akatandikayo obugabe bwe aheeru y'obugabe bwa Rooma, butyo bwakurira gye ahansi y'oburinzi bwa sitaane.

Ebi bibaire ebyafaayo bikyeho bifunziibwe by'ediini y'Ekibabulooni kandi n'okwija kwayo omuri Perugamo. Tihariho kubanganisa ebibuuzo bingi bitsigaire bitagarukirwemu kandi bingi munonga, tihariho kubanganisa, bikaabaire bigambirwe okutumurikira, kwonka eki tikigyendereirwe kuba eky'okwega ebyafaayo, kureka kigyendereirwe kuba eky'okutuhwera omu kwega Ekigambo.

OKUJUMIIRIRA

Okushuuruurwa 2:14-15, “Kwonka Nyine ebigambo bikye ebi ndikufa naiwe; okwo oineyo abarikwikiriza enyegyesa ya Balamu, owaayegyese Balaki kuta enkongi omu maisho g'Abaisraeli, ngu barye ebitambiirwe ebishushani ebirikuramibwa, kandi bashambane. Kandi hoono oine n'abandi abarikwikiriza enyegyesa y'Abanikolaiti (ekintu eki Ndikwanga).”

Omu Busingye obu obwa Perugamo Mukama naajumiirira enyegyesa ibiri ezi Ayanga. 1. Enyegyesa ya Balamu eyaareetsire okuramya ebishushani n'eb'y'okushiisha ebirengyesereize omuri Israeli ahari Baali Peori, kandi na 2. Enyegyesa y'Abanikolaiti, eyaabaire etari kindi kureka ebikorwa omu Busingye bwa Efeso. Gaita okujumiirira oku hamwe n'eky'okugira ngu Atwire naahamisiriza Perugamo nk'entebe ya Sitaane, kyanguhi munonga kandi kihikire kuhendera ngu omuringo gumwe nari ogundi ediini ya Babulooni yaaherize kujwanganana n'Obukristaayo.

Hati eki tikuteebereza kwonka kureka n'ekintu ekyabaireho omu byafaayo eki turikwija kuhamya n'okugarukayo omu byafaayo nk'omu mwaka gwa 36 A.D. kandi n'okwizira kimwe kuhika aha Rukiiko rwa Niika orwabaireho omu mwaka gwa 325. Abakristaayo (na munonga ab'obuzaarwa bw'Abayudaaya) ku baataataine hoono kuruga Yerusaalemu bakagyenda hoonahoono nibabuurira Engiri, okukira munonga omuri zaasinagogi. N'ahabw'ekyo omu myaka eshatu, nari nk'omu mwaka gwa 36 A.D. Engiri ekaba yaatwairwe Rooma Yuniasi na Anderoniiko, kurugiirira omu kitabo ky'Abarooma 16:7 abaabaire bari entumwa. Okwo omurimo gukagyenda gye kumara emyaka mingi okuhitsya obu entongane z'obutoosha z'Abayudaaya bonka na bonka zaaretaire omugabe Claudius kubabinga kuruga omuri Rooma. Abayudaaya ku baabingirwe kuruga omu rurembo orwo oruti rw'omugongo gw'ekanisa egyo nkye omu mazima rukahendeka. Obundi n'abakuru b'ekanisa bakaba bari Abayudaaya ekirikumanyisa bakagyenda. Obwo busyo bukaba nibuza kutareebererwa kandi obu Ekigambo kyabaire kitakahandiikirwe kubahabura kikaba nikiza kwanguha munonga obusyo obu obukye okuteishuka nari kushwekwa abatendekirwe omu by'ediini n'abapagaani b'ebiro ebyo. N'emishaga eshuugire eriyo neeshooba, kandi n'omwoyo gwa antikristo gurekwirwe, nitushanga omu byafaayo ngu ekanisa nkye egi omuri Rooma ekagarukira kimwe enyima, kandi yaatandika kutaho emigyenzo y'ekipagaani omu maziina g'Ekikristaayo.

Nk'oku obwire bw'okubingwa bwamazire emyaka 13, abatandiki, Yuniasi na Anderoniiko, tibaragarukireyo kuhitsya omu mwaka gwa 54 A.D. Teekateeka obusaasi obu baagizire okushanga ekanisa eine eziina ry'Ekikristaayo kandi kunu eri empagaani kubi munonga. Hakaba harimu zaalutaari omu kanisa ahu baabaire bata obubaane bakajaguza emigyenzo y'ekipagaani. Abeebembezi abaabaire batairwe omu kanisa egyo bakaba batarikubaasa kuhikwaho, n'ahabw'ekyo bakatandika ekanisa nsya na bakye abaabaire bagyerizeho kuguma bari

abeesigwa, nari Ekanisa ya Rooma eya Kabiri. Ruhanga omu mbabazi Ze akakorera omuribo omu bumanyiso n'eb'okutangaaza kuhitsya obu ekanisa ya kashatu yaatandikirwe. Kandi n'obu Ekanisa y'Okubanza yaabaire neejumwa ahabw'okuba empagaani kandi ETARI Nkristaayo omu kuramya kwayo terarekire eiziina ryayo kureka ekaguma eri kandi NA HATI EKIRI Ekanisa ya Rooma ey'Okubanza - Ekanisa Enkatorika ya Rooma.

Hati abarikukira obwingi omuriitwe baine ekiteekateeko kigwire ngu weena kandi na boona abeeyeta Abakristaayo nibaba ekimaasho kya sitaane kandi ekiraarugyemu gavumenti ebahiigye munonga. Kwonka tikwo kiri. Ekanisa y'okubanza egi ekaba etandikire kukura gye n'okukanya munonga etyo kuhitsya obu abagabe n'abakuru ba gavumenti b'emiringo etari emwe buzima baagishagikire ahabw'enshonga z'eb'obutegyeki. N'ahabw'ekyo abeebembezi b'Ekanisa y'Okubanza omuri Rooma ku baayeshangire nibashagikwa, bakatwara omugisha ogwo baakoresa gavumenti kurwanisa abaikiriza b'amazima kandi baashabisa amaani ku bahiigwa ku baraabe bataizire omu itsibikiro ryabo. Bishopu omwe nk'ogwo ow'ekania y'Okubanza ya Rooma akaba ari Anicetus owaabaireho omu kyasha kya kabiri kandi akaba ariho omu biro bya Polycarp. Ow'ekitiinisa Polycarp ku yaahuriire ngu Ekanisa Enkristaayo y'Okubanza ya Rooma ekaba eyejwangize omu migyenzo y'obupagaani kandi ngu ekaba esiisire amazima g'Engiri, akazayo kubeeshengyereza ngu bahindukye. Akabareeba nibajumara

omu maisho g'ebishushani ebirikwetererwa amaziina g'entumwa n'abarikwera. Yaabareeba nibahemba etabaaza kandi nibootsya obubaane ahari rutaari. Akabareeba nibajaguza Okuhingurwaho oku baayetsire Paasika, ahu baabaire baimutsya omugati ogwebumburikire ogwabaire niguhaiza ekitiinisa kazooba nyamuhanga, reero bashuka viinyo nk'empongano ahari baaruhanga. Kwonka ow'ekitiinisa omugurusi ogu owaabaire agyenzire orugyendo rwa mailo 1500 tarabaasize kuzibira okugwa kwabo. Ruhanga akagamba naamurabiramu obu yaabaire naaza kugyenda ati, “Efuraimu ayehongyere ebishushani ebirikuramibwa; mumurugyeho.” Hosea 4:15. Polycarp taragarukireyo obundi.

Owaakuratsire Anicetus akaba ari bishopu mubi wa Rooma orikwetwa Victor. Akatandikaho n'amagyenye g'ebiro bikuru g'ekipagaani maingi hamwe n'emigyenzo omu Kanisa y'Okubanza, kandi nabwo yaagyendagyenda naagyezaho oku arikubaasa kusoonasoon amakanisa g'Abakristaayo ab'amazima okugataasyamu ebiteekateeko nibyo bimwe. Bakaba batarikubaasa kukora nk'oku yaabashabire n'ahabw'ekyo akasoonasoon abakuru ba gavumenti kugira ngu bahiiganise abaikiriza, nibabatwara omu mbuga z'ebiragiro, nibabaroha omu bihome nangwa na baingi baasharirwa orubanja rw'okufa. Eky'okureeberaho nk'ekyo ky'ebikorwa bye bibi nikishangwa omu byafaayo ahu omugabe Septimus Severus yaashendashenzirwe Callistus (munywani wa Victor) kwita abantu 7000 ahari Tesalonika ahabw'okuba abaikiriza b'amazima aba bakaba bajaguza Okuhingurwaho kurugiirira ahari Mukama Yesu beitu atari okurugiirira aha ndamya y'emandwa Astarte.

Omuzaabibu gw'ebishuba gukaba gwatandikire kugira ekiniga kurwanisa Ruhanga ohuriire kurabira omu kwita entoore, nk'oku na ishenkurugwo, Kaini, yaakoziye, kwita Abeeli.

Ekanisa y'amazima ekaguma neegyezaho kugira ngu Ekanisa y'Okubanza eyeteise. Kwonka terabaasize. Ekeeyongyera omu buhango n'omu kuturira abandi. Ekatanidikaho ehururu ehamire y'okwiha obwesigye omu mbibo y'amazima. Bakeegambaho ngu bo kandi bo bonka nibo baabaire bari abajwekyerwa b'amazima ba Mukama Yesu Kristo, kandi baayehimbisa n'eky'okugira ngu nibo kanisa eyaibandize omuri Rooma, kandi ngu bo bonka nibo kanisa y'Okubanza. Buzima kwo bakaba bari Ekanisa y'Okubanza, kandi BUZIMA NIBO.

N'ahabw'ekyo omu bwire bw'obusingye bw'ekania ya kashatu egi twine amakanisa abiri agarikwetererwa eiziina rimwe kwonka gaine rwango mbi erikugataanuura. Emwe erugire aha mazima, yaayehongyera ebishushani ebirikuramibwa kandi teine magara omuriyo. Eyekozire haiburiidi kandi obumanyiso bwa rufu, (butari bw'amagara), bugikuratiire. N'ey'amaani eine abashomi baingi. Neekundwa ensi. Endiijo kanisa n'akabiina kakye akarikuhiigwa. Kwonka nikakuratira Ekigambo, kandi n'obumanyiso nibukareebwamu. Abarwaire nibakira n'abafu nibazooka. Ehuriire eine Amagara n'Ekigambo kya Ruhanga. Terikukunda amagara gaayo, kureka eramatira aha iziina Rye n'okwikiriza Kwe nangwa n'okuhitsya aha kufa.

N'ahabw'ekyo okuhiigwa kw'akabi munonga kw'abategyeki ba Rooma kukagwera abaikiriza b'amazima okuhitsya obu Konsitantiini yaatandikire kutegyeka akaha ediini obugabe bw'okuramya. Nikireebeka ku hariho enshonga ibiri ezaatumire obugabe obu bwaheebwa. Eky'okubanza abagabe barungi abatari bamwe bakaba bataikiriize okuhiiganisa abaikiriza b'amazima, kwonka ku baagyenzire nibafa, baakuratwa abo abaitsire Abakristaayo. Okuhiigwa kukahingurana munonga okuhitsya obu aha muheru kutaragizire makuru reero abantu bakakwatwaho ngu Abakristaayo bashemereire kurekwa. Enshonga ya kabiri kandi erikukurayo oburungi ehandikirwe eri ngu Konsitantiini akaba aine orugamba rugumire oru yaabaire ayorekyereire omu kutegyeka obugabe. Ekiro kimwe ari omu kirooto akareeba omusharaba ogurikwera gwamuza omu maisho. Yaateekateeka ngu aka kakaba kari akamanyiso ahariwe ngu kuri Abakristaayo bamushabira obusinguzi, akaba naija kusingura orugamba. Yaabaraganisa obugabe bw'okuramya kyabaho akasingura. Akasingura kandi obugabe bw'okuramya bwaheebwa omu kiragiro kya Nantes omu mwaka ogwa 312 A.D.

Kwonka obugabe obu bw'okutahiigwa kandi n'okufa tiburabaire bwo buzima nk'oku kyabandize kureebeka. Konsitantiini hati niwe yaabaire omuhwezi. Nk'omuhwezi ekigyendererwa kye kikaba kirikukira eky'orikureeba kwonka, ahakuba akacwamu ngu ekanisa ekaba neeyetenga obuhwezi bwe omu mikorere yaayo. Akaba yaabareebire nibahakanisana omu nshonga zitari zimwe, emwe omurizo eyaabaire ekwatsire ahari Arius, Bishopu

wa Alexander, owaayegyeise abakuratsi be ngu Yesu akaba atari Ruhanga buzima kureka ekihangirwe eky'ahansi kakye ekyahangirwe Ruhanga. Ekanisa y'Oburengyerwa-izooba ekaba eine ekiteekateeko ekihindikireho, erikwikiriza ngu Yesu akaba ari Ruhanga wenyini kandi nk'oku baagambire ngu akaba “naingana na Ishe.” N'enshonga nk'ezo, hamwe n'okutaahirirwa kw'emigyenzo y'ekipagaani omu kuramya, omugabe akeeta Orukiiko rwa Niika omu mwaka gwa 325 aine ekiteekateeko ngu akaba naija kureetera ebibiina byona kweteerana ahu baakubaasize kugorora ebi batarikwikirizana ho byabo, batyo bakahika aha kwetegyereza kumwe, kandi boona bakaba bamwe. T'eky'okutangaaza ngu n'obu eki kyatandikire na Konsitantiini tikirafiire kureka buzima kikiriho kihuriire n'eriizooba nikyetwa “Ekibiina ky'Amakanisa g'omu Nsi yona”? Kandi buzima ahu yaaremirewe kukihikiiriza, nikijja kuhikiirizibwa omu biro ebi kurabira omu nkora erikushagika okwegaita kw'amakanisa g'Abakristaayo.

Hati oku kwetaasya kwa gavumenti omu nshonga z'ekanisa n'ekintu ky'obushema ahakuba ensi teyetyereza amazima agashangwa omu Kigambo nari emitwarize y'ekanisa. Ahabw'enki, okucwamu kwonyini okwahinguziibwe n'orukiiko ku Arius yaabaire atahikire kukahindurwa omugabe ahanyima y'emyaka ebiri kandi kumara emyaka mingi enyegyesa egyo ey'ebishuba ekagyemwa omu bantu.

Kwonka eky'okugira ngu ekanisa na gavumenti bikaba nibiza kwegaita kikaba buzima kyamanyirwe Mukama kitakabaireho. Eziina eryo Perugamo nirimanyisa “okushwererwa kimwe.” Kandi kwo buzima gavumenti n'ekanisa bikaba bishwereine; eby'obutegyeki n'ediini bikaba byegaitsire hamwe. Abaana b'okwegaita hamwe okwo bakagumizamu kuba ebizaarwa ebirikukirayo obubi ebi ensi erareebire. Amazima tigabarimu, kwonka emihanda emibi yona eya Kaini (ekizaarwa ky'okubanza) ebarimu.

Gavumenti n'ekanisa tibiragaitsirwe empeta omu busingye obu kwonka, kureka ediini y'aba Babulooni ekagaitwa aha Kanisa y'Okubanza omu butongore. Sitaane hati akatunga omuhanda gw'okuhika aha Iziina rya Kristo atyo yaayemekwa aha ngoma nka Ruhanga omu kuramya. Ahabw'obuhwezi bwa gavumenti amakanisa gakahungura ebyombeko birungi ebyabaire birimu amatambiro ga maruburo ya mutare n'ebishushani by'abarikwera abaafiire. Kandi omu busingye obu bwonyini nimwo “enyamaishwa” y'omu Kushuuruurwa 13:3 eyaabaire ehutaaziibwe obw'okugiita (Obugabe bwa Rooma empagaani) yaagarukire ekaba ehuriire kandi ekatunga obushoboorozi “nk'Obugabe bwa Rooma Erikwera.” Rooma nk'eihanga eririkutegyeka eby'ensi ekaba emazirweho ebyayo bingi munonga kandi obwire butari bwa hare ekaba neza kubimarirwaho kimwe; kwonka hati kikaba kitaine nshonga ahakuba obutegyeki bwayo bw'ediini bukaba nibuza kugigumya ahaiguru y'ensi neetegyeyera omunda ahu yaabaire etarikuza kureebwa n'ab'aheru omu ki yaabaire neekora.

Reka nyorekye amazima g'Ebyahandiikirwe gonyini g'enshonga egi, ahakuba tindikwenda omuntu weena kuteekateeka ngu nimpeereza okushuuruurirwa okwangye ahabwangye - okwo okutarikushangwa omu Byahandiikirwe. Danieli 2:31-45, “Nyakusinga, ku ogiire kugira oti, waareeba ekishushani kihango. Ekyo kishushani rutaaba ekirikumurinkana kyarumbaara omu maisho gaawe, kandi okureebeka kwakyo kubaire nikutiinisa. Omutwe gw'ekyo kishushani gubaire guri ogw'ezaabu eshemeziibwe, ekifuba kyakyo n'emikono yaakyo biri eby'efeeza, enda yaakyo n'ebibero byakyo biri eby'emiringa, amaguru gaakyo gari ag'ekyoma, kandi ebigyere byakyo bibaire biri ekyoma n'eibumba. Ku obaire nookikyetegyereza, haatimbirayo eibaare, eritahigwirwe muntu, ryateera ebigyere by'ekyo kishushani eby'ekyoma n'eibumba, ryabyatagura; ahonaaho ekyoma, eibumba, emiringa, efeeza n'ezaabu byayatagurikira kimwe, byahinduka nk'omweziga gw'aha ihuuriro omu kyanda, omuyaga gwabituntumura, waashusha oti haaba hataine kiriho. Kwonka eryo ibaare, eryateera ekyo kishushani, ryahinduka orushozi ruhango, rwamara ensi yona. Ekyo nikyo kirooto; mbwenu twaza kushobororera omugabe amakuru gaakyo. Nyakusinga, omugabe w'abagabe, ou Ruhanga w'omu iguru yaahaire obugabe, obushoboorozi, amaani n'ekitiinisa, kandi akakuha abaana b'abantu, enyamaishwa z'omu ishwa n'amahungu g'omu mwanya, akakugira omutegyeki waabyo byona, ahu bituura hoona, - mbwenu niwe ogwo mutwe gw'ezaabu. Ku orirugaho, haryaimuka obundi bugabe oburikukirwa obwawe; bwanyima hakurateho obundi bugabe bwa kashatu obw'omuringa, butegyekye ensi yona. Kandi haryabaho obugabe bwa kana, obugumire nk'ekyoma, ahabw'okuba ekyoma kyatagura ebintu byona, kibicwa obusaasingo; nk'oku ekyoma kyatagura, nikwo n'obwo bugabe buryatagura obwo bwona, bukabucwa obusaasingo. Kandi nk'oku oreebire ebigyere n'enkumu zaabyo biri eibumba ry'omubumbi n'ekyoma, nikwo obwo bugabe buryebaganisamu; kwonka omuribwo haryabamu okuguma kw'ekyoma, nk'oku oreebire ekyoma kijwangizemu eibumba. Kandi nk'oku enkumu z'ebigyere zibaare ziri ekyoma kandi eibumba, nikwo n'obwo bugabe buriba; ekicweka kyabwo kiryaba ekigumire, n'ekindi kube ekirikwatwa busha. Kandi nk'oku oreebire ekyoma kijwangire n'eibumba, nikwo barishwerana, bakajwanga, kwonka tibariguma hamwe, nk'oku ekyoma kitajwanga na ibumba. Kandi omu busingye bw'abo bagabe Ruhanga w'omu iguru aryataho obundi bugabe, obutaricwekyerezibwa ebiro byona, kandi obutegyeki bwabwo tiburihungurwa rindi ihanga; kureka buryayatagura obwo bugabe bwona, bubumareho, kandi bwo buryagumaho, nk'oku oreebire eibaare ryatimbira omu rushozi, ritahigwirwe muntu, rikacwanyagura ekyoma, emiringa, eibumba, efeeza n'ezaabu. Ruhanga omukuru ashuuruuriire omugabe ebiribaho bwanyima. Ekyo kirooto n'eky'amazima, n'amakuru gaakyo tigarikubanganisibwa.” Omuri ebi hashuurwirwemu ebyafaayo by'amazima by'omu biro by'omu maisho ebitakahikiriziibwe, ebyaragwirwe ku biribaho omu nsi kuruga omu bwire bwa Danieli okuhitsya obu Yesu yaabaire naaza kwija akategyeka nk'Omwana wa Daudi. Nibumanywa “nk'Obwire bw'Abanyamahanga.” Omuribwo hakaba harimu ebicweka bina by'ebyafaayo ebyabaire nibimanywa ahabw'obugabe oburikutegyeka omuri buri kicweka: obw'aba Babulooni, Abameedi n'Abaperesi, Abagriika, Abarooma. Obukuru munonga kandi obwakizire kuba obwa ngambanyenka bukaba buri

obwa Babulooni obwabaire nibushushanisibwa n'omutwe gw'ezaabu. Obwakuratsireho omu kitiinisa bukaba obw'Abameedi n'Abaperesi nk'oku ebyafaayo birikworeka obwabaire bwine ekitiinisa kikye kandi bukaba nibushushanisibwa n'ekifuba, n'emikono y'efeeza. Bwanyima hakakurataho obusingye bw'Abagriika obu omugabe waabwo yaabaire naakirayo obukugu omu beebembezi boona b'eb'amahe abu ensi eramanyire n'ahabw'ekyo bukaba nibushushanisibwa nk'enda n'ebibero by'omuringa. Bukaba bwine ekitiinisa kikyeho okukira buriya bubiri obwabubandiize. Aha muheru hakakurataho obugabe oburikuhereeruka obwabaire buri Obugabe bw'Abarooma nibushushanisibwa n'amaguru n'ebigyere. Kwonka n'obu obugabe obwabandize bwabaire nibushushanisibwa n'ebiyoma eby'omu itaka ebishemeire (ezaabu, efeeza, n'omuringa ebishemeire) obugabe obu oburikuhereeruka bukaba buri ekyoma kishemeire omu maguru honka, ahakuba ku kyahikire aha bigyere kyaba orujwangye rw'ekyoma n'eibumba, kandi ekyoma n'eitaka tibirikubaasa kujwanga haza bikarugwamu ekintu ekihamire kandi ekigumire. Kwonka eki tikwo kiri kwonka, kureka ekirikurirayo kutangaaza, obugabe obu obw'aha muheru (obw'Abarooma) bukaba nibuza kuhangaara omu "mbeera z'orujwangye" zaabwo ez'omutaano kugumizamu kuhitsya obu Yesu arigaruka.

Obugabe bw'Abarooma obu obw'ekyoma (ekyoma nikimanyisa obushoboorozi n'amaani maingi agarikucwekyereza abarikuhakanisa) bukaba buri obw'okukorwamu ebicweka bibiri bikuru. Kandi buzima kikabakwo ahakuba obugabe bukeebaganisamu ebicweka bibiri - Burugwa-izooba na Burengyerwa-izooba.

Bwombi bukaba buri obw'amaani, nibusheeniyagura byona ebiri omu maisho gaabwo.

Kwonka nk'oku ekitiinisa n'amaani g'obugabe bwona biremwa, butyo obugabe obu bukatandika nabwo kugwa. N'ahabw'ekyo Rooma ekagwa. Obugabe bwa Rooma empagaani bukaba butakiri kyoma. Ekasheeniyuka. Ekahutaara obw'okugiita. Rooma hati ekaba etakibaasa kutegyeka. Bikaba bihweire. Nikwo ensi yaateekateekire. Kwonka ensi ka yaabaire egwire, ahakuba ogwo mutwe (Rooma) n'obu gwabaire guhutaire gukaba gutahutaire obw'okugiita. (Okuvunuura kwa Wuest, kw'Okushuuruurwa 13:3 nikugira kuti, "Kandi gumwe aha mitwe yaayo gukareebeka nk'ogwabaire guhutaaziibwe obw'okugiita, omumiro gushazirwe munonga. Obuhuta obwakugiitsire bukakira. Kandi ensi yoono yaakuratira Enyamaishwa y'omu lhamba neetangaara.")

Abantu nibareeba Rooma. Bareeba eihanga rya Italia. Kandi ku baba nibareeba tibeetegyereza ngu Rooma n'ensharo zaayo ezihamire ahu paapa aine omwanya oguriho ogu arikutegyeka omu bwijwire n'eihanga eriri omu rindi ihanga, kandi eine abajwekyerwa kandi etunga abajwekyerwa. ROOMA Y'OBWA PAAPA Y'OBUKRISTAAYO BW'EBISHUBA (nangwa neeyetwa orurembo orutahwaho - ka n'okurogota) HATI KURABIRA OMU DIINI NEETEGYEKA N'OKUBAASA KWINGI OKUKIRA OBU ROOMA EMPAGAANI YAABAIRE NEETEGYEKYESA AMAANI G'EKYOMA KITAJWANGIRE. Rooma ekagaruka yaatunga amaani obu Konsitantiini yaagaita ekanisa na gavumenti kandi akashagika okwegaita okwo n'okugyema. Omwoyo ogwakoreise Rooma empagaani nigwo mwoyo gumwe hati ogurikukoresa Rooma Enkristaayo y'ebishuba. Noobaasa kureeba ngu ekyo nikwo kiri ahabw'okuba hati noomanya ngu obugabe bwa kana tiburarugireho; bukahindikaho omu ndeebeka yaabwo ey'aheru yonka.

Orukiiko rwa Niika ku rwahaire ekanisa amaani g'eb'y'obutegyeki bwa Rooma, okashusha oti hakaba hatariho bugarukiro ahu Ekanisa Enkristaayo y'Okubanza egi yaabaire neeza kuherera. Eiziina, Omukristaayo, omu kubanza eryareetsireho okuhiiganisibwa, hati rikahinduka ryaba eiziina ry'abo abarikuhiiganisa. N'omu busingye obu obu Augustine owa Hippo (354-430) yaataireho ekiragiho ngu ekanisa eshemereire kandi NEETEEKWA kukoresa amaani kyaba nikiyetaagisa okugarura abaana baayo omu itsibikiro, kandi ngu kikaba nikiikirizana n'Ekigambo kya Ruhanga kwita abarikureeta okwecwamu ebicweka omu kanisa n'abarugire aha nyikiriza y'ediini yaabo. Omu kuhakanisana kwe n'ab'enyikiriza y'Oburikwera (Donatists) akahandiika ati, "Buzima ni kirungi munonga kugira ngu abantu bashemereire kwebemberwa kuramya Ruhanga kurabira omu kwegyesa kukira kugira ngu bashemereire kugyemwa aha kintu ekyo ahabw'okutiina kufubirwa nari obusaasi, kwonka ekyo tikirikumanyisa ngu ahabw'okuba omuhanda gw'okubanza gureeta abantu barungi munonga, n'ahabw'ekyo abo abatarikugwetaho bashemereire kurekwa. Ahakuba baingi kibahwereire (nk'oku twaheza kuhamya kandi obutoosha nituhamya ahabw'ebi turabiremu) omu kubanza baagyemwa kurabira omu kutiinisibwa nari obusaasi, kugira ngu bwanyima babaase kwikiriza ahabw'okwegyesibwa, nikwo babaase kukuratira ebikorwa ebi baherize kwega omu bigambo." "N'obu abo abarikwebemberwa okuhikire na rukundo bari baingi munonga, abo abarikugororwa n'okutiina ni baingi munonga kukiraho buzima. Ahakuba n'oha shana owaakubaasa kutukunda okukira Kristo, Owaahaireyo amagara Ge ahabw'entaama? Kwonka ahanyima y'okweta Petero n'ezindi ntumwa ahabw'Ebigambo Bye byonka, ku yaahikire aha kweta Paulo, Taramugyemesereize n'eiraka Rye ryonka, kureka akamuhonda ahansi n'amaani Ge; kandi kugira ngu Abaase kureeta n'amaani omuntu ogwo ogwirwe kubi munonga omu mwirima gw'obutaikiriza, okwetenga omushana gw'omutima, Akabanza yaamuhumya amaisho. Mbweni ahabw'enki Ekanisa yo etarikukoresa amaani omu kugyema abaana baayo ababuzire kugaruka? Mukama We wenka akagira ati, 'Gyenda omu mihanda n'omu buhanda oburikuraba omu bikaari, ogyeme abantu baije.' Ahabw'enshonga egi obushoboorozi obu Ekanisa etungire obutairweho Ruhanga omu bwire bwabo obuhikire, kurabira omu mitwarize y'ediini n'okwikiriza kw'abagabe, bibe ekikoreso eki abo abarikushangwa omu mihanda n'obuhanda oburikuraba omu bikaari - abari omu b'enyegyesa ezirikuhabisa n'abarikwecwamu ebicweka omu Kanisa - barikugyemwa kutaahamu, n'ahabw'ekyo barekye kureeba enshobi omu kubagyema."

Eiriho ry'okusheesha eshagama rikaba niryeyongyera munonga. Omuzaabibu gw'ebishuba omuri Spain hati gukakoresa Omugabe Maximus kwegaita omu kurwanisa abaikiriza b'amazima abaabaire baine Ekigambo

n'obumanyiso n'eby'okutangaaza omuribo. Ahabw'ekyo bamwe aha ba Priscillian bakareetwa Bishopu Ithacus omuri Treves (385). Akabatabaariza ahabw'eby'oburogo n'eby'obushambani kandi baingi baitwa. Martini owa Tours, na Ambrose owa Milan bakahakanisa eki, kandi baayeshengyereza ngu okuhiiganisibwa kurekyere aho byaba ebya busha. Okuhiiganisibwa ku baakugumiizemu Babishopu babiri aba bakanga kukwatanisa na Bishopu Hydatius n'abandi abari nkawe. Eky'okutangaaza kiri ngu Sinoodi omuri Treves ekaba neesiima okwita okwo.

Okwiha obwire obu n'okugumizamu, na munonga omu Busingye bw'Omwirima bwona, nitwija kureeba abazairwe omu mubiri nibahiiganisa kandi nibacwekyereza abazairwe omu Mwoyo, n'obu bombi barikugira ngu Ishebo n'omwe nk'oku kyabaire kiri ahabwa Ishimaeli na Isaaka. Omwirima gw'okusiisikara kw'eby'omwoyo nigwija kweyongyera n'omushana gw'amazima gwa Ruhanga gukyendeere okuhitsya obu omu mubaro gurikwija kuguma nigwaka niguhwerera. Kwonka okuraganisa kwa Ruhanga kuryaguma kuri okw'amazima, “Omushana ogwo gujwa omu mwirima, kandi omwirima tigwine eki gurikubaasa kugukoraho.”

Hati n'okuhitsya hati tinkoorekire egyo nshonga omu byafaayo ei naaraganiise kugambaho, niyo, okujwanganana kw'ediini ya Nimuroodi n'ediini y'Ekikristaayo. Nimwija kwijuka ngu Attalus akahunga yaaruga Babulooni yaaza Perugamo atyo yaatandikayo obugabe bwe okwo ei Obugabe bwa Rooma bwabaire butahika. Bukeyongyera omu maani kumara emyaka, nibukuzibwa ruhanga w'ensi egi. Attalus akakuratwa okwihaihana kw'abanyamurwa-abagabe okuhitsya omu butegyeki bwa Attalus III obu ahabw'enshonga ezirikumanywa Ruhanga orikwemariirira wenka obugabe bwe akaburaga Rooma. Bwanyima Kaisaari Julius yaatwara obugabe bwombi obw'ensi n'obw'omwoyo ahakuba akahinduka Pontiff Maximus w'ediini ya Babulooni n'ahabw'ekyo yaaba omunyamurwa-omugabe. Ekitiinisa eki kikagumizamu n'aha bagabe abaakuratsireho kuhitsya omu bwire bwa Maximus III owaakyangire. Kurugiirira aha byafaayo bya Stevens nibwo obwo obu paapa yaatwara obwebembezi obu omugabe yaayangire kandi n'eriizooba hakiriho pontiff omu nsi, kandi buzima ni Pontiff Maximus. Naajwara ekirunga ky'enshonda ishata kandi naatwara omuri Rooma. Kandi n'omu Kushuuruurwa 17 Ruhanga takigamba ahari Perugamo nk'ekitebe kya Sitaane n'obu kwakuba kugamba ngu niyo Sitaane atwara. Ngaaha, omwanya gw'ekitebe ky'obukama tigukiri omuri Perugamo, kureka ni Babulooni ey'OMUBONANO. Tikiri omuri Babulooni kureka omuri Babulooni ey'OMUBONANO. Kiri omu rurembo oruri aha bubungo mushanju. Omwebembezi waarwo ni antikristo ahakuba atwara n'amaani omwanya gwa Kristo kandi Kristo wenka ariwe muteerani kandi We wenka ariwe orikubaasa kusaasira ebibi. Eego, Pontiff Maximus arinaitwe ebiro ebi.

ENYEGYESA Y'ABANIKOLAITI

Kushuuruurwa 2:15, “Kandi hoona oine n'abandi abarikwikiriza enyegyesa ey'Abanikolaiti, (ei Nyanga).”

Noija kwijuka ku nyorekire omu Busingye bwa Efeso nti ekigambo, Nikolaiti, nikiruga omu bigambo by'Orugriika bibiri: Nikao ekirikumanyisa okusingura, kandi Lao ekirikumanyisa abakuratsi. Nikolaiti nikimanyisa, “okusingura abakuratsi.” Hati ahabw'enki eki kiri ekintu kibi munonga? Ni kibi munonga ahabw'okuba Ruhanga takataga ekanisa Ye omu mikono y'obwebembezi obutoorainwe obukora n'enteekateeka y'eby'obutegeyeki. Ataire ekanisa Ye omu bureeberezi bw'abantu abatairweho Ruhanga, baijwire Omwoyo, abatwire amagara g'Ekigambo abeebembera abantu omu kubariisa Ekigambo. Tataaniise bantu okubata omu bibiina kugira ngu abantu baingi ab'ahansi munonga beebemberwe n'obunyamurwa oburikwera. N'eky'amazima ngu obwebembezi niburagiirwa kuba oburikwera, kwonka kandi n'abantu boona nikwo barikuragiirwa kuba. Ekindi, tihariho mwanya omu Kigambo ahu abanyamurwa nari abaheereza nari abari nk'abo barikuteerana Ruhanga n'abantu, n'obu gwakuba omwanya ahu barikutaanisibwa omu kuramya Mukama kwabo. Ruhanga naayenda boona hamwe Kumukunda n'Okumuheereza. Obunikolaiti nibushiisha ebyo biragiro kandi omu mwanya gw'ebyo butaanisa abaheereza n'abantu kandi bukora abeebembezi abakama omu mwanya gw'okuba abaheereza. Hati enyegyesa egi buzima ekatandika nk'ekikorwa omu busingye bw'okubanza. Nikireebeka omurabanamu gukaba guri omu bigambo bibiri: “abakuru b'ekanisa” (presbyters) “n'abareeberezi” (baabishopu). N'obu Ebyahandiikirwe byoreka ngu hariho abakuru b'ekanisa baingi omuri buri kanisa, bamwe bakatandika (Ignatius omwe omuribo) kwegyesa ngu ekiteekateeko kya bishopu kikaba kiri ekirikukira byona obukuru nari obushoboorozi hamwe n'obutegeyeki ahaiguru y'abakuru b'ekanisa. Hati amazima g'ekintu eki gari ngu ekigambo “mukuru w'ekanisa” nikimanyisa eki omuntu ari, kunu ekigambo “bishopu” kirikumanyisa ofiisi y'omuntu ogwo. Omukuru w'ekanisa n'omushaija. Bishopu ni ofiisi y'ogwo mushaija. “Omukuru w'ekanisa” buriijo kitwire kandi buriijo nikiija kuguma nikimanyisa emyaka y'omushaija amazire omuri Mukama. Ni mukuru omu kanisa, t'ahabw'okuba atoorainwe nari atairweho emikono, n'ebindi, kureka n'ahabw'okuba NI MUKURU OMU MYAKA. Amazire obwire bwingi munonga, atendekirwe, ti musya, naayesigwa ahabw'ebi arabiremu kandi n'obuhame bw'okuguma ayemereire omu bumanyi bw'Obukristaayo bwe. Kwonka ngaaha, baabishopu tibarahamiire aha baruha za Paulo, kureka buzima bakaza omu by'obwire obu Paulo yaayeta abakuru b'ekanisa okuruga Efeso kuza Mileeto omu Byakozirwe 20. Omu mushororongo gwa 17 Ebyahandiikirwe nibigamba biti, “abakuru b'ekanisa” bakeetwa reero omu mushororongo gwa 28 nibetwa “abareeberezi” (baabishopu). Kandi baabishopu aba, (tihariho kubanganisa baine enteekateeka y'eby'obutegeyeki kandi baine ekihika ky'okwenda obutegeyeki) bakaguma bakihamize ngu Paulo akaba naamanyisa ngu “abareeberezi” bakaba nibakira omukuru w'ekanisa omu kicweka eki arimu aine obushoboorozi omu kanisa ye yonka. Aharibo bishopu akaba ari ogwo oine obushoboorozi obweyongyereho ahaiguru y'abeebembezi baingi b'amakanisa g'emanyanya ei barimu. Ekiteekateeko nk'ekyo kikaba kitari ky'Ebyahandiikirwe n'obu kyakuba eky'ebyafaayo, beitu kandi n'omushaija w'ekyemerero nk'ekya Polycarp akegamira entwaza nk'egyo. N'ahabw'ekyo, ekyo ekyatandikire nk'ekikorwa omu

busingye bw'okubanza kihakindurwa enyegyesa buzima kandi nikwo kiri n'eriizooba. Baabishopu nibakigira ngu baine obushoboorozi bw'okutegeyeka abantu kandi bakabakoresa nk'oku barikwetenga, nibabata ahu barikweyendera omu buheereza. Eki nikihakanisa obwebembezi bw'Omwoyo Orikwera Owaagizire ati, "Muntooranire Barunaba na Saulo, bakore omurimo ugu mbeeteire." Eki nikirwanisa Ekigambo kandi ni antikristo. Matayo 20:25-28, "Yesu yaabeeta, yaabagira ati: Nimumanya abakuru b'abanyamahanga ku babategyekyesa eikama, n'abakuru baabo bakabaragiiza obushoboorozi; kwonka omuriimwe tikwo kiriba; weena orikwenda kuba mukuru omuriimwe, ashemereire kuba omuheereza waanyu; n'orikwenda kuba ow'okubanza omuriimwe ashemereire kuba omuhuuku waanyu; nk'Omwana w'omuntu oku ataizire kuheerezibwa, kureka okuheereza abandi, n'okuhayo amagara Ge okucungura baingi." Matayo 23:8-9, "Kwonka imwe mutaryetwa Rabi, ahabw'okuba Omwegyesa waanyu n'omwe (kandi niwe Kristo), kandi naimwe mwena muri eishe-emwe. Kandi mutaryeta omuntu weena ow'omu nsi Shoimwe; ahabw'okuba mwine Shoimwe omwe Ori omu iguru."

Okwenda ngu eki nkyorekye butunu okukiraho, ka nshoboorore Obunikolaiti omu muringo ugu. Noijuka ngu omu Kushuuruurwa 13:3 nihagira hati, "Ogumwe aha mitwe yaayo nooshusha oti gukaba gwine obuhuta obw'okugiita; kwonka obuhuta obwo bukakira; ab'ensi yoona baagikurata nibagitangaarira." Hati nitumanya ngu omutwe ogwahutaziibwe gukaba guri Obugabe bwa Rooma empagaani, egyo nsi nkuru y'eby'obutegeyeki. Omutwe ugu gukagaruka gwaimuka "nk'obugabe bw'eby'omwoyo bw'Abakatorika ba Rooma." Hati eki okireebe n'obwegyendesereza. Rooma y'eby'obutegeyeki empagaani ekakora ki ekyabaire kikuru ky'obusinguzi bwayo? Rooma, "ekabaganisa kandi yaasingura." Egyo niyo yaabaire eri embibo ya Rooma - baganisa reero osingure. Amaino ga Rooma g'ekyoma gakatagura gaashonshomera. Ou yaabaire etaagura ekashonshomera akaba atarikubaasa kugaruka kwimuka nk'obu yaacwekyereza Carthage kandi akagimiisheeramu omwonyo. Embibo y'ekyoma egyo ekagigumamu obu yaimuka nk'ekanisa y'ebishuba, kandi entwaza yaayo egumire eri emwe - baganisa reero osingure. Obwo nibwo Bunikolaiti kandi Ruhanga naabwanga.

Hati n'eky'ebyafaayo kirikumanywa gye ngu obuhabe obu ku bwashensheire omu kanisa, abantu bakatandika kuhakanira ofiisi y'obwa bishopu n'ekyarugiremu obukuru obu bukaba buheebwa abarikukizayo obwegyese kandi abatunguukire omu bintu kandi abantu abarikufa aha by'obutegeyeki. Okwetegyereza kw'obuntu hamwe na zaapuroguramu bikatandika kuza omu mwanya gw'Obwengye bwa Ruhanga kandi n'Omwoyo Orikwera akaba atakitegyeka. Buzima eki kikaba kiri kibi munonga, ahakuba baabishopu bakatandika kukigumya ngu kikaba kitakyetaagisa omuntu kugira engyesho nungi z'Abakristaayo kugira ngu abuurire Ekigambo nari ayebebembere emikoro omu kanisa ahakuba zaasakaramento n'emikoro nibyo byabaire biri bikuru. Eki kikareetera abantu ababi (ababeihabeih) kutaagataagura obusyo.

Ahabw'okugira enyegyesa etairweho abantu y'okukuza baabishopu kubata omu mwanya ogutabahairwe omu Byahandiikirwe, entambo eyaakuratsireho ekaba eri ey'okubaha ebitiinisa omu matembezo ebyahendereire omu madaara g'ebitiinisa by'abakuru b'ediini; ahakuba omu bwire bukwe hakabaho ba acibishopu ahaiguru ya baabishopu na baakalidinaali ahaiguru ya ba acibishopu kandi omu bwire bwa Boniface owa kashatu hakaba hariho paapa ahaiguru ya boona, Pontiff.

Ekyarugire omu nyegyesa y'Abanikolaiti hamwe n'Obukristaayo kubugaita n'ebikorwa by'aba Babulooni kikaba nikiteekwa kuba eki Ezekieli yaareebire omu Shuura ya 8:10, "Naanye naataahamu; ku naagire kugira nti, naareeba ebishushani by'emiringo yoona y'ebirikwekurura ahansi, n'eby'enyamaishwa ezirikunugwa, n'eby'ebishushani byona ebirikuramibwa ab'enju ya Israeli, biteirwe aha kisiika embaju zoono." Okushuuruurwa 18:2, Yaagamba n'eiraka rihango ati: Orurembo orukuru Babulooni rugwire, rugwire! Ruhindikire obutaaho bwa baadaimoni, n'obweshereko bw'emyoyo yoona emibi n'obw'amahungu goona amabi agarikunugwa, ahakuba amahanga goona ganyweire viinyo y'okurigira okubi okw'orurembo orwo."

Hati enyegyesa y'Abanikolaiti egi, ekiragiro eki ekyahamire omu kanisa abantu baingi tikirabagyendeire gye ahakuba bakaba babaasa kushoma ebaruha zitari za buriijo nari ebihandiiko ebyegamiire Ekigambo bihandiikirwe omuntu orikutiina Ruhanga. Mbwenu ekanisa ekakora ki? Ekabinga abeegyesa abahikiriire kandi yaayotsya emizingo y'ebitabo. Bakagira bati, "Nikitwara obwegyese bw'omutaano kushoma n'okwetegyereza Ekigambo. Na Petero akagira ngu ebintu bingi ebi Paulo yaahandiikire bikaba bigumire kwetegyereza." Ekigambo ku kyaihirwe omu bantu, tikiratwaire bwire burainga abantu baatandika kuhurikiza eki omusaserdooti yaabaire naagamba kyonka, kandi n'okukora eki yaabagambira. Ekyo baakweta Ruhanga n'Ekigambo Kye Ekirikwera. Bakasingura ebiteekateeko n'amagara g'abantu batyo baabahindura abahuuku b'obusaserdooti bwa ngambanyenka.

Hati ku oraabe nooyenda obuhame ngu Ekanisa Enkatoriki neeyetenga amagara n'ebiteekateeko by'abantu, iwe hurikiza ekiragiro kya Theodosius II.

Ekiragiro kya Theodosius ky'okubanza

Ekiragiro eki kikashohozibwa ahonaaho ahanyima ye okubatizibwa n'Ekanisa y'Okubanza ya Rooma. "Itwe abagabe bashatu nitwenda ngu abantu baitu abu turikutegyeke baramatire kimwe aha diini ei Petero Orikwera yaayegyeise Abarooma, etwire erinzirwe omu bwesigwa n'emigyenzo kandi hati erikwaturwa paapa, Damasus owa Rooma, na Petero, bishopu wa Alexandria, omushaija w'oburikwera bw'Entumwa okurugiirira aha mitwarize y'Entumwa, kandi n'enyegyesa y'Engiri; ka twikiririze omu Bwaruhanga bumwe bwa Isheboona, Omwana, n'Omwoyo Orikwera, bw'ekitiinisa ekirikwingana omuri Tiriniiti Erikwera. Nituragiira ngu abakuratsi b'okwikiriza

oku beetwe Abakristaayo Abakatoriki; nitweta abakuratsi boona abataine bwengye b'ediini ezindi eiziina ribi eririkuhemura: abarikucwamu ekanisa ebicweka, kandi nituzibira n'enteerane zaabo z'omu byombeko kwetwa amakanisa. Orekire ekyo Ruhanga kubacwera orubanja oruhikire rukabasinga, nibateekwa kutegyereza ekifubiro ky'amaani eki obushoboorozi bwaitu, obwo turikwebemberwa obwengye oburikuruga omu iguru turiteekateeka ngu kihikire kubaha . . .”

Ebyo biragiyo ikumi na bitaano by'ekifubiro ebi omugabe ogu yaarabizeho omu myaka mingi nk'egyo bikaaka ababuurizi abarikuhamisiriza obushoboorozi bwa Baiburi obugabe bwona bw'okuta omu nkora ediini yaabo, byabaiha aha mirimo ya gavumenti yoono, kandi byabatiinisiriza kubataho omutango, okunyagwaho ebyabo, okubingwa owaabo, obundi n'okubaita.

Noomanya? Okwo niyo tworekyereire ebiro ebi.

Ekanisa Enkatorika ya Rooma neeyeyeta Nyina w'Amakanisa. Neeyeyeta ekanisa y'okubanza nari eyaabandize. Ekyo kihikiire kimwe. Ekaba eri Ekanisa ya Rooma eyaabandize bwanyima ekagaruka enyima ekaza omu kibi. Ekaba ey'okubanza kwekoramu ekibiina ky'ediini. Omuriyo hakashangwamu ebikorwa kandi bwanyima n'enyegeya y'Obunikolaiti. Tihariho n'omwe orikwija kuhakana ngu teri nyina. Ni nyina kandi ekazaara abahara. Hati omuhara aruga omu mukazi. Omukazi ojwaire ebirikutukura ashutami aha bubungo mushanju bwa Rooma. Ni maraaya kandi akazaara abahara. Abo bahara n'amakanisa g'Abapurotesitante agaamurugiremu reero gakagarukira kimwe enyima omu kibiina ky'ediini n'omu Bunikolaiti. Nyina ogu w'abahara - amakanisa naayetwa maraaya. Ogwo n'omukazi owaabaire atari mwesigwa aha ndahiro z'obushwere bwe. Akaba ashweirwe Ruhanga kwonka yaaguma naashambana na sitaane kandi omu kushambana kwe azaire abahara abarikumushusha. Okwegaita kwa nyina ogu n'abahara nikurwanisa Ekigambo, kurwanisa Omwoyo kandi ekirikurugamu ni antikristo. Eego, ANTIKRISTO.

Hati ntakagiire hare munonga niinyenda kugamba ngu baabishopu aba aba ira bakateekateeka ngu bakaba bari ahaiguru y'Ekigambo. Bakagambira abantu ngu bakaba nibabaasa kubasaasira ebibi byabo baabyatura. Ekyo tikikabahoga amazima. Bakatandika kubatiza abaana bato omu kyasha kya kabiri. Buzima bakabatiza okubatiza kw'okuhindurwa busya. Tiky'okutangaaza abantu bashobeirwe ebiro ebi. Ku baraabe baabaire bashobeirwe obwire obwo, bari haihi munonga na Pentekoote, hati bari omu mbeera mbi munonga, bari haihi nk'emyaka 2000 kuruga aha mazima agaabandize.

Oo, Kanisa ya Ruhanga, hariho amatsiko gamwe gonka. Garuka aha Kigambo kandi ogume Nakyo.

ENYEGYESA YA BALAMU

Okushuuruurwa 2:14, “Okwo oineyo abarikwikiriza enyegyesa ya Balamu, owaayegyeise Balaki kuta enkongi omu maisho g'Abaisraeli, ngu barye ebitambiirwe ebishushani ebirikuramibwa, kandi bashambane.”

Hati tokaabaasa kugira enkora y'Abanikolaiti omu kanisa haza otataasyemu enyegyesa egi endiijo, nayo. Nooreeba, waihaho Ekigambo kya Ruhanga n'okukora kw'Omwoyo nk'omuringo gw'okuramya (“abo abarikundamya bashemereire Kundamiza omu Mwoyo n'omu mazima”) obwo noiya kuteekwa kuheereza abantu omuringo ogundi gw'okuramya ogutari gwa Ruhanga, kandi ogwo ogutari gwa Ruhanga n'enkora ya Balamu.

Ku turaabe nituza kwetegyereza eki enyegyesa ya Balamu eri omu kanisa y'Endagaano Ensyu tushemereire kugaruka enyima tureebe eki yaabaire eri omu kanisa y'Endagaano eya Ira tutyo tugite aha busingye bwa kashatu reero tugiiheyo tugihitsye omu bwire obu.

Ekirikushoboorora nikishangwa omu kitabo ky'Okubara Eshuura 22 kuhitsya omu ya 25. Hati nitumanya ngu Abaisraeli bakaba bari abantu ba Ruhanga abatoorainwe. Nibo baabaire bari Abapentekoote b'omu biro byabo. Bakaba bahungiire ahansi y'eshagama, boona bakaba babatiziibwe omu Nyanja Erikutukura kandi bakaruga omu maizi nibeeshongorera omu Mwoyo nibazinira omu maani g'Omwoyo Orikwera, obwo Miriamu, nabikazi, naateera ekitaasa kye. Mpaho, ahanyima y'obwire bw'orugyendo Abaisraeli aba bakahika Moabu. Noijuka Moabu ou yaabaire ari. Akaba ari mutabani wa Looti ou yaazaire ahari omwe omuri bahara be, kandi Looti nawe akaba ari mwihwa wa Abrahamu, n'ahabw'ekyo Israeli na Moabu bakaba baine obuzaare. Niinyenda ngu ekyo mukireebe. Abamoabu bakaba nibamanya amazima, yaaba baabaire bagatuura omu bikorwa nari batarikugatuura.

N'ahabw'ekyo Abaisraeli bakahika aha myatano ya Moabu batyo baayohereza entumwa aha mugabe nibagira bati, “Turi ab'eishe-emwe. Reka turabe omu nsi yaawe. Abantu baitu nari amatungo gaitu ku garaarye nari gakanywa ekintu kyona, nitwija kukishashurira tushemereirwe.” Kwonka omugabe Balaki omutima gwe gukamuhwa omunda. Ogwo mwebembezi w'ekibiina ky'Abanikolaiti akaba ateeteekateekire kureka ekanisa ekarabamu n'obumanyiso bwayo n'eby'okutangaaza n'okweyoreka kw'ebiconco by'Omwoyo Orikwera ebitari bimwe, n'aha maisho gaabo nihamurinkana n'ekitiinisa kya Ruhanga. Akaba ari omu kabi k'amaani, k'okufeerwa bamwe aha bantu be. N'ahabw'ekyo Balaki akanga kwikiriza Abaisraeli kurabamu. Omu mazima, akaba abatiiniire kimwe, okuhitsya obu yaagiire ahari nabi owaabaire akorerwa ebihembo orikwetwa Balamu akamushaba ngu abe omuteerani ahagati ye na Ruhanga kandi n'okweshengyerereza Ow'obushoboorozi kukiyeena Abaisraeli, akabamara amaani. Reero Balamu, aine ekihika ky'okutunga omwanya omu gavumenti kandi n'okuba omuntu mukuru,

akashemererwa munonga kukora ekyo. Kwonka ku yaareebire ashemereire kwirira haihi, kandi n'okuhurira kuruga ahari Ruhanga kugira ngu abantu bakyeeuwe, nk'oku yaabaire atarikubaasa kukikora wenka, akagyenda kubuuzza Ruhanga yaaba yaabaire naabaasa kumwikiriza kugyenda.

Hati ekyo tirikushushana nk'Abanikolaiti abu turi nabo ebiro ebi? Nibakyeena buri omwe otarikutwaza nkabo.

Balamu ku yaashabire Ruhanga orusa rw'okugyenda, Ruhanga akamwangira. Mugyenzi ekyo kikashaasha! Kwonka Balaki akagyemesereza, yaamuraganisa ebihembo ebirikukiraho n'ekitiinisa. Ahabw'ekyo Balamu akagaruka ahari Ruhanga. Hati okugarukwamu rimwe kukaabaire nikumara. Kwonka tikwo kyabaire ahari Balamu engangaazi. Ruhanga ku yaareebire okwehabagiza kwe, Yaamugambira kwimuka akagyenda. Jubajuba akatandiika endogoya atyo yaagyenda. Akaba ashemereire kwetegyereza ku oku kwabaire kuri okukunda kwa Ruhanga okugyemirwe kwonka n'ahabw'ekyo akaba atarikubaasa kubakyeena n'obu yaakugyenzire emirundi makumi abiri kandi akagyezaho emirundi makumi abiri. Abantu ka nibashushana nka Balamu ebiro ebi! Nibaikiririza omuri Baaruhanga bashatu, babatizibwa omu byeterero bishatu omu mwanya gw'EIZIINA, kandi nabwo Ruhanga ayohereza Omwoyo aharibo nk'oku yaakozire ahari Balamu, batyo bagumizamu nibaikiriza ngu bahikiire kimwe, kandi buzima hanu n'ab'entwaza ya Balamu ejwire. Waareeba, enyegyesa egyo ya Balamu. Gyenda omu maisho nk'oku orikwenda. Kikore omu muringo gwawe. Nibagira bati, “Eego, Ruhanga atuhaire omugisha. Nikiteekwa kuba kihikire.” Nimmunya ngu Ruhanga abahaire omugisha. Ekyo tindikukihakanisa. Kwonka nigwo muhanda gumwe gw'ekibiina ky'ediini ugu Balamu yaatoire. N'okugomera Ekigambo kya Ruhanga. N'enyegyesa y'ebishuba.

N'ahabw'ekyo Balamu akashuuma nk'omugwa-iraro omu muhanda okuhitsya obu maraika otumirwe Ruhanga yaayemereire omu muhanda gwe. Kwonka nabi ogwo (bishopu, kalidinaali, ceyamaani, purezidenti kandi n'omureeberezi mukuru wa boona) akaba ahumisiibwe munonga aha bintu by'Omwoyo ahabw'okuteekateeka aha kitiinisa n'okusiimwa n'esente okuhitsya obu ataabaasize kureeba maraika ayemereire aho na rurara esyoirweyo. Maraika akaba ayemereire aho kuzibira nabi omushazi ugu. Ego ndogoya nkye ekareeba maraika etyo yaamuhigiza neetoora oku n'oku okuhitsya obu aha muheru yaamigiire ekigyere kya Balamu aha rugo rw'amabaare. Endogoya yaayemerera tiyaabaasa kugumizamu. Ekaba etarikubaasa. N'ahabw'ekyo Balamu akagigurukaho kandi yaatandika kugiteera. Endogoya yaatandika kugamba na Balamu. Ruhanga akaikiriza egyo ndogoya kugamba omu rurimi. Endogoya egyo ekaba etari haiburiidi; ekaba eri embibo eyaabandize. Ekagambira nabi ogwo ohumisiibwe eti, “Tiinye ndogoya yaawe, kandi tintwire ninkuheeka n'obwesigwa?” Balamu yaagarukamu ati, “Eego, eego, ori endogoya yangye kandi otwire nompeeka n'obwesigwa kuhitsya hati; kandi ku ndaabe ntarikubaasa kukugyendesa, ninza kukwita . . . Rekyera aho! Eki n'enki, kugamba n'endogoya? Ekyo nikitangaaza, naaba nintekateeka ngu nimpurira endogoya neegamba naanye ningigarukamu.”

Ruhanga atuura naagamba omu rurimi. Akagamba aha bugyenye bwa Belishaza n'ahari Pentekoote. Naakikora ebiro ebi ogundi murundi. N'okuhabura kw'okucwerwa orubanja oruri haihi kwija.

Bwanyima maraika yaayeyoreka Balamu. Yaagambira Balamu ngu kuri etaaba ndogoya akaabaire yaafiire na hati ahabw'okugyeza Ruhanga. Kwonka Balamu ku yaaraganiise kugarukayo, akooherezibwa aine okuhaburwa kugamba ekyo kyonka eki Ruhanga araamugambire.

N'ahabw'ekyo Balamu akashuuma yaayombeka amatambiro mushanju g'enyamaishwa ezitarikuzira z'okutamba. Akaita empaya y'entaama erikworeka okwija kwa Mesia. Akaba naamanya eky'okukora kuhika ahari Ruhanga. Ebikoreso bye bikaba biri kurungi; kwonka bitainemu maani; nikwo kiri na hati. Timurikukireeba Banikolaiti 'mwe? Abaisraeli bakaba bari eifo okwo omu ruhanga nibatamba ekitambo ekirikushushana nako, nibakora ebintu ebirikushushana, kwonka omwe wenka niwe yaabaire naareebwamu obumanyiso. Omwe wenka niwe yaabaire aine Ruhanga ahagati yaabo. Emigyenzo terikwija kugira ahi yaakuhitsya. Terikubaasa kutwara omwanya gw'okweyoreka kw'Omwoyo. Ekyo nikyo kyabaireho ahari Niika. Bakataho enyegyesa ya Balamu, etari nyegyesa ya Ruhanga. Batyo baateera entsibo; eego baagwa. Baahinduka abantu abafiire.

Ahanyima y'okutamba ebitambo, Balamu akaba ayetegwire kuragura. Kwonka Ruhanga akaboha orurimi rwe tiyaabaasa kubakyeena. Yaabaha omugisha.

Balaki akagira ekiniga kingi, kwonka hakaba hatariho ekintu kyona eki Balamu yaakubaasize kukora aha kikwatiraine n'okuragura okwo. Kikaba kyagambirwe Omwoyo Orikwera. N'ahabw'ekyo Balaki akagambira Balamu kushuuma ifo, omu ruhanga, kandi ngu areebe ebicweka byabo by'enyima kureeba yaaba haabaire obundi hariho omuringo gwona ugu yaakubaasa kubakyeeneramu. Obukoryo obu Balaki yaakoreise nibwo bukoryo obu barikukoresa ebiro ebi. Ebigombe by'amadiini ebihango nibigaya ebibiina ebikye kandi ekintu kyona eki birikushanga omu bibiina bikye ekirikubaasa kubireetera kuhemuka nibikyoreka kandi bikigambira ahaiguru. Ab'omurembe baatuura omu kibi, tihariho orikukigambaho ekintu kyona; kwonka reka omwe aha ntoore agwe omu kabi haza orebe yaaba buri rupapura rw'amahirire rutaraakibuzye eihanga. Eego, Abaisraeli bakaba baine ebicweka byabo by'enyima (obunyamubiri). Bakaba baine orubaju orwabaire rutashemereire kusiimwa; kwonka n'omu kutahikiirira kwabo, ahabw'ekigyendererwa kya Ruhanga ekirikukorerwa omu kutoorana, ahabw'embabazi kwonka etari mirimo, BAKABA BAINÉ EKICU NYOMUSHANA N'ENYOMYO Y'OMURIRO NYEKIRO, BAKABA BAINÉ ORUKIRI ORWATEIRWE, ENJOKA Y'OMURINGA KANDI N'OBUMANYISO N'EBY'OKUTANGAAZA. Bakaba

bahamiibwe - atari ahabwabo, kureka omuri Ruhanga.

Ruhanga atasiime na kake Abanikolaiti abo na diguri zaabo za Ph.D, LL.D, na D.D. n'ebibiina by'amadiini birungi byabo byona hamwe n'ebirikuriraye oburungi ebi omuntu arikubaasa kwehimbisizamu; kwonka akagirira Abaisraeli obuganzi ahakuba bakaba baine Ekigambo kyorekirwe omuribo. Buzima Abaisraeli bakaba batarikureebeka nk'abahutuukiire kimwe, aribwo baherize kuruga Misri omu kuhunga kwa jubajuba, kwonka bakaba bari abantu abahairwe omugisha omu muringo gwona. Okumara emyaka eri ahaiguru ya 300 eki baabaire nibamanya kyonka kukaba kuri okuriisa amasyo g'entaama, kureeberera emisiri n'okukora munonga ahabw'okutiina kwitwa Abanyamisri. Kwonka hati bakaba barekwirwe. Bakaba bari abantu abahairwe omugisha ahabw'obukuru bw'okwemariirira kwa Ruhanga. Buzima Moabu ekaba neebagaya. N'agandi mahanga goona nikwo gaakozire, nago. Ekibiina ky'ediini buriyo kigaya abo abateekoziremu kibiina ky'ediini kandi obundi, ahabw'okumariirira, nibaija kubataasya omu kibiina ky'ediini nari babacwekyereze ku baraayangye kutaahamu.

Hati omuntu naabaasa kumbuuza ati, “Ow'eishe-emwe Branham, n'enki ekirikutuma waateekateeka ngu Moabu ekaba eyekoziremu ekibiina kunu Israeli etarikwo? Ekiteekateeko ekyo nookiiha nkahi?” Ninkiiha hanu omuri Baiburi. Kyona kishushansiibwe hanu. Buri kintu kyona ekihandikirwe omu Ndagaano eya Ira ekiri omu muringo gw'okushoboorora kihandikirwe ahabw'okutuhabura kugira ngu tubaase kukyegeraho. Nkiki hanu omu Kubara 23:9, “Nimmureebera ahaiguru y'enkiri, mmwetegyerereza aha mitwe y'ebibungo; reeba, n'eihanga eritua RYONKA, ERITEEBARIRA OMU GANDI.” Nikyo ekyo. Ruhanga naabareeba ahansi ari ahaiguru y'enkiri, atari omu ruhanga Naasherura enshobi zaabo n'okubacwera orubanja. Ruhanga naabareeba omu muringo ogu Yaabaire naayenda kubareebamu - omu buraingwa bwa bwemi bwa rukundo n'esaasi. Bakatuura BONKA kandi bakaba bateekoziremu kibiina. Bakaba bataine mugabe. Bakaba baine nabi, kandi nabi ogwo akaba aine Ruhanga omuriwe ahabw'Omwoyo; kandi Ekigambo kikaba kiizira nabi bwanyima Ekigambo kihika aha bantu. Bakaba batari omu kibiina ky'Amahanga Ageeteeraine. Bakaba batari omu Kibiina ky'Amakanisa g'omu Nsi yoono n'obu haakuba omu ba Baputisti, Puresibateeri, Assembly of God, nari ekindi kibiina kyona. Kikaba kitarikubeetaagisa kubibamu. Bakaba beegaitsire ahari Ruhanga. Bakaba batarikwetenga obuhabuzi kuruga omu rukiiko rwona - bakaba baine “Oku nikwo Mukama arikugira” ahagati yaabo. Haleluya!

Hati n'obu kiraabe kiri ngu Balamu akaba naamanya oburyo buhikire bw'okuhika ahari Ruhanga kandi akaba naabaasa kureeta okushuuruurira kuruga ahari Mukama omu buryo bw'okuheebwa amaani okw'omutaano, akaba akiri bishopu omu kibiina ky'ebishuba. Ahakuba hati n'enki eki yaakozire kwenda ngu atungye obuganzi ahari Balaki? Akateera puraani eyaabaire neija kutuma Ruhanga yaagyemwa kwita Abairaeli. Nk'oku Sitaane yaabaire naamanya ngu akaba naabaasa kubihebiha Haawa (kumureetera kugwa omu kibi ky'omubiri) reero kikatuma Ruhanga yaacwa orubanja rw'okufa oru yaabaire Agambire aha kibi, mbwenu Balamu akamanya ngu ku yaakubaasa kureetera Abaisraeli kukora ekibi, Ruhanga akaba naija kubaita. N'ahabw'ekyo akateera puraani y'okubeeta kwija bakawatanisa omu kibi. Akoohereza amabaruka g'okubeeta kwija omu bugyenyi bwa Baali-Peori (mwije muramye naitwe). Hati Abaisraeli, hatariho kubanganisa, bakaba baareebireho amagyenye g'Abanyamisri n'ahabw'ekyo tibaakyehuriiremu kuba kigwire munonga kugyenda bakaroreera kandi obundi bakarya hamwe n'abo bantu. (Hoona hariho ekigwire omu kukwatanisa? Tushemereire kubakunda, tikwo, kitari kityo tukaabeegaruriza tuta?) Okunywana tikukakoraga kubi muntu weena - nari nikwo baateekateekire batyo. Kwonka abo bakazi b'emicwe y'obushambani aba Moabu ku baatandikire kuzina nibajuura ebijwaro obwo nibeetoorora nibazina nibeetogonyora na twisiti, okurigira kubi kwaimuka omu Baisraeli batyo baayohibwa omu bushambani reero Ruhanga omu kiniga kingi yaabaitamu emitwara ena n'enkumi ibiri.

Kandi ekyo nikyo Konsitantiini n'abaamuhunguriire baakozire ahari Niika n'ahanyima ya Niika. Bakaraarika abantu ba Ruhanga kwija omu ruteerane. Kandi ekanisa ku yaashutamire kurya, kandi ekaimuka kuzaana (kukwatanisa omu mitwarize y'ekanisa, emikoro, n'amagyenye g'ekipagaani nigeetererwa ebikorwa by'Abakristaayo) ekategwa; yaashambana. Atyo Ruhanga yaashohora.

Omuntu weena ku aruga aha Kigambo kya Ruhanga kandi akeegaita aha kanisa omu mwanya gw'okwakiira Omwoyo Orikwera, omuntu ogwo afa. Afiire! Okwo nikwo ari. Oteegaita aha kanisa. Otaza mu kibiina ky'ediini haza okatwarwa enyikiriza z'ediini n'emigyenzo nari ekintu kyona ekirikutwara omwanya gw'Ekigambo n'Omwoyo kitari ekyo ofiire. Kihweire. Ofiire. Otaansiibwe na Ruhanga ebiro n'ebiro!

Ekyo nikyo kyabaireho omu busingye bwona okwiha obwo. Ruhanga acungura abantu. Barugayo ahabw'eshagama, beziibwe Ekigambo, baraba omu maizi g'okubatizibwa batyo baijuzibwa Omwoyo; kwonka ahanyima y'omwanya mukye rukundo y'okubanza ehora kandi omuntu agira ekiteekateeko ngu bashemereire kwekoramu ekibiina kugira ngu beerinde kandi n'okwekorera eiziina, batyo beekoramu ekibiina bagarukayo omu busingye bwa kabiri kandi obumwe n'obumwe nangwa n'enyima yaabwo. Baba batakiine Omwoyo wa Ruhanga, kureka omugyenzo gw'okuramya gwonka. Bafiire. Beejwangize n'enyikiriza z'ediini n'emigyenzo kandi omuribo tiharimu magara.

N'ahabw'ekyo Balamu akatuma Abaisraeli baashambana. Noomanya ngu okushambana kw'omubiri nigwo mwoyo ogwo oguri omu diini eyekoziremu ekibiina? Naagira ngu omwoyo gw'obushambani nigwo mwoyo gw'ekibiina ky'ediini. Kandi abashambani boona nibaija kugira omugabo gwabo omu nyanja y'omuriro. Okwo nikwo Ruhanga ateeekateeka aha kibiina ky'ediini. Eego sebo, maraaya n'abahara be nibaija kuza omu nyanja y'omuriro.

Ebigombe by'amadiini ti bya Ruhanga. Tibikabaga byo kandi tibiriba byo. N'omwoyo mubi ogurikureeta okwetaanisamu kw'abantu ba Ruhanga bamwe gukabata omu madaara g'ebitiinisa by'abakuru b'ediini abandi bakaba abakuratsi; kandi, n'ahabw'ekyo, n'omwoyo mubi ogurikutaanisa abantu n'abantu. Ekyo nikyo ekibiina ky'ediini n'ebigombe by'amadiini bikora. Omu kwekoramu ekibiina beetaanisa n'Ekigambo kya Ruhanga, kandi beetaasya omu bushambani bw'omwoyo.

Hati yetegereze ngu Konsitantiini akaha abantu amagyenyezi g'omutaano. Gakaba gari amagyenyezi g'ekipagaani aga ira gaine amaziina masya agaihirwe omu kanisa, nari obumwe n'obumwe emigyenzo y'Ekikristaayo ekaba etwarwa kandi ekoresibwa omu buryo obutaribwo bw'emikoro y'ekipagaani. Akakwata okuramya kwa kazooba nyamuhanga yaakuhindura okw'Omwana wa Ruhanga. Omu mwanya gw'okujaguza ebiro 21 Okwaikumi-na-ebiri, ariho baabaire bajaguriza obugyenyezi bwa kazooba nyamuhanga, bakabuta aha biro 25 Okwaikumi-na-ebiri kandi baakwata ekiro ky'okuzaarwa kw'Omwana wa Ruhanga. Kwonka nitumanya ngu Akazaarwa omu kwezi kwa Kana obu amagara garugayo, atari omu Kwaikumi-na-ebiri. Kandi baakwata obugyenyezi bw'emandwa Astarte baabweta okujaguza Amazooka obu Omukristaayo ashemereire kujaguza okufa n'okuzooka kwa Mukama. Buzima bukaba buri obugyenyezi bw'ekipagaani bw'emandwa Astarte.

Bakata amatambiro omu kanisa. Baatamu ebishushani ebirikuramibwa. Baaha abantu eki baayetsire enyikiriza y'entumwa, n'obu otarikubaasa kugishanga omuri Baiburi. Bakegyesa abantu kuramya emizimu ya baishenkuru omu buryo obwo baahindura Ekanisa Enkatorika ya Rooma ekanisa erikukirayo omu kuramya emizimu omu nsi. Buri nyonyi mbi ekaba eri omu kyashuri ekyo. N'Abapurotesitante n'ebibiina byabo nibakora ekintu ekyo nikyo kimwe.

Bakarya ebintu ebitambirwe ebishushani. Hati tindikugira ngu eki buzima nikimanyisa ngu bakaba nibarya eby'okurya ebitambirwe ebishushani. Ahakuba n'obu Orukiiko rwa Yerusaalemu rwabaire rukizibiire, Paulo tarakitairaho maani ahakuba akagira ngu ebishushani ebirikuramibwa ti kintu. Ni nk'oku omuntu arikukyehuriramu kureka ahu kyabaire kiteeza entsibo ow'eishe-emwe otaine maani kityo kitaikirizibwe. Okwongyeraho, Okushuuruurirwa oku nikukwata aha Banyamahanga batari Bayudaaya nk'oku aga gari amakanisa g'Abanyamahanga. Nindeeba eki omu mushana gumwe ogu ndikureeberamu ebigambo bya Mukama ebi, “Ku murikuba mutariire omubiri Gwangye, kandi mutanyweire shagama Yangye, timwine magara omuriimwe.” “Omuntu tatungwa by'okurya byonka, kureka n'Ekigambo kyona ekiruga omu kanwa ka Ruhanga.” Noobaasa kureeba ngu okurya buzima n'okurya omu muringo gw'omwoyo. Mbwenu obu abantu aba baabaire nibainamira ebishushani, bakahemba amatabaaza, nibakoresa ebihuumuro by'ekipagaani, nibaaturira ebibi byabo abantu (ebyo byona n'ebiyediini ya sitaane,) bakaba nibakwatananisa na sitaane atari Mukama. Bakaba nibaramya ebishushani yaaba baabaire nibakwemera nari batarikukwemera. Nibabaasa kugamba byona ebi barikwenda ngu amatambiro n'obubaane n'ebiy'okubajutsya kwonka eshaara za Mukama nari kyona eki barikuteekateeka ngu nikyo kirikumanyisa; kandi nibabaasa kugira ngu ku bashabira omu maisho g'ekishushani ngu ekyo n'ahabw'ekigyendererwa ky'okuhamisiriza; kandi ngu ku baaturira omusaserdooti, ngu buzima obwo baba nibaaturira Ruhanga omu mitima yaabo, kandi ku barikugira ngu omusaserdooti abasaasira, n'okugira ngu naakikora omu Iziina rya Mukama; nibabaasa kugamba eki barikwenda kwonka bakwatananise omu diini erikumanywa gye ya Sitaane, eya Babulooni kandi beegaisire aha bishushani ebirikuramibwa batyo baashambana omu buryo bw'omwoyo, ekirikumanyisa okufa. Bafiire.

N'ahabw'ekyo ekanisa na gavumenti bikagaitwa empeta. Ekanisa ekegaita n'ebishushani ebirikuramibwa. Baine obushoborozi bwa gavumenti enyima yaabo bakateekateeka ngu hati, “Obukama bukaba bwizire kandi okukunda kwa Ruhanga kukaba kugyemirwe omu nsi.” Tiky'okutangaaza Ekanisa Enkatorika ya Rooma tetegereze okugaruka kwa Mukama Yesu. Tibarikwikiririza omu kutegyeka kwa Kristo kw'emyaka rukumi. Baine obutegyeki bwabo bw'emyaka rukumi hanu omu nsi hati. “Paapa naategyeka hati hati kandi ngu Ruhanga naamutegyekyeramu.” N'ahabw'ekyo ku Ariija kurugirira aharibo, kishemereire kuba obu iguru risya n'ensi nsya bitebeekanisiibwe. Kwonka bagwire. Paapa ogwo niwe mutwe gw'ekanisa y'ebishusha, kandi nihaza kubaho okutegyeka kwa Kristo kw'emyaka rukumi, kwonka ekyo kyaba nikibaho tarikwija kukibamu. Naija kuba ari ahandi.

OKUHABURA

Okushuuruurwa 2:16. “N'ahabw'ekyo oyeteise; ku oraabe oteeteisize, Niinyija kwija juba ahariwe, mbarwanise na rurara ey'omu kanwa Kangye.”

Eki Yaakubaasize kugamba ekindi niki? Ruhanga naabaasa kwehuza ebibi by'abo abarikuzaanisa Eiziina Rye? Hariho omuhanda gumwe gwonka gw'okugirirwa embabazi omu shaaha y'ekibi, YETEISE. Yaatura ku otahikire. Ija ahari Ruhanga ahabw'okusaasirwa n'Omwoyo wa Ruhanga. Eki n'ekiragiro kuruga ahari Ruhanga. Okukigomera ni rufu, ahakuba naagira ati, “Ndyakurwanisa na rurara ey'omu kanwa Kangye.” Enyamaishwa ekarwanisa abarikwera, kwonka Ruhanga aryarwanisa enyamaishwa. Abo abarwaniise Ekigambo ekiro kimwe nibaija kushanga Ekigambo nikibarwanisa. N'ekintu ky'akabi munonga okucwaho, nari okwongyera aha Kigambo kya Ruhanga. Ahakuba abo abaakihindwireho, kandi bakakikoresa nk'oku baakunzire, omuhuru gwabo guryaba guuha gutari okufa n'okucwekerera? Kwonka embabazi za Ruhanga nizigamba n'eiraka rihango ziti, “Yeteise.” Oo, ebiteekateeko by'okweteisa ka ni birungi. Tihaine eki naareeta omu ngaro zangye, nimpamira aha musharaba Gwawe gwonka. Nindeeta obusaasi bwangye. Niinyeteisa ngu ndi nk'oku ndi, kandi n'ebi naakozire. Hati

n'eshagama, ti kindi kureka eshagama ya Yesu. Nikiija kuba ki? Okweteisa, nari rurara ya rufu? Kiri ahariwe.

EBIHEMBO

Okushuuruurwa 2:17. “Oine amatu, ahurire eki Omwoyo arikugambira amakanisa. Orikusingura Ndyamuha omugabo aha maanu esherekirwe, kandi Ndyamuha eibaare eririkwera, erihandikirweho eiziina risya, eritarikumanywa muntu weena kureka ogwo owaariheebwa.”

Buri butumwa ahari buri busingye bwine ekirikugaruramu amaani omu mwikiriza, nibumwezirikisa kuba omusinguzi kandi omu buryo obwo Mukama abone kumuha ebihembo. Omu busingye obu Omwoyo naaranisa maanu esherekirwe n'eiziina risya erihandikirwe omu ibaare eririkwera.

Hati obu buri butumwa bwohereziibwe ahari “maraika” - (omuntu entumwa) obujunaanizibwa bukuru munonga kandi n'omugisha ogurikutangaaza n'omugabo gwe. Ruhanga naaha okuraganisa kw'omutaano abashaija aba, nk'omu ky'okureeberaho ky'entumwa ikumi na ibiri kushutama aha bitebe by'obukama ikumi na bibiri nibacwera emanja enganda ikumi na ibiri za Israeli. Kandi, oijukye Paulo akaheebwa okuraganisibwa kw'omutaano: okwo okw'okureeta abantu abari omu omugore omu biro bye ahari Yesu. 2 Abakorinso 11:2, “Ahakuba nimbagirira eihato rya Ruhanga, ahabw'okuba nkabahingira Kristo, ngu mbareete omu maisho Ge nk'omwishiki oshugaine oku ahingirwa omushaija omwe.” Okwo nikwo kiriba na buri ntumwa etwire erikwesigwa aha Kigambo ky'obwire bwayo n'obusingye bwayo. Nikiija kuba kityo omu biro by'aha muheru. Kiryaba ekihembo ky'omutaano ekirishushana n'ekyo ekyahairwe Paulo. Nintekateeka abarikukira obwingi omurimwe nimwijuka oku naagambire ngu nkaba ntuura nintiina kufa ahabw'okutiina kubugana Mukama haza atanshemererwe ahabw'okuba nkamugwisa kubi emirundi mingi. Eego, nkaba nintekateeka ahari ekyo akasheeshe kamwe mbyami omu kitanda kandi ahonaaho naatwarwa omu kworekwa okurikutangaariza kimwe. Ningira ngu kukaba kuri okurikutangaaza ahakuba ntungire enkumi n'enkumi z'okworekwa kwonka tihariho na rimwe obu ndareebekire nintsigaho omubiri gwangye. Kwonka nkaba ndi aho ntwairwe; kandi naaranzya enyima kureeba omukazi wangye, ntyo naareeba omubiri gwangye guri aha rubaju rwe. Bwanyima naayeshanga omu mwanya ogurikukirayo oburungi ogu ndareebire. Ekaba eri paradiiso. Nkareeba omutwe muhango gw'abantu abarikukirayo oburungi kandi abashemereirwe munonga okukira abu ndareebire. Boona bakaba nibareebeka kuba ensinganto - nk'ab'emyaka 18 okuhitsya ahari 21 y'obukuru. Bakaba bataine nju omu ishokye nari omufunya nari obumuga bwona aharibo. Abakazi bato boona bakaba baine eishokye ryabo rishuumire kuhika omu manyanya, kandi abatsigazi bakaba bari barungi munonga baine amaani. Oo, ka bantangiire. Bakambumbatira banyeta ow'eishe-emwe waabo omukundwa, kandi baaguma nibangambira oku baabaire bashemereirwe okundeeba. Ku naabaire ninkitangaarira abantu baingi aba boona abu baabaire bari, omwe aha rubaju rwangye yaagira ati, “N'abantu baawe.”

Nkatangaara munonga naabuza nti, “Aba boona n'aba Branham?”

Yaagarukamu ati, “Ngaaha, n'abu waahindwire okareeta ahari Kristo.” Bwanyima yaatunga orukumu omukazi omwe yaagira ati, “Nooreeba omukazi muto ogwo ou waaba nooshamaarira akaanya akaahwaho. Akaba aine emyaka 90 y'obukuru obu waamureeta ahari Mukama.”

Naagira nti, “Oo mugyenzi, kuteekateeka ngu eki nikyo naabaire ntiina.”

Omushaija ogwo yaagira ati, “Tuumuriire hanu obwo tutegyereize okwija kwa Mukama.”

Naagarukamu nti, “Niinyenda Kumureeba.”

Yaagira ati, “Torikubaasa Kumureeba hati; kwonka Naija juba, kandi ku Araiye naija kubandiza ahariwe, kandi oryacwerwa orubanja kurugiirira aha Ngiri ei obuuriire, kandi turyaba abantu baawe.”

Naagira nti, “Noomanyisa ninjunaanizibwa aba boona?”

Yaagira ati, “Buri omwe. Okazaarwa ori omwebembezi.”

Naamubuuza nti, “Buri omwe naija kujunaanwa? Kandi we Orikwera Paulo?”

Yangarukamu ati, “Aryajunaanwa ab'ebiro bye.”

“Buzima,” naagira nti, “Mbuuriire Engiri egyo nk'ei Paulo yaabuuriire.” Reero omutwe muhango gw'abo bantu gwagambira ahaiguru guti, “Tuumuriire ahari ekyo.”

Eego, nindeeba ngu Ruhanga naaza kuha ekihembo ky'omutaano abaheereza Be abahikiriize obujunaanizibwa obu Yaabaire omu bwesigwa. Ku baaraabe baatungire okushuuruurirwa kw'Ekigambo ahabw'obusingye obwo kandi baabuuriire omu bwesigwa omu biro byabo, kandi baatwire amagara g'eki baabuuriire, nibaija kutunga ekihembo ky'amaani.

Hati twine ekiteekateeko eki omu mutima, garuka oreebe ogwo mushororongo. “Ndyamuha maanu esherekirwe.” Twena nitumanya ngu egyo maanu ekaba eri eby'okurya bya baamaraika; ekaba eri eki Ruhanga yaayohereize ahansi aha bunyaatsi ahabw'Abaisraeli omu bwire bw'okuzengerera kwabo. Ekaba eri eky'okurya

ekihikire. Kikaba nikitangaaza oku obwo butongye bw'eby'okurya bwabarinzire bakaguma bari gye omu mubiri. Tihariho n'omwe owaarwaire. Nikyo baabaire nibeetenga kyonka. Eshanduukye y'endagaano ku yaakozirwe bakatamu emwe ahari egyo maanu. Eshanduukye y'endagaano bwanyima baagita enyima y'omukingo kandi omunyamurwa omukuru niwe yaabaire ayehanga kugiirira haihi kandi akaba atekwa kuba aine eshagama y'empongano. Ogwo Mugaati ogwarugire omu iguru, ogwabaire nigushushanisa maanu, eizooba rimwe gukaruga omu iguru gutyo gwaba Amagara ahabwa boona Abarikumwikiriza. Akagira ati, "Niinye mugaati gw'amagara: Niinye mugaati gw'amagara ogwarugire omu iguru; omuntu weena ku arikurya aha mugaati ugu naagumaho ebiro byona." Obu Yaagyenda Akatutsigira Ekigambo Kye, "Omuntu tatungwa by'okurya byonka, kureka n'Ekigambo kyona ekiruga omu kanwa ka Ruhanga."

Ekigambo Kye kikaba kiri omugaati. Kikaba kiri maanu ehikire, ei, omuntu ku yaakubaisibwaho nayo, tarifa. Kwonka juba ahanyima y'okufa kwa baishenkuru, tihariho n'omwe owaareebekire nk'orikumanya amazima agahikire kandi omu bwire bukya maanu egi ekareebeka nk'esherekirwe aha bantu. Kwonka omuri buri busingye Ruhanga akatandika kugaruka kuheereza ebyo ebyabaire bisherekirwe kurabira omu kushuuruurirwa okuhitsya omu biro ebi eby'aha muheru kurugiirira aha Kushuuruurwa 10:7, obu nabi ariija kandi akashuuruura enaama zoonza reero Mukama akaija. Hati omuri buri busingye, ningamba, entumwa zikaheebwa amazima agasherekirwe. Kwonka tibaragahirwe ahabwabo bonka. Kwonka kiri nk'oku kyabaire obu abeegi baashabwa kuheereza emitwe mihango y'abantu emigaati n'eby'enyanya; Yesu akabaha eby'okurya bibegire, kandi nabo baabiheereza abantu. Ruhanga aheereza orikusingura maanu Ye esherekirwe. Tikikaabaasa kuba okundi. Tarikubaasa kwigurira amabiikiro Ge abo abarikugaya ebyo ebyaherize kushuuruurwa.

Eki mbaire ningamba aha ntumwa ya buri busingye Ruhanga arikugihya gamwe aha mazima agaabandize aga Pentekoote nikishushanisibwa omu Ndagaano eya Ira ahu Musa yaaragiirwe kutwara ebipimo bishatu n'ekicweka bya maanu akagita hamwe omu rwabya rw'ezaabu enyima y'omukingo aharikwera munonga. Okwo omunyamurwa omukuru owa buri busingye akaba abaasa kutaahamu n'eshagama y'empongaano. Bwanyima akaba atwara akacweka kakye ka maanu egi (ahakuba ekaba etajunda) akaabaire kari akacweka k'emaanu eyaabandize akarya. Hati omuri buri busingye entumwa ya Mukama ahari obwo busingye ekaba eheebwa okushuuruurirwa kwa Ruhanga ahabw'obwire obwo. Entumwa ku yaabaire emurikirwa amazima, ekaba ereeta amazima ago aha bantu. Kandi abo abu amatu gaabo gaabaire gaaba gaigwirwe Omwoyo bakaba bahurira amazima ago, bagaikiriza, bagatuura.

Hati mbwenu, hariho nabwo ekiteekateeko ky'okwija kurya aha maanu esherekirwe omu biro by'omu maisho. Niteekateeka ngu nikwija kuba okurya okutahwaho kw'okushuuruurirwa kwa Yesu Kristo omu busingye obutahwaho oburiija. Tukaabaasize tuta kutandika kumanya obutungu obutarikwetegyezibwa bw'Okubaho Kwe? Byona ebi tureetengire kumanya, ebibuuzo byaitu byona ebitagarukirwemu, ebyo byona biryashuuruurwa. Okushuuruurirwa turyakutunga kuruga ahari Kristo Ori amagara gaitu. Oo, obumwe n'obumwe tuteekateeka ngu Nitumumanyaho kakye n'Ekigambo Kye aha nsi aha, kandi ni kirungi munonga, nikitureetera okwesiima; kwonka eizooba rimwe emibiri yaitu ku erihindurwa, Ekigambo ekyo Nawe biryaba eki tutakarootahoga ngu nikibaasika.

Hanu naho nikigira ngu Naaza kuha orikusingura eibaare eririkwera kandi omu (atari aha) ibaare harimu eiziina risya, eri mukama waaryo wenka arikumanya. Hati ekiteekateeko ky'eiziina risya n'ekimanyiriirwe. Abramu akahindurwa yaaba Abrahamu, Sarai yaaba Saara, Yakobo yaaba Israeli, Simooni yaaba Petero, na Saulo yaaba Paulo. Amaziina aga gakareetaho empinduka, nari gakaheebwa ahabw'empinduka. Kikabaho ahanyima ya Abramu na Sarai amaziina gaabo kuhindurwa Mukama kugira ngu batebeekanisibwe kwakiira omwana owaabaire naija. Omu bya Yakobo, akaba naateekwa kusingura reero akeetwa omunyiginya. Omu bya Simooni na Saulo, ku baikiriize Mukama, empinduka yaabo yaabaho. Kandi ebiro ebi buri mwikiriza w'amazima omuriitwe yaatungire empinduka omu iziina. Turi Abakristaayo. N'eiziina rya butoosha ahariitwe twena. Kwonka eizooba rimwe nitwija kugira empinduka endiijo; tihariho kubanganisa turyaheebwa eiziina risya. Nikibaasika gye ngu eiziina eryo rikaba riri eryaitu ry'amazima kandi eiziina eryabandize eryahandiikirwe omu kitabo ky'Amagara eky'Omwana gw'Entaama ensi etakahangirwe. Naamanya eiziina eryo, kwonka titurikurimanya. Eizooba rimwe omu kusiima Kwe, naitwe turyarimanya.

Eibaare eririkwera. Ka ni kirungi. Nkiki hanu ekishushani ekindi eki orikwera arizimuurirwa kuruga omu ngaro za Ruhanga ahabw'okugyezibwa kwe omu nsi. Noomanya, ahanyima ya Konsitantiini, ekanisa y'ebishuba ekabaasa kutibika engaro omu ibiikiro ry'esente rya gavumenti kandi omu buryo obwo yaimutsya ebyombeko birungi biijwiremu ebishushani ebibumbirwe nari ebisharwirwe birungi. Ebishushani ebi, ebibumbirwe nari ebisharwirwe, ebikozirwe omuri mabulo erikwera, omu mazima bikaba biri ebishushani ebiramibwa by'Abarooma ebyagarukire kwetwa amaziina g'abarikwera. Amakanisa kandi n'ebirikushangwamu bikaba biri eby'omutaano omu burungi, nangwa nk'oku omuntu arikureeba ebiro ebi. Kwonka Ruhanga akaba atari nabo. Ruhanga akaba arahi? Akaba ari n'abarikwera Be omu ka enkye, nari omu nyanga, nari omu mwanya gw'ekibira aha nshozi ei baayesherekire abashomi b'ekkanisa y'ebishuba. Bakaba bataine byombeko birungi, kwaya ezijwaire amaganduura, ebijwaro birungi, n'ebindi by'ensi ebirikushamaaza. Kwonka hati omu kuraganisa oku okw'omutaano aha baikiriza b'amazima b'obusingye bwona, Ruhanga arangiriire ku Naija kubaheereza ebihembo bikuru kandi ebitahwaho. Reka abatungi bagaye abooro. Reka bahe ekanisa sente nyingi kugira ngu nayo ekaaha ekitiinisa owaagiha obuhwezi omu buryo bw'okutaho eibaare rya mabulo nari ekishushani ekisharwirwe nk'ekijutsyo kyabo kureebwa boona kandi kugira ngu boona babaase kuteera omu ngaro nibasiima. Eizooba

rimwe Ruhanga Ogwo oreeba kandi akamanya byona aryagaruka asiime omufaakazi ogwo ahabw'okuhayo ebye byona, n'obu kiraabe kitari kindi kureka obusente bubiri, kandi We, We wenka, aryamuha ebihembo by'omu iguru.

Eego, maanu esherekirwe kandi n'eiziina risya omu ibaare eririkwera. Mukama ka ni murungi ahariitwe kutuha ebihembo omu muringo ogurikutangaaza, haza itwe tutabishemereire. Oo, niinyenda kuguma nyeteekateekire obwire bwona kukora okukunda Kwe, n'okubiika eitungo omu iguru.



www.messagehub.info

Obutumwa obu bukabuurirwa
William Marrion Branham
“... omu biro by'eiraka ...” Kush 10:7